

San Mateo

Dios Watsal Pit Jesucristowa Para

San Mateone an ñancha Dios Watsal Pit Judío awaruza panara, Mesías, Dios niritmikara, piankamanapa, Jesús usparuza watsal milnana-pa. Jesús pa ñamin kwalpakas Jesús kawira payukas parawane, San Mateone Juan munnammikawa paramtu. Kwiztane San Mateone Diablowa, Jesús ta kwail kimmikawa, paramtu (1.1–3.12). Kwiztane Jesús ne paiña kal kimizta (3.13–4.11). Usne Dios watsal pit awaruza kamtanat kit akwan ishturuza watsaninnara (4.12–18.35). Minpa kwail awaruzne Jesús ta tira patpian kit piantaara (caps 19, 20). Kwiztane Jesús irittas kalkulawane, Jesús ne paiña kammuruza innnamtu, wan sura uztuza ianapa, Jesús pa kammuruza namninnanapa (caps 21–28).

Jesús ne kwisha wat kamtammika azi. Usne Dios awaruza innnamtu kamtanara, us kuruntu aizpa uzanapa. Wan awaruza kamtam kwintakasa kamtanara. Usne awaruza kamtanara, Jesús ta kanpaanapa, nil uzanapa.

Jesucristowa an ñamin kwal uztuzne iara

(Lc 3.23-38)

- 1** ¹ Jesucristowa kwal an ñamin kwal uztuza wian kit ka munara: Davidpa kwalkas Abrahampa kwalkas.
- 2** Abrahamne Isaacpa papihsh azi.
Isaacne Jacobwa papihsh azi.
Jacobne Judáwa papihsh azi. Uskas paiña aimpishstuz-pa papihsh azi.
- 3** Judáne Fareswakas Zarawakas papihsh azi. Tamarne uspawa akkuhsh azi.
Faresne Esrompa papihsh azi.
Esromne Arampa papihsh azi.

- 4 Aramne Aminadabpa papihsh azi.
Aminadabne Naasónpa papihsh azi.
Naasónne Salmónpa papihsh azi.
- 5 Salmónne Boozpa papihsh azi. Rahabne paiña akkuhsh azi.
Boozne Obedpa papihsh azi. Rutne paiña akkuhsh azi.
Obedne Isaíwa papihsh azi.
- 6 Isaíne katsa ininmika Davidpa papihsh azi.

Katsa ininmika Davidne Salomónpa papihsh azi. Usne
Uríaspa ashampara milta. Uríaspa ashampane Sa-
lomónpa akkuhsh azi.

- 7 Salomónne Roboampa papihsh azi.
Roboamne Abíaspa papihsh azi.
Abíasne Asawa papihsh azi.
- 8 Asane Josafatpa papihsh azi.
Josafatne Jorampa papihsh azi.
Joramne Uzíaspa papihsh azi.
- 9 Uzíasne Jotampa papihsh azi.
Jotamne Acazpa papihsh azi.
Acazne Ezequíaspa papihsh azi.
- 10 Ezequíasne Manasés pa papihsh azi.
Manasésne Amónpa papihsh azi.
Amónne Josíaspa papihsh azi.
- 11 Josíasne Jeconíaspakas paiña aimpishstuzpakas
papihsh azi. Sun payukin Babilonia suras awane
Judío awaruz a piznat kit uspawa surakima kal kin
milnara.
- 12 Sun kitpane, Jeconíasne Salatielpa papihsh azi.
Salatielne Zorobabelpa papihsh azi.
- 13 Zorobabelne Abiudpa papihsh azi.
Abiudne Eliaquimpa papihsh azi.
Eliaquimne Azorpa papihsh azi.
- 14 Azorne Sodocpa papihsh azi.
Sodocne Aquimpa papihsh azi.
Aquimne Eliudpa papihsh azi.
- 15 Eliudne Eleazarpa papihsh azi.
Eleazarne Matánpa papihsh azi.

Matánne Jacobpa papihsh azi.

- 16 Jacobne Joséwa papihsh azi. Joséne Maríawa ampu azi. Maríane Jesús pa akkuhsh azi. Jesúsne, Mesíaskas, Dios niritmikakas, muntit.
- 17 Sunkanain catorce kwaltuzne Abramtas Davidtakima uzat kit ka munara. Davidtas Babilonia awa Judío awaruza piznat kit milnarakima, mamaz catorce kwaltuzne uzara. Sun payuras mamaz catorce kwaltuzne uzara, Dios niritmika kawinakima.

Jesúsne kawimtu

(Lc 2.1-7)

18 Sunkana Jesucristone kawirit. Paiña akkuhshne Josékasa kasara kin namtit, pareju uztachasmin. Pareju uztachasmin, usne pija wa wanmalta, Dios Sinam Izpul akwa. Dios Sinam Izpulne Maríara winta, sun pashpa milnapa. 19 Joséne, paiña ampune, uskasa kasara kin namtit. Wat awa azi. Mane María pija warit mirawane, usne sun awa iztakin Maríara kwaimtus kainanashitchi. Usne Maríara puintain kwaishimtu, awa piankamamanpa. 20 Sun mintuasmin, pitmizta. José kainkizpamtuasmin, Anpatpa ángelne Joséra ka kaizta:

—Miza. Nune Davidpa kwal i. Nune Maríara milna ishku mun, up ashampa namnapa. Maríane sun painkul mijanpai, Sinam Izpul akwa. 21 Usne maza painkul mijanpai. Nune ussa Jesús munnaka. Awa ussa Jesús munaanazi, Judío awaruza wat sat milnamtu akwa, kwail kiamanpa, ka kizta.

22 Sunkana kirit, wan awa Anpat kaizta aizpa nijkulanapa. Dios kainammikane ka kaizta:

23 “Nimpish ashampane pija wanazi.

Usne maza painkul mijanazi.

Uspane ussa Emanuel munanazi.”^a

(Sun mun kizkane, “au Diosne aukasa uztu” kizmuspas.)

24 Kainkizpamtu izkultawane, Joséne Anpatpa ángel ininta aizpa kit kit Maríara milta, paiña ashampakana. 25 Uspane pareju pitpailtachi, pashpa milnakima. Pashpa milkane, Joséne ussa Jesús munta.

^a 1.23 Is 7.14

Wat piantuzne us tukin aat kit Jesústa wakpuj wainñamtu

2¹ Jesús Belén pipulukin kawimizkane, Herodesne Judea sura mikwa azi. Sun payu wat piantuzne, pãn puzmumans atuzne, katsa Jerusalén pipulura piannara. Kíma izat akwa, uspane anza wat piankamara. **2** Uspane ka mimaara:

—¿Míntama sun pashpa mílta? Usne Judío awaruza ininnanazi. ¿Míntama tui? Aune paiña kíma pãn puzmukin izanash. Sun akwa aune apain aanash, ussa wakpuj wainñana.

3 Katsa mikwa Herodeskas wan Jerusalén pipulukin uztuzkas sun miat kit ishkuara. **4** Suasne Herodesne wan pariya inintuzakas Moisés kaizta aizpa kamtamtuzakas akwanara, Cristo mínta kawishina kiz mimana. **5** Uspane ka kaizara:

—Belén pipulukin, Judea sukin kawinazi. Sunkanain Dios kainammikane ka parit:



Josékas Mariákas; Jesús punkikin tu

6 “Belén pipulune Judea sukin ainki pipulu i.
 Akkwan awa an ainki pipulukin uzamtuchikas,
 anza katsa mikwane sun pipulukin kawinazi,
 ap Judío awaruza kiwainanapa.”^b

7 Suasne Herodesne kima iztaruza puintain akwanat kit ka mimanara:

—¿Chi payuma kima izanash? Mimarawane, usne kima kai izpanka piankamta. 8 Suasne usparuza Belén pipulura ininnat kit ka kaiznara:

—Ta iat kit an pashpa sairain. Ussa wanmaltawane, apain kail kit nawa kainanaka, nakas ussa wakpuj wainna, kiznara.

9 Mikwa kaizta aizpa miarawane, kima izmuruzne iamizta. Paiña suras puztachasmin, pashpa tura iarachasmin, uspane sun kimara pãn puzmukin ñamin izarit. 10 Kima iztuasmin, uspane kwisha wat minñat kit 11 yalta nappat kit pashparakas Maríarakas, paiña akkuhshta, izara. Suasne uspane pashpa tukin wakpuj wainñara. Kwiztane uspa kara aizpa azpiz kit urukas inciensosokas mamaz mirra piampakas ukkat kit ussa miñara. 12 Kwiztane kimu izmuruz kainkizpamtuasmin, pittamtuasmin, Diosne usparuza kurunnara, Herodes tuwara kaiyamanpa. Suasne uspane uspa sura mamaz miwarain kaiyamizta.

Uspane Jesústa Egipto sura milpailtu

13 Kimu izmuruz kaiyarawane, Joséne kainkizpamtuazi. Anpatpa ángelne ussa izpan kit ka kaizta: “Kuhshakti. Nukas pashparakas paiña akkuhshtakas Egipto sura azain irain. Sua nukulti, na kaiznakima. Herodesne pashpara sainanpain, ussa piantana,” kizta.

14 Joséne kuhs kit pashparakas paiña akkuhshtakas munat kit amtawara pipulukis puzat kit Egipto surakima iara. 15 Suain nukkulara, Herodes inakima. Egipto sura nukkultit akwa, uspane Anpatpa kainammika kaizta aizpa kiarit. Sunkana kaizta: “Nane ap painkulta Egipto suras akwarau.”^c

Herodesne akkwan pashaparuzza piantana ininnara

16 Herodes wat pianturuz awa kaiyarachi piankamtawane, usne kwisha pilchapuzta, uspa ussa kutkwarit akwa. Suasne He-

^b 2.6 Mi 5.2 ^c 2.15 Os 11.1

rodesne wan ampu pashparuza, kuna asmin paas añokima, Belén p̄ipulurakas kasharuzakas piantana ininnara. Sun kima iza-
 ruzne, sun wat piantuzne, “paas año p̄innapain,” kizara.
 17 Suasne Jeremías kainammikane parat aizpa sunkana kirit:

18 “Akkwan ashampa tinta azamtuasmin,
 wan ashampane Rama p̄ipulukin miara.

Wan Israel ashamparuzne azara, uspa painkul akwa.

Uspa tayaltit akwa, minminkas usparuza
 kiwainnasachi,
 uspa painkultuz iarit akwa.”^d

Uspane Egipto suras kaiyantu

19 Herodes irawane, Joséne kainkizpanmizta Egipto sura.
 Suasne Anpatpa ángelne ussa izpan kit ka kaizta:

20 “Kuhs kit pashparakas paiña akkuhshtakas mil kit kail kit
 Israel surakima, pashpara piantashimtu iarit akwa.”

21 Suasne Joséne kutpat kit pashparakas paiña akkuhshtakas
 mil kit Israel sura kaiyara. 22-23 Arquelaone papihshkanain mi-
 kwa namiz kit Judea sura ininmizta. Usne Herodespa painkul
 azi. Joséne Arquelaowa sun piankam kit Judea sura in ishkwa-
 rit. Mamasa José kainkizpamtuasmin, Diosne ussa Galilea sura
 inka kizta. Galilea sura pianatpane, usne Nazaret p̄ipulura uzna
 irit. Dios kainammika parit aizpa sunkana kirit: “Awane ussa
 Nazaret p̄ipulukis atmika mun munanazi”.

Juane, pikin munnammikane, Dios pit kainanantu

(Mr 1.1-8; Lc 3.1-9, 15-17; Jn 1.19-28)

3 1 Sun payura Juane, awaruza pikin munnammikane, Ju-
 dea sura irit. Awa sun pul sura iakane, Juane usparuza
 Dios watsal pit kainanat 2 kit kaiznara: “U kwail kiarit aizpa
 maiztain, ma Dios awaruza ininnashimtu akwa. Diosne awa-
 ruza us kaizta aizpa mianapa akwanantu, au kwail kiamanpa.”

3 Namin Isafasne, Dios kainammikane, sunkana Juanpa parit:
 “Minpazha pul sura awaruza tinta kwinta kinat kit ka
 kaiznanazi:

“Uruzpain watsarain, Anpat kuruntu aizpa kianapa.

Une Dios iztakin nil uzarawa,” kizta.^e

^d 2.18 Je 31.15 ^e 3.3 Is 40.3



Juanne, kwazikasa munnammikane, inkalpara chamtu

4 Juanpa pīn kwara aizpa camello ashkasa sipta. Aya tit pija-kin kuhtit. Ittalkanakas mishkikas kwat. 5 Jerusalén pipuluras awakas wan Judea suras awakas wan Jordán pimakin uztuzkas puzat kit ussa mina aara. 6 Uspane uspa kwail akwa tayalat kit uspa kwail kiarit aizpa kaizara, Dios usparuza wat kulninnana-pa. Suasne Juanne usparuza Jordán pira munnanara.

7 Minpazha Fariseo awaruza kanpamtuzkas minpazha Sadeuceo awaruza kanpamtuzkas Juanta aara, usparuza munna-
napa. Aakane, Juanne usparuza kaiznara: “¿Une apkin aam-
tumakkiwas? Une kain pirail kaizmuruzkana mai. U kamta-
kana mai, sula kumtu akwa. U pit kaizamtu aizpa kamta pini-
nukana mai. Dios kwail kirittuza ilnamtu akwa, u kwail kiam-
tu aizpa chihkarain. 8 Dios uruza iltachasmin, u kwail kiarit
aizpa maiztawa, wan awa u Diosta kaiyarit piankamanapa.
9 Une ‘aumin Abrahampa kwal makpas’ kizamtu. Sun min-
ñamtu akwa, Diosne uruza sapnamanazi. Diosne sun katsa
ukksa Abrahampa kwal namninnashina. 10 Diosne uruza il-
nanapain. Mane une katsa tikanain izarit, pippa wakainka-
nain. Wan ti pippa wakainne, tit kit ĩnta kiain kit ĩn paktara-
wa. 11 U kwail kiarit aizpa Diosta kaizarawane, Dios uruza
wat kulninnarawane, nane uruza watcha pira kwazikasa
munna kinanash. Na uruza pira kwazikasa munnanamtukas,
mamazne nakin anza tinta anazi, sun pitmin kainanapa. Na

uruza pira kwazikasain munnanamtukana, usne paiña Sinam Izpulta inninnazi, ukasa tuanpa, uruza kiwainanapa. Uskas kwail kimtuza ilnanazi. Usne wan awakin anza tinta mikwa namtit. Na uskana tinta chi akwa, nane paiña kiwainmikakana namtit ish, us kaizta aizpa kin. Us kwisha wat akwa, nane ussa wat kiwainnapa piankamsachish. ¹² Usne tikasa chara aya kihshkul kit timkasa suninapain. Sunkanain usne awaruza kwail kiarit aizpa kiznanazi. Wat awaruzne wat chara pippakanain wanmaktat kit mamaz yalta watsanazi. Awa chara aya impaktamtukanain, Jesúsne kwail awaruza naizninnanazi. Sun ñne kwikain.” Sunkana Juanne Fariseo kam-pamtuzakas Saduceo kanpamtuzakas pilchashina.

Juanne Jesúsne kwazikasa munnamtu

(Mr 1.9-11; Lc 3.21-22)

¹³ Suasne Jesúsne Galilea suras puz kit Jordán pirakima piannara, Juan ussa munnapa. ¹⁴ Juan ussa munna kishitchi akwa, Juanne Jesúsne ka kaizta:

—Nune nawa munna kinatkin. Nu nakima amtukas, nane nua chinkas milasachish, kizta.

¹⁵ Jesúsne ussa ka sinkara:

—Mane nune nawa munna kinatpa, wan Dios aumiza kaizta aizpa kinpa. Suasne Juanne ussa pikin munnara.

¹⁶ Juan ussa kapal muntawane, Jesúsne piras puzta. Masain chiyu kai kultakane, Jesúsne Dios Izpulta izta. Sunne utkurukana chiyuras kihsh kit ussa taizta. ¹⁷ Suasne awane Dios chiyuras kaizka miara. Dios ka kaizta: “Anne ap painkul i. Ussa pashimtus. Uskasa kwisha warish,” kizta.

Satanásne Jesúsne kwail kininshimtu

(Mr 1.12-13; Lc 4.1-13)

4 ¹ Kwiztane Dios Izpulne Jesúsne pul sura milta, Satanás ussa kwail kininshik akwa, Dios ininta aizpa kimanpa.

² Jesúsne cuarenta payukima payuwarakas amtawarakas kwatchi. Kwiztane yak kimizta. ³ Suasne Diablone ustukin pianara. Ussa kwail kininshimtu akwa, ussa kaizta:

—Nu “na Dios Painkul ish” kiztune, suasne an ukkasa pan sari, kizta.

⁴ Jesúsne ussa sinkara:

—Diosne paiña pinkihta ka parit: “Awane kumirain kuat kit uzanazi. Kumira kwatkas, awane Dios pit para aizpa izarawa, an wat uzanapa.”^f

5 Suasne Diablone Jesústa Diospa pipulura, Jerusalén pipulura, mił kit iglesia yal mitmal kunninta. 6 Sua ussa kaizta:

—Nune “na Dios Painkul ish” kizta. Katmizna akkis pılainti, awa nua izat kit niykulanapa. Dios pinkihta ka parit:

“Diosne paiña ángeltuzza ininnanazi, nua kiwainanapa.
Uspane uspa chihtikasa nua sappaanazi,
mitti ukta kilmanpa.”^g

7 Jesúsne sinkara:

—Diosne pinkihtakas ka parit: “Up Anpat Diosta kwail kinpa kishininmun”.^h

8 Mamasa Diablone Jesústa katsa inkal izara mił kit chiwal watsal sura ussa anta. Ussa wan pãn sun suras iznintawane, 9 Diablone ussa kaizta:

—Nawa wakpuj waintane, nane nu iztu aizpa nua miłanash, kizta.

10 Suasne Jesúsne ussa kaizta:

—Satanás, nu akkis it. Dios pinkihta ka parit: “Anpat Dios-tain wakpuj waintawa, us kaizta aizpa kin. Mamazta wakpuj wainkain,” ka parit.ⁱ

11 Suasne Satanásne Jesústas paimpa irit. Sun urain ángeltuzne ussa kiwainnara.

Jesúsne Galilea sura paiña kal samiztu

(Mr 1.14-15; Lc 4.14-15)

12 Juanta kajchira siptit mirawane, Jesúsne Galilea sura kailta. 13 Nazaret pipulukis puztawane, Jesúsne Capernaum pipulura uzna irit. Sun pipulune pimamin uz. Sua Zabulón sukas Nafalí sukas kashain uz. 14 Diosne sun kinintit. Isaíasne, Dios kaimmimikane, ñamin ka pat kit kaizta:

15 “Zabulón suras awakas

Naftalí suras awakas Jordán pi kwakara, pãn
puzmuras, uzamtu.

Suane Judío awachiruzne Galilea pi kwakara
uzamtu.

^f 4.4 Dt 8.3 ^g 4.6 Sal 91.11-12 ^h 4.7 Dt 6.16 ⁱ 4.10 Dt 6.13

16 Diosta pianchi akwa, uspane tilkwilkinkana uzara.

Diosta piankamturuzne watsal kiarinazi, kaikinkana uzamtu akwa.

Ñamin irit awakanain uzarakas,

mane uspane kai kultit miwara chaamtu.”^j

17 Sun payuin Jesúsne kamtanamiz kit kaiznara: “Ayukta maiztain, an kwail kiamanpa, Dios awaruza mamin innashimtu akwa.”

Jesúsne ampara pishkaru immuruza akwanara

(Mr 1.16-20; Lc 5.1-11)

18 Galilea pimamin chamtuasmin, Jesúsne paas aimpishta izta. Mazane Simónkas Pedrokas muntit. Mamazne Andrés muntit. Uspane pishkaru pizmuruz azi. Uspa pira immu kiainpailmizta. 19 Suasne Jesúsne usparuza kaiznara:

—Kanpazhain, ap kammuruz namanapa. Ñamin pishkaruin pizpailta. Kawarain makis nane uruza innannash, mamaz awaruza kamtananapa, ap kammuruz namanapa.

20 Masain uspane uspa immu chihkat kit ussa kanpailta, kamanapa. 21 Ma pitchin imtuasmin, Jesús mamaz paas aimpishta izta. Uspane Santiagokas Juankas muntit. Uspane Zebedeowa painkul azi. Uspane paiña papihshkasa kanuara pishkaru sulmu putpailta. Jesúsne usparuza akwanara, uskasa wanmak kit in. 22 Masain uspane papihshta tuij it kit kanuaras kihsh kit ussa kanpailta.

Jesúsne akkwan awara kamtanamtu

(Lc 6.17-19)

23 Jesúsne wan Galilea suwara imiz kit wan Judío kammu yalta nap kit awara kamtanara. Usne Dios watsal pit kamtanara. Usne Dios awaruza innashimtu kamtanara. Wan inturuzakas wan ishturuzakas kakulninnara. 24 Siria sura uztuzkas Jesús pa piankamara. Uspane wan inturuzakas wan ishturuzakas wan naizaruzakas Jesús pakin karaara, Jesús usparuza kakulninnanapa. Saliz piztittuzakas ultu piztittuzakas chasachiruzakas ussa karaara, Jesús usparuza kakulninnanapa.

^j4.16 Is 9.1-2

25 Akkwan Galilea suras awane Jesús imtumal aara. Minpazha Decápolis pípuluras awane aara. Minpazha Jerusalén pípuluras awane aara. Minpazha Judea suras awane aara. Jordán pi kwakaras awakas, pān puzmumals, aara.

Jesúsne inkal izakis Dios pit kamtanamtu

5 ¹ Akkwan awa wanmakkarit iznarawane, Jesúsne inkal izara nut kit sua uzta. Paiña kammuruzne ussa wanmakkara.
² Usne paiña pit usparuza kamtanamiz kit sunkana kaiznara:

Minma watsal kultit mai

(Lc 6.20-23)

- 3** “Diosta piankamshimturuzne Dios kaizta aizpa kiat kit watsal uzanazi.
4 Awa tayalamtukas, Diosne usparuza wat kiwainanazi, tayalamanpa.
5 Na mamazkin an warish kiztuchimikane an watsal uznazi, Dios an sukin pa kin namta akwa.
6 Nil kishimturuzkas wat kishimturuzkas an watsal uzanazi, Dios pashimtu aizpa kiamtu akwa.



Jesús izakin awaruza kamtanamtu

- 7 Diosne mamaztuza kiwainmuruza kiwainnanazi, watsal uzanapa.
- 8 Ayukta kaijchura sinam sarittuzne an watsal kulat kit Diosta izanazi. Dios ayukta kaijchura sinam saninnamtu akwa, uspane an wat kulat kit Diosta izanazi.
- 9 Awaruza kalpain uzanapa paninturuzne kalpain uzanazi. Diosne usparuza ‘u ap pashparuz mai’ kiznanazi.
- 10 Awa nil uztuzakas Dios kaizta aizpa kintuzakas pizamtukas, awa usparuza kwail kiashimtukas, Diosne paiña ininturuza, paiña inintukin watsal uzninnanazi.
- 11 Une ap wat kanpamtuz mai. Mamaz awane na akwa ‘u kwail awa mai’ kizanazi. Awane na akwa uruza kwail kianazi. Uspane na akwa u kwail kiamtu pirail appanazi.
- 12 Sunkana uruza kinakane, watsal kiat kit watsal nijkultain. Diosne chiyura uruza watsal milam milananazi. Ñamin Dios kainammtuz uzasmin, awane kawarain usparuza naizninnara.”

Ñamkas impilkas

(Mr 9.50; Lc 14.34-35)

13 “Ñam ñara ñirane, ña pitkain. Une ñamkanain wat uztain, awa an kwail kiamanpa. Wat ñam chine, ñara kulkain. Tihwi. Ñam kultachine, kiakpintim, awa mitti kuliztinpa.

14 Une au sukin wat uztain, mamaz awara watsal kamtana- napa, watsal uzanapa. Une impil kai aitztukanain nil uzarawa, awa nil uzna piankamanapa. Pipulu malta uztane, wanne pipu- lura kai izanazi. Kulasachi. 15 Kawarain alampara puttane, tim ampal unanchi. Kancha alampara kwashta kantawa, wan awa tukin kai izanapa. 16 Kawarain une awa iztakin watsal uztain, awa u wat kiamtu aizpa izanapa. U wat kirit aizpa izarane, us- pane u Taitta Dios chiyuras kwisha wari kizanazi.”

Jesúsne Dios inintu aizpa wari kizta

17 “Une nawa nil minñamtuchi. Une Moisés kaizta aizpakas Dios kainammtuz kamtara aizpakas piankamamtu. Uspa kamta- ra aizpa kwaimanash. Nane apa arau, u wan Dios kaizta aizpa

watcha piankamanapa. ¹⁸Nane watcha kaiznamtus. Aune chiyura iztumakpas. Aune an sura uztumakpas. Chiyukas an sukas azain pailsachi. Kawarain wan Dios inintu aizpa pailmanazi. Paiña pitkas paiña kamtamkas pailmanazi, wan chiwal kinkima. ¹⁹Katmizna Dios inintu aizpa kimtuchimikane, Dios inintu aizpa kiman kamtamtumikane, Dios inintukin katsa awakana nammanazi. Dios inintu aizpa kimturuzkas mamaztuza sunkanain kinpa kamtamtuzkas, Dios inintukin an katsa awakana nammanazi. ²⁰Uruza kainanamtus. Une Moisés kaizta aizpa kamtamtuzkinkas Fariseo awakinkas an watsal uzarawa. An watsal uzamtukine, une Dios inintukin nappasachi.”

Mamazta aliz kultane, kwail i

(Lc 12.57-59)

²¹“Une ñamin uztuza kamtanara aizpa miara. Usparuza ka kiznara: ‘Mamazta piantaman. Minpazhara piantaritmikane katsa mikwara kwail ilninna itpa,’ kiznara.^k ²²Sunkana nain kaiznamtus: aimpishhkasa pilchapuztumikane mikwara ilninna itpa. Minpazha aimpishhta kwail pit parakane, katsa mikwara ilninna itpa. Minpazha aimpishhta nune ‘timpa i’ kiztamikane ñnta irishina.

²³Sunkana kirain. Diosta chiwazha milam milamtuasmin, aimpishhta kwail kirit nijkulkane, up milan milkain. ²⁴Kancha up milan milamtukin tuij itpa. An ñancha aimpishhkasa wat kultawa. Up aimpishhkasa wat kultawane, suasne kailtawane, up milan Diosta milatpa.

²⁵Minpazha nu kwail kirit kizkane, katsa mikwara imtuasmin, nune azain nu kwail kirit kizmumikakasa nijkultawa, izmuruz namanapa. Katsa mikwane nua policíara ininshina, kajchira sipninna. ²⁶Watcha kaiztus. Suain kajchiras puzsachi, nu wan pial tanakima.”

Jesúsne mamazpa ashampara sanachi kurunnamtu

²⁷“Une ñamin uruza kamtara aizpa miara. Uruza ka kiznara: ‘Mamazpa ashampara sanachi,’ kiznara.^l ²⁸Sunkana nane uruza kaiznamtus. Minpazha ashampara iztane, ashampara sashimtu mintane, usne me ashampara piz kit saritkana uztu.

^k 5.21 Éx 20.13; Dt 5.17 ^l 5.27 Éx 20.14; Dt 5.18

29 Mane nune kasu waj. Minpazha kwail aizpa kin iztumikane sunpa kwail kin min kit kwail kishina. Chinkas kwail aizpa kin izman, kwail minmanpa, kwail kishimanpa. Kasukasa kwail izturuzkas kwail kishimturuzne ñnta ianazi. Katmizna kwail aizpa kin izman, ñnta iamanpa. **30** Awane chihti waj. Awane uspa chihtikasa kwail kiashina. Chihtikasa kwail kishimtuzne maizarawa, uspa chihtikasa kwail kiamanpa. Paiña chihtikasa kwail kishimtumikane ñnta irinazi.”

Jesúsne ampu ashampawa mijmikasha kamtamtu

(Mt 19.9; Mr 10.11-12; Lc 16.18)

31 “Sunkas une ñamin uruza kamtara aizpa miara. Usparuza ka kiznara: ‘Minpazha paiña ashampara kwairane, kwaina pinkih pat kit ussa chihkatpa,’ kiznara.^m **32** Me nain mamaz tuntu uruza kurunnamtus. Minpazha ashampa mamaz ampukasa pitachimikasha kwairane, usne ashampara kwail kinintu. An ashampane mamazkasa uztinazi. Minpazha ashampa kwairitmikakasa kasara kimtune, uskas kwail kimtu.”

Sun kin namtu aizpa

33 “Sunkas une ñamin uruza kamtara aizpa miara. Uruza ka kiznara: ‘U anpat iztakin sun kin namta aizpa maintachin kiara-wa,’ kiznara.ⁿ **34** Me nain mamaz tuntu uruza kurunnamtus. Kwinta kimtuasmin, nil pit paraarawa. Kain pit kaizman. Chiwazha kin namtuasmin, chiyura nu kaizta aizpa mina akwanchi. Chiyura akwatne, nune Diosta akwantu, nu kaizta aizpa minapa. **35** Chiwazha kin namtuasmin, au sukin nu kaizta aizpa mina akwanchi. Sun au sura kaiztane, nune Diosta, paiña su inintukin, akwantu. Jerusalén pipulura nu kaizta aizpa mina akwanchi. Jerusalén pipulura akwatne, Jerusalénpa katsa mi-kwasha nu kaizta aizpa mina akwantu. **36** Chiwazha kin namtuasmin, up kizpukasa sunkana kin nammun, up tilkaya ash putchã ash chikninsachi akwa. **37** Nune ‘watchain’ kaizti. ‘Watcha chine, watcha chi’ kizti. Mamaz tuntu pit kaiztane, nune Diablo pit kaiztinazi.”

^m 5.31 Dt 24.1 ⁿ 5.33 Lv 19.12; Nm 30.2

Mamaz nua kwail kitne, puija kiman

(Lc 6.29-30)

38 “Sunkas une ñamin uruza kamtara aizpa miara. Uruza ka kiznara: ‘Kasukin kizmumikane kwarain kizmumikawa kasu uk-tawa. Sulakin kizpianmumikane kawarain sula kizpianmikawa sula uktawa.’^o 39 Sunkana nain uruza kurunnamtus: Nua kwail kiritmikasha puija kwail kinchi. Maza nua matsihkin kuzkane, mamazpa matsihkin kuzshina pianninti kizti. 40 Minpazha mi-kwasha up kamisha uknapa ininkane, isal kwam kamishakas us-sa milatpa. 41 Minpazha nua maza kilómetro kakwakima kwana ininkane, nune kutña kilómetrokima itpa. 42 Minpazha chiwazha paikukane, milatpa. Minpazha chiwazha nua nampizkane, nammilatpa, kaiztachin.”

Aliztuza wat kultawa

(Lc 6.27-28, 32-36)

43 “Sunkas une ñamin uruza kamtara aizpa miara. Uruza ka kiznara: ‘Izmuruza pashinarawa. Aliztuza aliz kultawa,’ kizara.^p 44 Me nain mamaz tuntu uruza kurunamtus. Aliztuza pashinarawa. Uruza kwail kimtuz akwa Diosta paikwatpa. 45 Sunkana kitne, une chiyura Taitta pashparuzkana uzanazi. Diosne kwail awaruzakas wat awaruzakas pñn malninamtu. Usne wat kimtuz surakas nilchi kimtuz surakas alu kinintu. 46 U uruza pashimtuzain pashinarakas, une uruza pashinamtuchiruzza pashinarawa, Dios uruza chiwazha milanana. Kwail kimtuzne usparuzza pashinamturuzakas pashiamtu. 47 U izmuruzain ‘wat kintire’ kiznarane, une Diosta pianchiruzkana uzamtu. Diosta pianchiruzne usparuzpain kawarain kiamtu. 48 U chiyuras Papihshne chinkas kwail kit chi. Kawarain u chiyura Papihshne uzukanain watsal uz kit watsal kirain.”

Jesúsne watsal kal kinpa kamtanamtu

6¹ “U mamaz awa akwa watsal kal kikane, sun kal awa iztakin kinchi. Sunkana awa iztakin kitne, u chiyuras Papihshne uruza chinkas milanamanazi.

2 Katmizna we mijtuza kiwainamtune, u kiamtu aizpa minpazhara kainanachi. Awa iztakin an katsa namshimtumikane

^o 5.38 Éx 21.24; Lv 24.20; Dt 19.21 ^p 5.43 Lv 19.18

awa wanmaktukinkas awa pianamal chamtukinkas kianazi, mamaztuz paiña watsal kal kimtu aizpa izanapa, mamaztuz nua watsal kal kirit kizanapa. Uspane chiwazha milam me sapparit, awa uspa wat kiarit kizara akwa. ³We mijchiruzza kiwainamtune, minainkas u wat izmuruzakas kainanachi. ⁴Mamaztuza kiwainamtune, puintain kitpa. U chiyuras Papihsh u puintain kiarit aizpa iztane, usne uruzza chiwazha milam milanazazi.”

Jesúsne Diosta paikwan kamtanamtu

(Lc 11.2-4)

⁵“U Diosta paikuamtune, awa iztakin an katsa namshimtu-mikakana Diosta paikwanchi. Uspane awa Judío kammu yal-kinkas pianamal awa wanmakkamtukinkas kunamtu, awa usparuzza izanapa. Watcha kaiznamtus. Sunkasane uspane me wan milan mij. ⁶Sunkana nu Diosta paikwantune, kalmal nap kit pijta sip kit up chiyuras Papihshta paikwatpa. Usne nukasa tu. Up chiyuras Papihshne nu puintit paikwantu aizpa mit kit nua paiña milam milanazazi.

⁷Nu Diosta paikumtune, Diosta pianchiruzkana paikwanchi. Uspane akkwan kain pit kwinta kiamtu. Akkwan pit kwinta kiamtune, uspane Dios usparuzza mimtu minnamtu. ⁸Uspakana kiamtu aizpa kinchi. Paikwatchasmin, u chiyuras Papihshne u we mij aizpa me pian. ⁹Katmizna une sunkanain Diosta paikwarain:

‘Nune au chiyura Papihsh i.

Nu sinammika akwa, awane nua wakpuj wainñashina.

¹⁰Apa anka, awaruzza ininnana.

Chiyura uztuasmin, nune wanta watsal ininta.

Kawarain au sura uztuzakas at kit wan watsal ininti, apain nu kishimtu aizpa kianapa.

¹¹Payu aizpa au kumira we mij aizpa kwinanaka.

¹²Au kwail kiamtu aizpa sinam sananaka.

Aune aumiza kwail kittuza wat kulshinamakpas.

Kawarain nune au kwail kiamtu aizpa sinam sanaka.

¹³Aumiza kiwainchain, kwail kiamanpa.

Awara kwail kininmika aukin akane,

aumiza watsat milnanaka, kwail kiamanpa.

Nuin wanta ininnamtu. Nuin anza tintamika i.

Nuin an watsal iznazi, pailta payukima. Pailtu.’

14 U uspa kwail kiarit aizpa wat kulnarane, kawarain u chiyuras Papihshkas u kwail kiarit aizpa wat kulninnanazi. 15 Minpazha mamazpa kwail kiarit aizpa wat kultuchine, kawarain u Papihshne u kwail kiarit aizpa wat kulmanazi.”

Dios akwa pala kwatchin chan

16 “Dios akwa kumtukine, tayal kit chanchi. Une wat iztit awakana uzman. Uspane tayal kit matsih kittachi chaamtu, awa uspa kuamtuchi izanapa. Nane watcha uruza kainanamtus. Uspane uspa milam mij me. 17 Kancha Dios akwa kwashimtukine, matsih kit kit watsal ularawa, 18 awa u Dios akwa kumtuchi izamanpa. U chiyuras Papihsh u kuamtuchi piankamnazi. U Papihshne, wan kularit aizpa izmumikane, Dios akwa kumtuchimikasha chiwazha milam milanazi.”

Awa chiyura kwazpa kulnintu

(Lc 12.33-34)

19 “Au sukinne kwazpa kulshiman. Kiriyune au sukin pin titu. Apane wan pittimtu. Apane walkumkas nap kit walkuamtu. 20 Une chiyura kwazpa kulnintain. Suane kiriyune pin titmanazi. Suane chinkas pitkain. Suane walkumkas walkwan napkain. 21 Chiyurain wa aizpa pashimturuzne chiyurain wa aizpa minnat kit pashianazi.”

Kasune impilkana i, awa kai izanapa

(Lc 11.34-36)

22 “Kasu izkultane, awane kai izamtu. Kawarain kai iztamikane, wat kimtumikane, wat aizpa piankam kit wan wat kal nil kinazi. 23 Kasu kai iztuchimikane mimtuchimikakana i. Suasne sun awa chiwazha watsal kal kisachi. Wat mirachimakane tilkwil chamtumikakana chanazi, wat kin pianchi akwa.”

Dioskas pialkas

(Lc 16.13)

24 “Minminka paas anpatta kiwainasachi. Maza anpatta pashitne, mamazta pashimanazi. Maza anpatta kiwainshitne, mamazta kiwainasachi. Kawarain pialmin pashitmikane sun urain Diosta pashimanazi.”

Diosne paiña kwalta kiwainamtu

(Lc 12.22-31)

25 “Katne, nane uruza kurunamtu. Apa uzamtuasmin, kumira kwan kawa minman. Kwazi kwan kawa minman. İmtura kamisha kwana kawa minman. Awa akkwan kumira mijkas, nil uzna an wari. Awa wat camisha kwakas, nil uzna an wari. Sun-tuz mijchikas, ishkuman, Dios uruza iznamtu akwa. 26 Chitchu isalpara iztain. Chitchuruzne pippa wakain. Pippa pakkain. İranchura pippa watsakain. Sunkana u chiyuras Papihshmin uspa kumira kwınamtu. Diosne chitchukin uruza anza wat kwınanazi, u chitchukin anza tinta mai akwa. 27 An katsa kawishımtu-mikane paas kwajta an aks kawısachi.

28 U we mij aizpa kawa minñamtuasmin, u pñmin akwa mintakiwa. Sun ĩnkal wishta iz kit piankamtain. Wish kal kıkainkas, pñnkas sipkainkas, wishne watsal iztit. 29 Salomónne, katsa ĩnımmikane, paiña watsal pñn kwaksham kwaara. Mane an kainanamtu. Wishne Salomónpa pñnkin anza watsal iztit. 30 Diosne wish kwıznıntu, watsal iznapa. Maza payura wish chıktakas, wishne mamaz payura it kit pıt kit impaktım. U Dios-ta we nıjkulamtuas, Diosne mama uruza an wat kwıra kınamtu. 31 Katmızna ishkuman. Kumira we mijkas, ¿Chima kuwıznapai? kawa mımanachi. Pñn kwaam we mijkas, ¿Chima kwaan ĩpai? mımanachi. 32 Diosta pianchıruzne sunmin min kit pašıamtu. U chiyuras Papihshne u we aizpa wan pian. 33 Katmızna une an ñancha Diosta paikwarain, Dios uruza paiña iztukin ĩnınnanapa. Suasne Diosta paikwatpa, uruza paiña uztukin nil namnınnanapa, watsal uzanapa. Kwıztane Diosne u wenamtu aizpa uruza mılananazi. 34 Pailta payu awane akkwan tuntu kal kiarawa. Up kal tilwara kishımtu aizpa kawa mıntuasmin, sun kalpa tilawara mıntawa. Katmızna ma payu sun kalpa naızman.”

Katsa ti kasura naptu

(Lc 6.37-38, 41-42)

7 ¹ “Une mamazta kwail kirit kıznachi, Dios uruza kwail kiarit kızmanpa. ² Sun akwa nu mamazta nu kwail kirit kıztane, Diosne sunkanain nua kwail kirit kıznazi. Nu mamazpa kwail kirit mıntane, Diosne sunkanain nu kwail kirit mınnazi. ³ Aınki pak aımpıhshpa kasura naptane, usne kai ızsachi. Ñana

tí up kasura naptane, nune izmanazi. Kawarain akkwan kwail kimtumikane we kwail kimtumikasha nu kwail kirit kizsachi. ⁴Katsa tí up kasura waasmin, nune aimpishpa ainki pak paiña kasura naptit aizpa uksachi. ⁵Nu wat awakanain namtit chamtukas, nune maiztachi. An ñancha up kasuras katsa tí uktawane, suasne nune kai izshina, aimpishpa ainki pak kasuras ukna. Sunkana kamtanamtus: Nune Diosta paikwatpa, Dios up kwail wat kulnapa. Kwizta nune mamazta kiwainanazi, Dios usparuza wat kulnapa.

⁶Une mishimtuchiruzo Dios watsal pitpa kaiznaman. Uspane aliz kwizakanain uruzo kwashina. Une mishimtuchiruzo Dios pitpa kaiznaman. Uspane kuzukanain mai. Uspane wanta mitti tat kit kulamtu.”

Paikwat kit sait kit pijtara tak tak kitpa

(Lc 11.9-13; 6.31)

⁷“U we aizpa Diosta paikwarain. Usne u wenamtu aizpa milananazi. U we aizpa sairain, wanmalna. Diosta akwarain. Pijta-kin tak tak kimtune, Diosne pijtakin chihtnanazi. ⁸Paikwatmikane sapnazi. Saimtumikane wanmalnazi. Pijtakin tak tak kikane, us akwa pijta chihtnanazi.

⁹Papishshne painkulta kwira kinazi. Painkul kumira paikukane, papishshne uk kwinmanazi. ¹⁰Painkul pishkaru paikukane, papishshne kamta kwinmanazi. ¹¹U kwail kiamtukas, une chiwazha wat milam aizpa pashparuza kwinnashina. Up chiyuras Papishshne paikumtuza an akkwan watsal milam kwinnanazi.

¹²Awa uruzo kiwainakane, une watsal uz. Kawarain une mamaztuza kiwainnarawa. Mamaztuza kiwainnarane, une Moisés kaizta aizpakas Dios kainammika para aizpakas kiamiznazi.”

Sip pijtain

(Lc 13.24)

¹³“Au sura uztuasmin, sip pijtakimin naptain, nil miwara inpa. Kancha mamaz aiz pijta wa. Aiz pijta naptawane, akkwan awane sun aiz miwara ñtakima iamtu. ¹⁴Sip pijta wa akwa, pinmal mi akwa, awane sun sip mira sayasachi. Akkwanchi awaruzne chiyura uzna nuasachi.”

Tine paiña pippa wam

(Lc 6.43-44)

15 “Une kwail kamtamtuzá kwiraruin cha izanaka, uspa kamtamtú aizpa miamanpa. Uspáne wat awakanain izat kit u uzkin wanmakkanazi. Wat awa makpas kizamtukas, uspane pí-rail appat kit wan awara kwail kininnanazi. 16 Une kwail kamtamtuzá piankamanazi, uspa kwail kiamtu akwa, watcha kamtamtuchi akwa. Kawarain tirinul pu tittas pakkain. Wankail tí pippa pu tittas pakkain. 17 Sunkanain wat tine wat pippa wam. Kwail tine kwail pippa wam. 18 Wat tine kwail pippa wakain. Sunkanakas kwail tine wat pippa wakain. 19 Wan tí wat pippa wakainne, kwat kit ínta paktam. 20 Kawarain une kwail kamtamtuzá piankamanazi, uspa kwail kiamtu akwa.”

Wanne Dios inintukin nappamanazi

(Lc 13.25-27)

21 “Wan nawa ‘ap anpat’ kizmuruzne Dios inintukin nappamanazi. Chiyuras Papihsh kaizta aizpa kinturuzne nappanazi. 22 Sun payu taizkane, akkwan awane nawa ka kizanazi: ‘Ap wat Anpat, aumiza mizhain. Nua akwantuasmin, aune Dios watsal pit kainaramakpas. Nua akwantuasmin, aune awaras saliztuzá inintamakpas. Nua paikwantuasmin, aune akkwan iztasparit kal kitmakpas,’ kizanazi. 23 Suasne nane uruza sinkanat kit sunkana kaiznanash: ‘U nawa nijkularachi akwa, nakis paimpa irain. Une pailta payukima kwail kiarit,’ kiznanash.”

Paas tuntu yal samtu

(Mt 1.22; Lc 6.47-49)

24 “Katmizna wan na kaizta aizpa miraruzkas na ininta aizpa kintuzkas wat mímTURUZKANA mai. Usne, yal samtumikane, ukkin sara, nainmanpa. 25 Katsa alu kimizkane, pí kulmiz kit tinta inkwa pamizta yalkin. Sunkana yalne naintachi, ukkin yal sarit akwa. 26 Na kaizta aizpa mímTUCHIMIKAKAS na ininta aizpa kintuchimikakas tímpa awakana i. Usne pí ksukin yal sammikakana i. 27 Katsa alu kimízTAWANE, pí kulmiz kit tinta inkwa pamizta yalkin. Suasne pí wan kwara. Wan karit.”

28 Jesús wan kapal kamtarawane, wan awane us kamtara aizpa iztasparit. 29 Usne Moisés parit aizpa kamtamtuzkana kamtanarachi. Usne mikwakana tinta kamtanara.

Jesúsne aya pítítmikasha namtamtu

(Mr 1.40-45; Lc 5.12-16)

8 ¹ Jesús izaras kihshkane, akkwan awane ussa kanpaara. ² Aya pítítmikane Jesússta kasha at kit Jesús iztakin wakpuj wain kit ka akwara:

—Anpat. Ap ña ishtu nawa namtashitne, namtazha, kizta.

³ Suasne Jesúsne paiña chihtíkasa ussa pat kit ka kaizta:

—Watcha, nane nua namtashimtus. Me namtít, kizta.

Sun kizkane, usne aya pítítmikara wat namnintít. ⁴ Jesúsne ussa kaizta:

—Miri. Nu wat parít aizpa minainkas kainamman. Na kaiztu aizpa kitpa. Judío pariyara it kit Moisés milan ininta aizpa milatpa. Sun kitpane, wan awane nu wat namtít piankamanazi.

Jesúsne suldaruwa kiwainmikasha namtamtu

(Lc 7.1-10)

⁵ Jesús Capernaum pipulura piannakane, Romano suldaru ininmikane Jesússta at kit ka akwara:

⁶—Anpat mizha. Ap kiwainmumikane ap yalta kamara ishtu tui. Anne chasachi, kwisha ishtu akwa. Usne kwisha naiztu, kizta.

⁷ Jesúsne ussa ka kaizta:

—Nane inash, ussa namtana, kizta.

⁸ Ininmikane ussa ka sinkara:

—Anpat mizha. Nane wat awakana chish, nu ap yalta napnapa. Ap kiwainmumikawa namtari kizkane, usne watcha namtít kirinazi. ⁹ Kawarain ap mikwane nawa inintu. Nakas aptuza ininnamtus. Mamazta “it” kizkane, usne im. Mamazta “anka” kizkane, usne am. Ap kiwainmumikasha “chiwazha kinpa” inin-kane, kim. Katmizna nu ap kiwainmumikasha wat namtít kizkane, nane us wat namtinazi pianish.

¹⁰ Us kaizta aizpa mirawane, Jesúsne iztaspat kit ussa kanpamtuza kaiznara:

—Watcha kaiznamtus. An ampune Diosta wat nijkultu. Minminkas Israel awaruztas sunkana nijkulamtuchi. ¹¹ Nane uruza kaiznamtus. Akkwan Israel chi awane pãn puzmuwaraskas pãn payapmuwaraskas Dios inintukin piannanazi. Israel awaruz pianamtuchasmin, uspane an ñamin wanmakkanazi. Abraham-

kasakas Isaackasakas Jacobkasakas uzat kit kuanazi. **12** Israel awaruzne, an ñancha akwattuzne mizurainkas Dios inintukin nappamanazi, nijkularachi akwa. Tilkwila ininnarawane, uspane azat kit sula sit sit kianazi, naizamtu akwa.

13 Suasne Jesúsne ininmumikasha kaizta:

—Up yaltain inka. Nu nijkulta aizpa sunkana kirit.

Sun urain paiña kiwainmumikane kakultit.

Jesúsne Pedrowa ashampawa akkuhsh kakultamtu

(Mr 1.29-31; Lc 4.38-39)

14 Jesúsne Pedrowa yalta it. Suane usne Pedrowa suegrara kamara tu izta. Imu piztít tuazi. **15** Jesús paiña chihtíkasa ussa pizkane, imu kanintít. Usne kuhsak kit chiwazha kumira usparuza kumira kwinnamizta.

Jesúsne akkwanta kakulninnamtu

(Mr 1.32-34; Lc 4.40-41)

16 Tilparikane, awane Jesús tugin akkwan saliz piztittuza karaara. Jesúsne maza pit kaizkain salizta puzninnara. Wan inturuzakas kakulninnara. **17** Diosne sun kinintít. Isaías kainammikane ñamin ka pat kit kaizta: “Usmin au ishtu aizpakas au naiztu aizpakas kaninta,” kizta.^q

Jesústa kanpashimtuzne sun kirain

(Lc 9.57-62)

18 Jesúsne akkwan awara iznara. Jesús tugin kasha aakane, Jesúsne paiña kammuruza pi kwakara ininnara. **19** Suasne Moisés kaizta aizpa kamtammikane at kit Jesústa ka kaizta:

—Anpat miri. Nane nua kanpashimtus, minta ikwarakas up kammumika namna, kizta.

20 Jesúsne ussa sinkara:

—Inkal kwizane paiña yal kul mij. Chitchukas yal mij. Nane ampu namtítmika ish. Sunkana nane minta kwaizkulna mijchish. Minpazha nawa kanpashitne, nane an sukin chinkas ussa kin namsachish.

21 Mamaz kanpammikane ussa kaizta:

^q8.17 Is 53.4



Tinta inkwa kanuara nupaintu

—Anpat miri. Ap taitta irikane, nane an ñancha ussa kamna inash. Ussa kamtawane, kwiztane nua kanpanash, kizta.

22 Jesús ussa sinkara:

—Ma kanpazha. Diosta pianchiruzne awa iritkain uzamtu. Diosta pianchiruzne irittuza kamarinazi.

Jesúsne inkwa kanintu

(Mr 4.35-41; Lc 8.22-25)

23 Jesúska paiña kammuruzkas kanuawara waat kit iara.

24 Masain tinta inkwa pamizta. Pine kanuara unainapain parit.

Jesúsne pittit tuazi. 25 Suasne kammuruzne ussa kasha aat kit ussa izkulnin kit ussa kaizara:

—Anpat mizain. Aumiza watsat milchain. Aune kanua pi unainapainmakpas, kizara.

26 Usne kaiznara:

—¿Une chikishma katne ishkuspas? Une nawa wat nijkul-
amtuchi, kiznara.

Suasne usne kuhsak kit pirakas inkwarakas kaizta: “Inkwa pamun. Pi kialmun.” Suasne inkwakas parachi. Pikas kalpain parit. 27 Kanpanaruzne iztaspaat kit kaizara:

—¿Usne minma kasa? Inkwakas pikas us kaizta aizpa miam-
tu, kizara.

Salizne paas awara pizta

(Mr 5.1-20; Lc 8.26-39)

28 Jesús pi kwakara, Gadara sura, piannakane, paas ampune pantióntas puzpail kit ussa kasha pianailta. Saliztuzne paasta pizarit. Paasas kwisha aliz warain. Minminkas sun miwara pin-sachi. 29 Jesústa ka kwianmizpailta:

—Nune Dios Painkul i. ¿Aumiza chima kishimtus? ¿Nune aumiza an ñancha naizninna amas? Ma payu narit payu chi, kiz-pailta.

30 Kashain akkwan kuzuruzne kuamtu pura. 31 Saliztuzne Jesústa ka paikwara:

—Aumiza puznintane, kuzura ininchain, kuzura piznapa, kizara.

32 Jesúsne kaiznara:

—Sua irain, kiznara.

Jesús saliztuza puzninkane, saliztuzne kuzura pizara. Uspa-ruza piznarawane, masain wan kuzuruzne izaras pirakima azain kihshat kit pira iat kit pi kwaarit.

33 Suasne kuzu izmuruzne ishkuat kit pipulura azain iara. Pianarawane, uspane uspa izaras aizpa awaruzas kainanamizta. Saliz puznintuzpa kainanamizta. 34 Suasne akkwan pipuluras awane Jesús tukin iara. Sua pianarawane, uspane Jesústa pai-kuara, uspa sukis inpa.

Jesúsne chasachimikara kakulnintu

(Mr 2.1-12; Lc 5.17-26)

9¹ Suasne Jesúsne kanuara waat kit pi kwak kit paiña pipulu-
ra piannarit. 2 Sua uspane chasachi intura kamara tukin ip-
tit muaara. Chasachi intura karattuza iznarawane, Jesúsne uspa
wat nijkulamtu piankam kit intura kaizta:

—Ap painkul miri. Tayalmun. Nane nu kwail kit aizpa me
wat kultit, kizta.

3 Suasne minpazha Moisés kaizta aizpa kamtamtuzne uspa-
rupain ka minñara: “Sun ampune paiña pitkasain Diospa kwail
kiztu.” 4 Jesúsne uspa minñamtu aizpa piankam kit usparuzas
mimanara:

—¿Une chikishma katne kwail minñamtuas? 5 ¿Chikishma
katne na kimtu aizpa mimampusas? “Nane paiña kwail kit aizpa
wat kulshinas. Kawarain paiña kamakis kuhsninshinas.” 6 Nane

uruza na kimtu aizpa annanash, ampu namtĩtmika an sukin inintu piankamanapa. Nakas paiña kwail kirit aizpa wat kulninishinas. Nane au su uztuza ininshinamtu, kiznara. Suasne Jesúsne chasachi intumikara kaizta:

—Kuksak kit up kama mĩl kit up yalta irinka.

7 Chasachi intumikane kuhsak kit paiña yalta irit. 8 Awa sun kirit aizpa izarawane, uspane ishkuamizta. Dios an ampura watsal kal kinpa kiwainta akwa, uspane Dios kwisha wari kizara.

Jesúsne Mateora akumtu

(Mr 2.13-17; Lc 5.27-32)

9 Miwara imtuasmin, Jesúsne maza awara, Mateo muntitmikara, izta. Usne Roma gobierno pial sapmu yalkin kal kimtuazi. Ustukin piannakane, Jesúsne ussa kaizta:

—Nawa kanpazha, ap kammumika namnapa.

Suasne Mateone kuhsak kit ussa kanpara. 10 Sun payu Jesúska paiña kammuruzkas Mateowa yalta kwan iara. Akkwan Roma gobiernowa pial sapmuruzkas mamaz kwail kimtuzkas piannaara,



Awa chasachimikara
milamtu

uspakasa kwan. Judío inintuzne “uspa kwail awa mai” minñara, Judío awa ininta aizpa miarachi akwa. ¹¹Fariseo awa sun izarawane, uspane Jesústa kanpamtuza ka mimaara:

—¿Chikishma up kamtam pial sapmuruzkasakas mamaz kwail kimtuzkasakas kumtu? mimanara.

¹²Sun mirawane, Jesúsne kaiznara:

—Nane tuttulkana ish. Kwail kimmikane ishtumikana i. Imtuchiruzne tuttul pashikain. Imtuin tuttul pashimtu. ¹³An watsal pit para aizpa piankamtain. Sun pit an ñamin Dios pinkihta ka parit: “U wakara piantana karamtukas, nane sun milam pashitchish. Mamaztuza kiwainna an wari,” ka parit. ^rNane wat awa makpas mintuzne akwanamtuchish. Nane kwail kiarittuza akwanamtus, kwail kiarittuza wat kulnana.

Dios akwa pala kwatchin cha


(Mr 2.18-22; Lc 5.33-39)

¹⁴Juan munnammikawa kammuruzne Jesústa iat kit mimaara:

—¿Chikitma up kanpamtuzne Dios akwa pala kwatchin payura kuamtu? Uspa akwa impa chi. Aukas Fariseo awakas pishita payu kuamtuchimakpas. Au akwa impa, kizara.

¹⁵Jesúsne sinkanara:

—Kasara pishtakin akwattuzne kasara kimtumika akwa talyalamtuchi. Usne usparuzkasa tuasmin, uspane kuamtu. Impachi. Kawarain ap kammuruz nakasa purasmin, uspane kuamtu. Impachi. Mamaz payura ap izmuchiruzne nawa pizara. Nane apain tuamanash. Sun payu taizkane, ap kammuruzne tayal kit kuamanazi. ¹⁶Nane masas kamtam uruza kamtananamtu. Hlapawa kamtamkanachi. An masas kamtam mimitumikane ilapawa kamtam mikain. Paasas kamtam kiasachi. Sunkanain minminkas pitta pinta yalsachi masas pinkasa. Masas pinkasa yaltane, masas sipparawane, pittit pinne an pihsharim. ¹⁷Sunkanain masas chappi pitta ayara ultuchi, sulnapa. Masas chappi pitta aya-



Kuzu aya vinokasa

^r9.13 Os 6.6

ra ultane, chappi sulkane, ayane pihshat kit chappi puz kit wan karinazi. Katmizna sultachasmin, masas chappi masas ayara wintawa, chappi sulnapa, paasas kamanpa.

Jairowa pashukas imtu ashampakas

(Mr 5.21-43; Lc 8.40-56)

18 Jesús sun kiznamtuasmin, Judío ininmikane ussa at kit us tukin wakpuj wain kit kaizta:

—Ap pashune mamin ire. Nu at kit up chihtikasa ussa parane, usne kakul kit mamasa uznazi, kizta.

19 Jesúsne kuhsak kit uskasakas kammuruzkasakas iamizta. 20 Suasne maza intu ashampane Jesús tukin it. Doce añokima paiña aimpi pulparachi akwa, usne kwisha naizta. Jesús pa kwizpa at kit Jesús pa kwaksham puntakin paara. 21 Usmin ka minta: “Paiña p̄nta paarane, wat paakwarakas,” minta.

22 Jesúsne puij chat kit ashampara iz kit kaizta:

—Ashampa mizha. Tayalmun. Nu nawa wat nijkulta akwa, nu wat pari, kizta.

Ashampane sun urain wat parit.

23 Judío awa ininmikawa yalta piannakane, Jesúsne akkwan kanta usamturuzakas akkwan azamturuzakas iznara. Uspane aat kit pashpara izara. Ussa watsat taara, kamna inpain. Usne kaiznara:

24—Akkis puztain, nimpish ashampa irachi akwa. Pittit tui, kiznara.

Sun miamtuasmin, uspane Jesús ta ishanara. 25 Awaruza puzninnarawane, Jesúsne kalmalta nap kit nimpish ashampawa chihti pizta. Suasne usne kuhsak kit kunta. 26 Wan awane sun sukin Jesús kit aizpa piankamara.

Jesúsne paas izsachiruza izkulnintu

27 Suas puztawane, paas kasu izsachiruzne ussa kanpail kit ussa tinta kwianpailta:

—Aumiza mizhain. Davidne up antikwa pampawa papish ara. Nu mikwa Davidpa kwal akwa, nu Diospa niritmika akwa, aumiza kiwainchain, kizpailta.

28 Jesús yalkin napkane, paasas kasu izsachiruzne us tukin ailta. Jesúsne usparuza ka mimara:

—¿U nawa nijkultukiwas. Na uruza izkulninshinaki?

Uspane kaizpailta:

—Watcha, Anpat. Aune nua nijkultuas, au paikumtu aizpa kinpa, kizpailta.

29 Suasne Jesúsne uspa kasura paat kit kaiznara:

—U nawa nijkultu akwa, une masain wat izashinai.

30 Uspa kasune izkulpailta. Suasne Jesúsne “sun kit aizpa minainkas kainanamun,” kizta.

31 Tas puzpailtawane, uspane wan awaruza Jesús uspa akwa kirit aizpa kainanamizta.

Jesúsne paramtuchimikasha paranintu

32 Kasu izsachiruz puzpailkane, minpazha Jesússtugin aara. Uspane saliz piztít parasachimikasha karaara. **33** Jesús salizta puzninkane, parasachimikane, paramizta. Awane iztaaspat kit kaizara:

—Aune Israel sura mizurainkas sunkanane iztakimakpas.

34 Fariseo awane ka kaizamizta:

—Salizpa katsa mikwane Jesússta kiwaintu, mamaz saliztuza puzninnanapa, kizara.

Jesúsne awaruza kiwainashimtu

35 Jesúsne wan ainki pipulurakas wan katsa pipulurakas chamizta, Judío kammu yalkin kamtanana. Usne Dios watsal pit kainanara, awa Dios inintugin uzanapa. Usne wan inturuza-kas wan ishturuzakas kakulninnara. **36** Wan awaruza iznamtuasmin, Jesúsne usparuza kiwainashira. Uspane kwisha tayalat kit kwaizarit. Uspane pirikukana chaamtu, izmumika mijchin. **37** Suasne Jesúsne paiña kammuruza kaiznara:

—Akkwan pippa pakna wakas, akkwan kal kimtuzne purachi. **38** Katmizna pakmuwamikasha paikwarain, awaruza paiña pakmura pakninna ininnapa.

Jesúsne doce ininturuza akwanamtu

(Mr 3.13-19; Lc 6.12-16)

10 ¹ Suasne Jesúsne paiña doce kammuruza akwanat kit kiwainnara, kwail saliztuza puzninnanapa, wan tuntu intukas wan tuntu ishtukas kakulninarinpa.

² Doce inintuzne ka munmazi: An ñancha akwatmikane paas tuntu muntit. Simónne Pedrokas muntit. Paiña aimpishne An-

drés muntit. Santiagokas Juankas aimpihshpara. Sun paasne Zebedeowa painkul azi. ³Felipekas Bartolomékas purazi. Mamaz Tomásкас munazi. Mateone, Roma gobierno pial ñamin saptit-mikane, azi. Santiagone, Alfeo painkul, azi. Mamaz Tadeo muntit. ⁴Simónne Cananeokas muntit. Judasne Iscariotekas muntit. Usne Jesústa Judío awa inintuza chihkanara, Judío awa ussa pizanapa.

Jesúsne kammuruza Dios pit kainanapa ininnamtu

(Mr 6.7-13; Lc 9.1-6)

⁵Jesúsne sun doce kammuruza sun watsal pit kainanapa ininnara. An ñamin usparuza ka kainanara:

“Judío awachiruz uzamtukin iman. Samaria awawa pipulura napman. ⁶Mane Israel awaruza, sun piriku karitkana puraruza, an watsal pit kwinta kin irain. ⁷Diosne chiyuras ininana anpain. Kainawas irain. ⁸Intura kakulninnarain. Irittuzakas kuhsninnarain. Pirit aya ishturuza watsaninnarain. Saliztuza puzninnarain. Na uruza kain milanarit akwa, mamaztuza kain milanarain.

⁹U pial tuhkin win kwaaman. ¹⁰Kumirakas tuhta kwaaman. Maizmu kamishakas kwaaman. Mamaz zapatokas kwaaman. Tiwilkas muman. Yalpamikane Diospa kal kimmikasha milanarawa, us we mij aizpa sappanapa.

¹¹Ainki pipulurakas katsa pipulurakas piannatpane, minpazha wat awara sait kit yal milazha kiztain. Paiña yalta nukultain, inkima. ¹²Sun kwalpa yalta naptawane, wat kintire kiztain. U akwa Diosta paikwantus, Dios uruza kiwainnanapa, ka kiztain. ¹³Nuri kizkane, yal milamtus kizkane, yalpamikane wat uznazi, nua sapta akwa. Yalpamika yal milamtus kizmakane, kakishapu kaizman. Diosta paikwantus, nua kiwainanapa kaizman. Usne wat uzmanazi, nua saptachi akwa. ¹⁴Nuri kizmakane, u kaizara aizpa miashimakane, sun yal-kiskas sun pipulukiskas puztain. Puzarawane, uspa iztakin mitti pil puhstítne ulpíantawa, sun awa kwail kiarit piankamanapa. ¹⁵Watcha kaiznamtus. Diosne an pipuluras awaruza anza naizninnanazi, Dios kaizta aizpa miarachi akwa. An ñamin Sodoma pipulura uztuzkas Gomorra pipulura uztuzkas akkwan kwail kiarakas, uspane an wewazha naizana-zi.”

Jesústa piantuzne naizanazi

(Mc 13.9-13; Lc 21.12-19)

16 “Nawa mizha. Mane nane uruza kwail awa uzamtukin ininnamtus. Uspane aliz awa pura. Uspane kwail awa mai. Uspane inkal kwizakana pura. Uruza kwail kiashimtu. Une uspa-wa nij kit wat mintawa, uspa iztakin nil uzna. Sunkana une usparuzkasa waya kiman. 17 Sun aliz awaruza kwiraruin. Minpazha aliz awane uruza ininmika tukin ilna milnanazi, u nawa piankamtu akwa, nawa kanpamtu akwa. Judío kammu yalkin milnanazi, tiwilkasa aim kianapa. 18 U nawa piankamtu akwa, uspane uruza piznat kit mikwarakas mamaz ininmikarakas chihkananazi. U na akwa naizamtuasmin, une Judío awaruza-kas Judío awachiruzakas na uruza kaizta aizpa parananazi. 19 Uruza mikwara chihkanakane, miza paran kawa minman. Paramtu payu taizkane, au Diosne uruza sun watsal pit paraninnanazi. 20 Papihshpa Sinam Izpulne uruza kiwaininnanazi, paiña pit mikwaruza parananapa.

21 Aimpihshne aimpihshsta mikwaruza chihkanazi, piantanin- napa. Papihshne painkulta chihkanazi. Painkultuzne papihshsta mikwara chihkanazi, piantaninnapa. 22 U nawa nijkulantu akwa, akkwan awane uruza pashinamanazi. Sunkana minpa payu sun naizmu tailchatne, une ap inintura nakasa uzanazi. 23 Mamaz awa uruza pipulura pizashikane, tas puzat kit mamaz pipulurakima irain. Nane watcha kaiznamtus. Dios Painkul piannatchasmin, une wan Israel pipulura ianazi, Dios watsal pit usparuza kainanapa. Wan pipulura itchasmin, Dios painkulne piananazi.

24 Kammumikane paiña kamtammikakin anza wat chi. Ki- wainmikane paiña anpatkin an katsa chi. 25 Kammumikane kamtam uztakanain uztawa. Kiwainmikane anpatkanain nam- tawa. Awa nawa aliz kularitne, Beelzebú nawa piztit kaizaritne, uspane kawarain uruzpa kaizarinazi.”

Mamazta ishkwatpa

(Lc 12.2-7)

26 “Katmizna une aliz kulamtuzna ishkuman. Awane chiwa- zha puintit aizpa chiwal piankamanazi. 27 Na uruza impara im- parain kamtanamtukas, une na kamtarit aizpa minpazhara inin- nat kit tinta kainarain, wan mianapa. Na uruza puintain param- tukas, une na parit aizpa wan awa uzkin minpazhara ininnat kit

kainarain. **28** Uruza piantashimtumikara ishkuman. Uruza piantamtukas, uspane up izpulta piantasachi. Diosmin awaruzakas uspawa izpultuzakas ĩnta kaninshina. Ussa ishkuarawa.

29 Ainki chitchu painintane, une akkwan chin saptu. Maza chitchuin irikane, u chiyuras Papihshne sunkas pian. Usne sunkana kinintu. Dioskas chiwazha kimtu aizpa pian kit aumiza iztu. **30** Usne au chiwal kizpu ashkima wintit. Usne uruzpa wan pian. **31** Katmizna une ishkuman. Akkwan chitchu purakas, une wan chitchukin anza wat mai.”

Jesústa piantuz

(Lc 12.8-9)

32 “Minpazha awaruza ‘Jesústa nijkultus’ kiztane, nakas ap chiyuras Taittara ‘usne ap izmumika i’ kiznash. **33** Minpazha ‘Jesústa nijkultuchish’ kiztane, nakas ap chiyuras Taittara ‘usne ap izmumika chi’ kiznash.”

Jesúsne awaruza paimpa chamanara

(Lc 12.51-53; 14.26-27)

34 “Nane an sukin arachish, wan awa kalpain uzanapa. Sunkana miman. Na at akwa, awane aliz kulamiz kit usparuzpain waya kianazi. **35** Na an sukin arit akwa, awane usparuzpain aliz kulanazi. Pashparuzne papihshkasa aliz kulanazi. Pashuruzne akkuhshkasa aliz kulanazi. Pashu kiznaruzne suegrakasa aliz kulanazi. **36** Awane uspa kwaltuzpain waya kianazi.^s

37 Papihshtakas akkuhshtakas nawakin an akkwan pashiamtumikane ap kanpammika namsachi. Painkultakas pashurakas nawakin an akkwan pashiamtumikane ap kanpammika namsachi. **38** Na akwa naizshimtuchimikane, na akwa ishimtuchimikane, ap kanpammika namsachi. **39** Na akwa ishimtuchimikane wan karinazi. Na akwa wan karintumikane nakasa chiyura uznazi.”

Milam saptu

(Mr 9.41)

40 “Minpazha u kaizta aizpa miraruzne kawarain na kaizta aizpa mianazi. Minpazha na kaizta aizpa miraruzne kawarain nawa ĩntumikara mianazi. **41** Dios pit kainammika akane,

^s 10.36 Mi 7.6

une Diospa kainamtuza wat kinarawa. Suasne ukas paiña milamkana sappanazi. Wat awa akane, une wat kimtuza wat kinarawa. Suasne ukas paiña milamkana sappanazi. ⁴²Ap an ainki kammunikasha tih kwazi kwintamikane milam sapnazi.”

Juane paiña kammuruza Jesústa ininamtu

(Lc 7.18-35)

11 ¹Paiña doce kammuruza uspa kal kianapa kainanarawane, Jesúsne Galilea sukin uztuza it kit Dios watsal pit awaruza kamtanara.

²Sun payuin Juane kajchira siptit wa. Jesús kirit aizpa piankamtawane, Juane minpazha kammuruza ininnara, Jesús-kasa kwinta kin. ³Ka mimaara: “¿Nune Dios inintamikakish? ¿Nune chiyuras atmikakish? Nu Dios inintachimakane, ¿Aune mamazta saishinasa?” mimara.

⁴Jesúsne sinkanara: “Juanta iat kit u izamtu aizpakas u miامتو aizpakas ussa kinarain. ⁵Sunkanain ussa kinarain. Kasu izsachiruzkas izamtu. Mitti chasachiruzkas chaamtu. Aya pirit ishturuzkas wat paraamtu. Mikaintuzkas miامتو. Irrituzkas kuhsaamtu. Awane Dios watsal pit puizaruza kainanamtu. ⁶Nawa nijkulmiztuzne watsal kianazi, u na kirit aizpa izara akwa. Katmizna Juan nawa nijkulmiztune, usne watsal kinazi.”

⁷Juana inintuz kaiyarawane, Jesúsne Juanpa awaruza kainanamiz kit mimanara: “¿Chikishma pul sura Juan tugin iara? Une najtit awara izarachi. Usne pit ti inkwa pamtukana chi. Tiskana i. Ulpianmuchi. ⁸Najtit awara izna iarakine, ¿Chikishma une iara? ¿Watsal pín kwaritmikara izna iamanas? Watsal pín kwaritmikane katsa mikwa yalkimin uztu. ⁹Watsal pín kwaritmikara izna ikine, ¿Chima iziznash? ¿Dios kainammikara izna iamanas? Watcha. Une Dios kainammikara izara. Juane wan Dios kainammtuzkin anza tinta i. ¹⁰An ñamin Dios pinkihta Juanpa ka parit:

‘Nane ap inintumikara, up imtumal an ñancha ininash,

sun amtu payura wan watsal mijjanpa.’^t

¹¹Watcha kaiznamtus. Makima minminkas, Juan munnamikakin an tinta katsa uztachi. Dios inintukin an we tinta uztumikane Juankin an katsa i, Dios pit mirit akwa.

^t11.10 Mal 3.1

12 Juan munnammika atkima ma payukima akkwan awane Dios pit miashit kit Dios inintura nappashimtu. Dios inintura siptitkas, Dios pit miashimturuzne sua wanmakkamiz kit nup-painashimtu, sua nappana. 13 Juan uztakima, wan Dios kainammtuzkas Moiséskas Dios inintu kinpa kainaara. Diosne apain innnazi, kizara. 14 Na kaizta aizpa mishitne, Elíaspa mirain. An Juane, Dios pit kainammikane, Elías i. Diosne ussa ininna namta. 15 Katmizna na kaiznara aizpa mirain.

16 Ma payu uztuza ¿Chima kizanasa? Uspane pashpakanain mai. Pipulu salmukin salamtuasmin, uspa izmuruza ka kwiannamtu: 17 'Aune karaskwil uspusanash, kuki kianapa. Une kukitchi. Au tayaltit kanta kaiztuasmin, une mizurainkas azarachi,' kiznaara. 18 Kawarain une uspakanain mai. Juan akane, mamazkasa kumira kwatchi akwa, mamazkasa chappi kwatchi akwa, une 'ussa kwail saliz piztit' kizamtu. 19 Mane nane, ampu namtitmikane, arau. Na wan chiwal kumtu akwa, une nawa piritmin chammikakanakas kwisha kumtu chammikakanakas kizamtu. Une nawa ka kizamtu: 'Ap izmuruzne kwail awa mai. Ap izmuruzne Roma gobierno pial sapmuruz mai,' kizamtu. Watcha, u nil minñamtune, une na kaizta aizpa watcha i piankamanazi."

Kwail awa

(Lc 10.13-15)

20 Jesúsne akkwan pipuluruza akkwan iztaspaarit kal kirit. Awa uspa kwail kiarit aizpa maizarachi akwa, Diosta kaiyarachi akwa, Jesúsne usparuza pilchapuz kit ka kaiznara: 21 "Corazín pipulukin uztuzkas Betsaida pipulukin uztuzkas kwisha akkwan naizarinazi. Na uspa pipuluruza akkwan iztasparit kal kitkas, uspane nawa nijkularachi. Tiro pipulukin uztuzkas Sidón pipulukin uztuzkas sun iztasparit kal izaratne, uspane ñamin uspa kwail kiarit aizpa maizashinat kit Diostakas kaiyashinara. Tayalara akwa, uspane tilkaya pñ kwaarimashina. Tayalta akwa, uspane putchã imkas kizpura sintirashina. 22 Katmizna, nane uruza ka kaiznamtus. Innam payu taizkane, une na kaizta aizpa mirachiruzne an akkwan naizanazi. Tiro pipulu uzturuzkas Sidón pipulu uzturuzkas an wemin naizanazi. 23 Capernaum pipulukin uztuzne au pipulu anza watsal pipulu i minñamtu. Kancha u pipulu azpian kit wan karinazi. Wan irittuzpa izpultuzne irittukin iat kit kwisha naizarinazi. Une na iztasparit kal kirit

aizpa izara. Sun iztasparit kal Sodoma pipulokin kiaratne, Sodoma pipulu uztuzne Diosta nijkulashina, Dios uspa kwail kiarit aizpa wat kulnanapa. An pipulune azpiansachiari. Sun iztasparit kal izaratne, Soldoma pipulune makima tuashina. **24** Katmizna uruza kaiznamtus: Ilnam payu taizkane, Capernaum pipulura uztuzne Sodoma pipulu uztuzkin anza tinta naizarinazi.”

Nawa at kit kwaizkultain

(Lc 10.21-22)

25 An payu Jesúsne paiña Papihshta ka kaizta: “Nune wari. Nune Anpat i. Nune chiyurakas an surakas inintui. Nune sun kamtam puintit mij, piankamtittuz chi miamanpa. Nu sun kamtam we piantuza piankamninnamtu akwa, nane nua kwisha wari kiztus. **26** Watcha, nune ap Taitta i. Sunkana kishirit.

27 Nu ap Taitta akwa, nune nu pashit aizpa nawa wan kinpa chihkarit. Papihshmin Painkulta wat pian. Painkulminkas Papihshta wat pian. Painkulkas mamaztuza nanaat kit kiwainnamtu, Papihshta piankamiznapa. Paiña Papihshta sun kiztawane, usne awaruza ka kiznara: **28** Kwaiztittuzkas an tailsachiruzkas nawa at kit nijkulchain. Na u kwail kiarit aizpa wat kul kit kwaizkulninnanash. **29** Nawa azhain, na kamtara aizpa miapanapa. Nane uruza imparain paranamtu, piankamana. Nane aliz awa chish. Nane uruza kiwainanash, up kajichu kwaizkulnana. **30** Nane nawa kammuruza kiwainnanash. Na uruza kamtamtu aizpa kin samchi.”

Kammuruzne kwaizkultu payura pippa pakkamtu

(Mr 2.23-28; Lc 6.1-5)

12 **1** Sun payura Jesúsne kwaizkultu payura sauwara irit. Paiña kammuruzne yak kiamiz kit chara pippa pakkamizta kwan. **2** Fariseo awa sun izarawane, Jesússta kaizara:

—Izti. Up kammuruzne kal kiamtu. Kwaizkultu payura kal kinchi.

3 Usne sinkanat kit mīmanara:

—Katsa mikwa Davidkas paiña izmuruzkas ñamin yak kiara. ¿Une uspa kiara aizpa pinkihta izamanas? **4** Uspane Diospa yal-kin nappat kit Diosta kwintit pan kuara. Uspa kiarit aizpa impa. Diospa pariyarain Diosta kwintit pan kuashina. Uskas paiña izmuruzkas sun pan kuashitchikas, Diosne usparuza ilnarachi.

5 Une Moisés pinkihta parit aizpa piankamarachi. Pariyaruzne kwaizkultu payura Diospa yalkin kal kiamtu, kwaizkultachin. Uspane kwail kiarachi. 6 Nane uruza watcha kaiznamtus. Nane u iztakin chamtus. Nane Diospa yalkin anza tinta ish. 7 Une Dios pinkihta parit aizpa piankamarachi. Pinkihta ka parit: “Nane mamazuza pashinanapa pashimtus, usparuza kiwainnana. U ampu wakara na akwa piantarakas, u nawa milamtu aizpa pashimanash.”^u Us kaizta aizpa miaratne, une ap kammuruz kwail kiarit kaiznasachi. 8 Suas nane, ampu namtitmikane, kain payukas kwaizkultu payukas inintus.

Maza ampu chihti chihpailtit waj

(Mr 3.1-6; Lc 6.6-22)

9 Suas Jesúsne tas it kit pipulura piannat kit Judío kammu yalta napta. 10 Suane maza chihti chihpailtit ampune tuara. Jesússta kwail kimtu kizshimturuzne pura. Uspane Jesússta mimaara:

—¿Nune kwaizkultu payura an intumikasha kakulninshimas? ¿Min nua ininta, an intura kakulninnapa? Moisés pinkihta paritkin kwaizkultu payura kakulninna parit chi.

11 Jesúsne sinkanara:

—Kwaizkultu payura piriku pil kulta taiztane, ¿pirikura tainakna imtukish? Watcha, nune pirikura it kit tainaknazi. 12 Maza ampune pirikukin anza wari. Kwaizkultu payu taiztukas, mamazuza wat kishina.

13 Suasne ishtura kaizta:

—Up chihti nil sari.

Nil sakane, mamaz chihpailtit wat parit.

14 Jesús ishtura kakulnintawane, Fariseo awaruzne puzat kit wanmakkat kit Jesússta piantana minñamizta.

Diospa kiwainmumika

15 Sun piankamtawane, Jesúsne tas puzta. Akkwan awane ussa kanpaara. Usne wan inturuza kakultanara. 16 Usne usparuza kurunnara, minainkas us intura kakulnintu kainammanpa. 17 Ñamin Isaíasne, Diospa kainammikane, uz kit Jesússta parit. Sun payura Jesúsne Isaías parit aizpa kirit. Isaíasne sunkana parit:

^u 12.7 Os 6.6

- 18 “Anne ap kiwainmika i. Nane ussa narau.
 Usne na pashimtumika i. Ussa narit akwa, nane
 kwisha warish.
 Nane ap Sinam Izpul ininnash, ussa kiwainnapa,
 wan Judío awachiruza ap watsal pit kainananapa.
- 19 Usne minainkas waya kimanazi.
 Kwiantuchi akwa, minminkas pipulukin ussa
 miamanazi.
- 20 Tintachiruza kiwainanazi.
 We nijkulturuzakas tayalturuzakas kiwainanazi,
 us nil kimtu aizpa pailnakima.
- 21 Akkwan Judío awachiruzne ussa tirizat kit nijkulanazi.”^v

Jesúskas salizkas

(Mr 3.20-30; Lc 11.14-23; 12.10)

22 Suasne awane saliz pizitmikara Jesús tukin karaara. Paiña kasu izsachi. Pitkas parasachi. Jesús ussa kakulnintawane, sun ampune kasu kai panintit. Parashina. Wat panintit. 23 Wan awane iztaspaat kit mimaara: “¿Usne Davidpa kwal ki? ¿Dios inintamika ki?”

24 Fariseo awa sun minarawane, kaizara: “Saliztuza puznintukas, sun ampune Beelzebú akwa, saliz inimika akwa, puzninnamtu,” kizara.

25 Jesúsne uspa minñamtu aizpa piankamta. Suasne usne Fariseo awaruza ka kaiznara: “Inintuzkas uspa kiwaintuzkas usparuzpain waya kiamizkane, uspane wan kaarinazi, uspa paimpa paimpa iamtu akwa. Pipulura uztuzkas usparuzpain waya kiamiztane, wan kaarinazi. 26 Sunkanakas Satanáspa saliz saliztain puznintane, usparuzpain waya kiamizkane, wan kaarinazi, uspa paimpa paimpa iamtu akwa. 27 Une nawa Beelzebú akwa salizta puznintu kizamtu. Na sun kitne, ¿Minma u kanpamtuz kiwainamtui, salizta puzninnapa? Beelzebú usparuza sun kinpa kiwainnarachi akwa, une mizkaiztu, Beelzebú nawa mizurainkas kiwainta chi akwa. Katmizna nilchi minñamtu. U kanpamtuzne uruza nil chi kiamtu kizanazi. 28 Diosne nawa nat kit ininta, paiña Sinam Izpul

^v 12.21 Is 42.1-4

akwa saliztuza puzninnanapa. Katmizna na kamtamtu aizpa piankamtain. Diosne nawa apain ininta, umiza ininnanapa.

29 Ñamin yalpamikasha titkasa kuhtakine, minminkas paiña yalta walkwan nappasachi. Yalpamikasha kuhtnintawane, wal-kummikane yalta napshina, walkwan. Na Beelzebúwa yalta napta akwa, Beelzebúra kuhta akwa, nane saliztuza puznina-miztus. 30 Nawa kanpamtuchimikane nawa aliz kulnazi. Ap kal kiwaintuchimikane ap kal kaninnazi.

31 Diosne chiwazha kwail kirittuzakas chiwazha awara kwail kaiztittuzakas wat kulninnanazi. Sunkana Diosne mizurainkas Sinam Izpulpa kwail pit kaiztumikasha wat kulmananzi. 32 Diosne ampu namtittmikawa kwail pit kaiztumikasha wat kulninnazi. Me Diosne mizurainkas paiña Sinam Izpulpa kwail pit kaiztamikasha wat kulmanazi. Makas mamaz payurakas wat kulmanazi.”

Tine paiña pippa wamtu

(Lc 6.43-45)

33 “Ti pippa wakane, une wat tikas kwail tikas pian. Wat tine wat pippa wam. Kwail tine kukain pippa wam. Sunkanain wat-tuzne wat kiamtu. Kwailtuzne kwail kiamtu. 34 Une kamtakanain mai, sula kuamtu akwa. U pit kaizara aizpa kamta pininukana mai. U kwail akwa, une wat pit paraasachi. U parakane, une ayuktas kwail minñamtu aizpa paranazi. 35 Wat awane ayukta wat minñamtu aizpa paranazi. Kwail awane ayukta kwail minñamtu aizpa paranazi. 36 Ilmu payu taizkane, wan awane uspa kain pit kaizara aizpa nijkulanazi. Sun payura Diosne usparuza ilnanazi.

37 Wat pit paramtuzne uspa pit akwa naizamanazi, uspa wat awa akwa. Kwail pit paramtuzne uspa kwail pit akwa naizanazi, uspa kwail awa akwa.”

Kwail awane ussa paikuamtu, iztasparit kal kinpa

(Mr 8.12; Lc 11.24-32)

38 Suasne minpazha Fariseoruzkas Moisés kaizta aizpa kamtamtuzkas ussa kaizara:

—Kamtam, miri. Nu chiwazha iztasparit kal kika, izshipus-pas, au Dios nua ininta piankamanapa.

39 Jesúsne sinkanara: “Une, ma uztuzne, kwail awa mai. Une Diosta pashiamtuchi. Une nawa paikuamtu, iztaspat kal kinpa.

Chinkas kimanash, awa izmanpa. Une Jonásta, Dios kainammikasha, kirit aizpa izanazi. ⁴⁰Jonásne kutña payukas kutña amtakas katsa pikamta, pusunta, waara. Kawarain chiyuras Ampu namtitmikane kutña payukas kutña amtakas pilta kamtiti tuanazi.^w ⁴¹Ilmu payu taizkane, Nínive pipulura uztuzne ma payu uztuza kwail kiarimti kiznanazi. Jonás Nínive pipulu uztuza Dios pit kaiznakane, Nínive awane Jonás kaizta aizpa nijkulat kit uspa kwail kiarit aizpa maizat kit Diosta kaiyara. Nane Jonáskin anza tinta ish. Une nawa nijkulamtuchi. ⁴²Ilmu payu taizkane, Sabane, attish suras ashampa mikwane ma uztuza kwail kiarimti kiznanazi. Sun ashampane Salomón tukin it, us wat pian aizpa mina. Nane Salomónkin anza tinta ish. Me une na kaiztu aizpa miashimtuchi.

⁴³Maza saliz awaras puzkane, salizne pilchiwara saimtu cha, kwaizkulna. Kwaizkulna wanmaltakine, ⁴⁴sun awarain kailtinash mintu. Sun awarain kailshitne, sun awara wanmal kit ussa iztu. Minminkas mama ussa piztachi. Yal charalkanain iztiti uz. Usne pishkarit yalkana iztiti. Ayukmal watsal iztiti. ⁴⁵Suasne salizne it kit siete anza kwail saliztuza kana imtu, ussa pizanapa, sua uzanapa. Kwiztane sun ampune an anza kwail uznazi. Kawarain ma payu uztuzne an ñanchakin anza kwail uzanazi.”

Jesúspa akkuhshkas aimpishstuzkas

(Mr 3.31-35; Lc 8.19-21)

⁴⁶Jesús awaruza paranamtuasmin, paiña akkuhshkas aimpishstuzkas piannaara. Uspane yal pianamal nukkulat kit uskasa kwinta kishiara. ⁴⁷Minpazha Jesústa kaizara:

—Up akkuhshkas up aimpishstuzkas pianamal pura. Nukasa kwinta kishiamtui, kizara.

⁴⁸Jesúsne ussa sinkat kit mimara.

—¿Minma ap akkwa i? ¿Minma ap aña i? kizta.

⁴⁹Suasne Jesúsne paiña kammuruza chihti annat kit kaiznara:

—Uspane ap akkwakanain mai. Uspane ap añakanain mai. ⁵⁰Ap chiyuras Taitta pashimtu aizpa kintumikane ap akkwakanain i, ap añakanain i, ap kuakanain i, kiznara.

^w12.40 Jon 1.17

Pippa wammika kamtam kwinta

(Mr 4.1-9; Lc 8.4-8)

13 ¹Sun payuin Jesúsne yaltas puz kit pimakin at kit uzta. ²Akkwan awa us tukin wanmakkamtuasmin, Jesúsne kanuara wat kit uzta. Wan awane pi ksukin uzara. ³Suasne Jesúsne akkwan kamtam kwintakasa ka kwinta kinara: “Pippa malmumikane pippa malna puzmizta. ⁴Malmiztuasmin, akkwan pippa chine mimakin taizara. Suasne chitchu aat kit sakkat kit kuara. ⁵Anpa pippane uktainkas akkwan ainkih pilchirainkas taizara. Akkwan pil chi akwa, pippane azain chikkara. ⁶Pān malkane, tine pul pat kit iarit, mujtit waj chi akwa. ⁷Anpa pippane pu tikin taizara. Pu pippane chikkat kit mamaz pippara isal iptā, wamanpa. ⁸Anpa pippane wat pilpara taizat kit akkwan pippa waara. Anpa tine cien pippakima waara. Anpa tine sesenta pippakima waara. Anpa tine treinta pippakimain waara. ⁹Na kaizta aizpa piankamshitne, piankamtain,” kiznara.

¿Chikiztama sun kamtam kwintakasa kamtanamtu?

(Mr 4.10-12; Lc 8.9-10)

¹⁰Kwiztane kammuruzne Jesússtakin kasha iat kit ussa mi-maara: “¿Chikitma awaruza kamtam kwintakasa paramtus?”



Jesús kanuaras kamtanamtu

11 Usne sinkanara: “Diosne uruza impará imparain us kamtít aizpa piankamninnamtu. Mamaztuzne us kamtamtu aizpa piankamanazi. 12 Diosne piantuza kiwainanazi, an akkwan piankamanapa. Na kaizta aizpa mímtechiruzne us pitchin piankamtu aizpa karinazi. 13 Katmizna kamtam kwintakasa usparuza paranamtu. Yawa na kimtu aizpa izamtukas, uspane nawa miashimtuchi. Yawa na kaizta aizpa miamtukas, uspane piankama-shimtuchi. 14 Isaíasne, Dios kainammikane, sun awa kiamtu aizpa ka parit:

‘Sun pit watcha mirakas, une miamanazi.

Wan kiarit aizpa iztakas, une piankammanazi.

15 Sun awane Dios kaizta aizpa miashimtuchi.

Uspa kail sítitkana akwa, uspane nawa nijkulamanazi.

Uspane nawa kaiyamanazi, na usparuza kakulninnanapa, uspa kwait wat kulanapa.’^x

16 Na kit aizpa izamtu akwa, umin miat kit wat uzanazi. Na kaizta aizpa miamtu akwa, umin piankamanazi. 17 Watcha kaiznamtus. Akkwan Dios pit kainammtuzkas wat awaruzkas an payura u izamtu aizpa izashiara. Uspane sun izarachi. Uspane u miamtu aizpa mishiara. Uspane sun miarachi,” kiznara.

Mane sun maltu kamtam kwinta piankamninnamtu

(Mr 4.13-20; Lc 8.11-15)

18 “Mane une pippa maltu kamtam kwinta mirain, piankamanapa. 19 Nane sun kamtam kwinta kwinta kinamtu, u miza Dios awaruza innamtu piankamanapa. Dios pit miamtukas, uspane Dios kaizta aizpa mímtechiruzkana mai. Suasne Diablone amtu, pippa warit aizpa nakannapa, Dios pit kamtara aizpa miamanapa. 20 Mamaztuzne pippa uk pilpara taizarakanain mai. Sun pit miarawane, uspane sun pit sappat kit wat kulat kit sun pit kishiara. 21 Wat miarachi akwa, sun awane akkwan payukima tailchaamtuchi. Sun pit akwa naizamtune, uspane an nijkulamtuchi. 22 Sun pit kwayamtimtu. Mamaztuzne pippa pu patmukin taiztakanain mai. Sun pit miamtukas, uspane pailta payu usparuzpain minñat kit usparuzpa

^x 13.15 Is 6.9-10

kal kiamtu. Pān kulshiamiztu. Katmizna sun pit miara aizpa usparuza wat uzna kiwainnamtuchi. ²³ Mamaztuzne pippa wat pilkin taiztakanain mai. Sun pit miarawane, uspane wat piankamara. Miararuzne nil uzshiat kit wat kishiamiztu. Uspane wat pippakanain mai. Wat pippane cien pippakima puzta. Anpane sesenta pippakimain puzta. Anpane treinta pippakimain puzta.”

Chara pippakas kwail pitkas kamtam kwinta

²⁴ Kwiztane Jesúsne mamaz kamtam kwinta ka kwinta kinara: “Une Dios an sura uztuza innamtu piankamtain. Sunkana usne innamtu. Ampune nan pilta wat pippa malta. ²⁵ Maza amta pittamtuasmin, aliz awane at kit chara pippakin kwail pippa wat kit it. ²⁶ Chara pippa chikkakane, pippa kwizakane, parejuin kwail ti pippakas kwizara. ²⁷ Suasne sun izarawane, kiwainaruzne pamikara iat kit kaizara: ‘Anpat up nanmal maltane, aune wat pippa malwiznash. ¿Mizamaka kwail tikas chara pippa tikas puzamtu?’ mimaamtu. ²⁸ Pami-kane kaiznara: ‘Minpazha nawa aliz awa sun wara.’ Suasne kiwainturuzne an mimaara: ‘¿Kwail ti puhsnawizna?’ kizara. ²⁹ Usne sinkanara: ‘Ma puhsnachi. Kwail ti puhstane, parejuin chara tikas puhshina. ³⁰ Parejuin chiknintawa, paknakima. Suasne kal kimtuza innanash, kwail ti an ñancha pakkanapa. Kwail ti pippa paktawane, wanku sat kit ñnta paktana innanash. Kwiztane wat ti pak kit watsamkin watsanpa innanash.’”

Ainki mostaza pippa kamtam kwinta

(Mr 4.30-32; Lc 13.18-19)

³¹ Jesúsne mamaz kamtam kwinta kwinta kinara: “Diosne apa sunkana innamtu. Maza ampune paiña nan sura mostaza pippa wana it. ³² An pippane ainki i. Sun pippa wara chikkane, tine mamaz tikin an katsa kawirimtu. Chitchune sun ti tailpura-kin aat kit yal saamtu.”

Kiña kamtam kwinta

(Lc 13.20-21)

³³ Jesúsne mamaz kamtam kwinta kwinta kinara: “Diosne apa sunkana innamtu. Maza ashampane pan sashimiztu, kut-

ña waz chara pippa kiritkasa. Usne kiñakanain winta, wan sul-
napa.”

Jesúsne kamtam kwinta kammuruza piankamninnamtu

(Mr 4.33-34)

34 Jesúsne kammuruza kamtam kwintakasain kwinta kinamizta. Awaruza kamtanamtuasmin, usne kamtam kwintain paranamizta. 35 Jesúsne Dios kainammika para aizpa kirit. Sunkana parit:

“Nane awaruza kamtam kwintakasa kwinta kinanash.
Dios an su sarasmin, Diosne makima sun kamtam
watsarit mij.
Mane nane sun kamtam kwinta kinanash.”^y

Jesúsne chara pippa kamtampa piankamninnamtu

36 Suasne Jesúsne awara “iru” kiz kit yalta napta. Kammuruz ussa kasha aakane, ussa ka kaizara: “Aumiza kwail pippa chikta kamtam kwinta piankamninchain,” kizara.

37 Suasne Jesúsne kammuruza kaiznara: “Nane, Dios Painkulne, wat pippa wammikane, ish. 38 Nan sune au sukana i. Wat pippane Dios ininturuzkana mai. 39 Kwail pippane aliz awakana mai. Kwail pippa wammikane Diablo i. Pakta payune minpa payukana i. Sun payura wan pailtinazi. Pakmuruzne ángelkana mai. 40 Pakmuruzne kwail ti nakkaat kit ñnta kiaintu, impakta-napa. Wan payu pailka, sunkanain kinazi. 41 Dios Painkulne paiña inintukish paiña ángeltuza ininnanazi, mamaztuza kwail kininturuzakas kwail kimturuzakas wanmakninnanapa. 42 Usne usparuza ñnta kiakpinanazi. Suane uspane azat kit sula sit sit kianazi. 43 Suasne kwiztane Dios kaizta aizpa kimturuzne Papihsh inintukin uzanazi. Uspane Dios iztukin wat kianat kit pân aitzukanain puranazi. Na kaizta aizpa mirain.”

Pial puintit kamtam kwinta

44 “Dios inintukin uztumikane akkwan puintit pial pilta sairamikana i. Sun puintit pial sairawane, an ampune suain mama-sa puina imtu. Watsal imtuasmin, usne wan mij aizpa painin kit sun su paintu, puintit pial ukkana.”

^y13.35 Sal 78.2

Watsal in kamtam kwinta

45 “Dios inintukin uztumikane watsal in saimtumikakana i.
46 Kwisha muin in wanmaltawane, usne wan mij aizpa painin
kit sun in paintu.”

Pishkaru sulmu kamtam kwinta

47 “Dios inintukin uzturuzne pishkarukanain mai. Sulmu-
ruzne sulmura pira kiain kit akkwan tuntu pishkaru sulamtu.
48 Pishkaru sulmukasa sulkane, sulmuruzne sulmu piras tai-
naktu, pi ksurakima. Suasne uspane uzat kit pishkaru naantu.
Uspane wat pishkarune timta win kit watsam. Kwailne kiak-
pintu. 49 Minpa payura sunkanain kinazi. Ángeltuzne chiyu-
ras puzat kit kwailtuzakas wattuzakas paimpa nanazi. 50 Us-
pane kwailtuza ĩnta kiakpinnanazi. Suane azat kit sula sit sit
kianazi.”

An ña kamtamkas masas kamtamkas

51 Jesúsne mīmanara:

—¿Une sun kamtam wan mīamtukiwas?

Uspane sinkaara:

—Watcha. Mīanash, kizara.

52 Suasne Jesúsne kaiznara:

—Dios pit kammumikane Diospa piankamtu. Sun Dios inintu-
kin uztumikane paiña ininmika kamtamtu aizpa piankamnazi.
Suasne usne yalpa mikakana namnazi. Yalpamikane masas kam-
tamkas an ña kamtamkas us watsarit aizpa kamtana ukkashina.

Jesúsne Nazaret pipulura it

(Mr 6.1-6; Lc 4.16-30)

53 Wan kamtam kwinta kainanarawane, Jesúsne suas it 54 kit
paiña sura, Nazaret pipulura, piannat. Suane Jesúsne Judío
kammu yalta kamtanamizta. Awa iztaspaarit akwa, awane us-
paruzpain mīmaara:

—Sun ampune sun pian aizpa ¿mīnta kamta? Sun ampune
sun iztaspaarit kal kimtu aizpa ¿Miza ka kimtu? kizara. 55 Usne ti
kihtmumikawa painkul i. Paiña akkuhshne María mun i. Santia-
gokas Josékas Simónkas Judaskas paiña aimpihstuzpain mai.
56 Paiña kwampihstuzkas aukasa uzamtu. Usne ¿mīnta wan
kamta?

57 Katmizna uspane us kaizta aizpa miashitchi. Me Jesúsne kaiznara:

—Diosne kainammika mamaz suras akane, awane ussa wat minñamtu. Dios kainammika paiña suras akane, sun pipulura uztuzne ussa an wekas minñamtu. Paiña yalta uztuzne ussa an we minñamtu.

58 Katmizna Jesúsne sun pipulura akkwan iztasparit kal kit-chi, uspa ussa wat nijkularachi akwa.

Juane, kwazikasa munna kimmikane, irit

(Mr 6.14-29; Lc 9.7-9)

14 ¹ Sun payune Herodesne Jesúsna mira. Usne Galilea sura inin kit ² paiña kiwaintuza kaiznara: “Anne Juan munammika i. Usne irittas kuhsta. Katmizna usne an iztasparit kal kimizta,” kiznara.

³⁻⁴ Ñamin Herodesne Juanta pizna ininta, ussa kuh kit kajchira sipna. Herodeskas Felipekas aimpihstuzpain azi. Herodesne paiña aimpihshpa ashampara miltit. Sun ashampane Herodías muntit. Herodías akwa Herodesne Juanta sipninta. Juane Herodesta kaiztit: “Sun ashampara, up kwiñara, milnachi,” kizta.

⁵ Juanta piantashimtukas, Herodesne ussa piantarachi, awa ishkuumtu akwa. Wan awane Juan Dios kainammika azi minñara. ⁶ Herodespa año kapal pishta taizkane, Herodíaspa pashune akwattuza iztakin puz kit kukin irit. Herodesne wari min kit ⁷ nimpish ashampara kaizta: “Nane nu chiwazha paikumtu aizpa Dios iztakin nua milan namtus,” kizta. ⁸ Nimpish ashampane akkuhshta kwinta kin it. Akkuhs ussa kurunkane, nimpish ashampane Herodesta kaizta: “Mamazta ininti, Juan munammikawa kizpu pilatukin karanpa,” kizta.

⁹ Sun pit mirawane, Herodesne tayalta. Tayaltukas, usne us paikwat aizpa milat. Pishta akwattuz us milan namta aizpa miara akwa, Herodesne mamaztuza ininnara, us paikwara aizpa kin. ¹⁰ Suasne usne mamazta kajchira ininta, Juanpa kizpura titnapa. ¹¹ Suasne uspane pilattura karaat kit nimpish ashampara milaara. Usne akkuhshta chihkara.

¹² Suasne Juanpa kammuruzne aat kit iritta muat kit pilita kamaara. Kwiztane Jesúsna kainana iara.

Jesúsne cinco mil awaruza pan kwinnamtu

(Mr 6.30-44; Lc 9.10-17; Jn 6.1-14)

13 Sun mirawane, Jesúsne tas puz kit kanuara wat kit pul sura irit. Mazainpain irit. Jesúsna tugin piankamarawane, awane pipulukis puzat kit mittiwara pimawara us tugin iamizta. 14 Kanuakis kishstawane, Jesúsne akkwan awara iznara. Usne usparuza kiwainshinat kit intuza kakulninnara. 15 Til pamizkane, nashmizkane, Jesúsna kammuruzne us tugin aat kit kaizara:

—Nashtimtui. Akkine minminkas uzchi. Awaruza pipulura irain kiznari, chiwazha painapa kwan.

16 Jesúsne sinkanara:

—Usparuza ininman. Umin usparuza kwinnari, kuanapa.

17 Uspane kaizara:

—Akkine aune cinco panminkas paas pishkaruinkas mijmakpas.

18 Jesúsne kaiznara:

—U mij aizpa nawa kararain, kiznara.

19 Suasne Jesúsne awaruza pitkin uzanapa ininnara. Suasne usne cinco pankas paas pishkarukas sap kit chiyura izak kit Diosta aishtaish kizta. Kwiztane pankas pishkarukas kiz kit kammuruza milanara. Uspane awaruza nailnara. 20 Wan kuat kit tukkarit. Kwatpane, uspane pitti pitti tiztit sakkat kit doce timta winnara. 21 Cinco mil ampune kuara. Ashamparuzkas pashparuzkas wiantachin kuara.

Jesúsne pi isalpara chamtu

(Mr 6.45-52; Jn 6.16-21)

22 Suasne Jesúsne kammuruza kanuara waanapa ininnara, an ñancha pi kwakara piannaanapa. Iamtuasmin, Jesúsne awaruza iru kiznara. 23 Usparuza “iru” kiznarawane, usmin malta nura, Diosta paikwan. 24 Til pamizkane, us suain nukkultuasmin, kammuruzne kanuawara pi paizkakin iamtuazi. Iamtuasmin, katsa tinta inkwa kanuara nuppainmizta. Pine tinta palakpintu. 25 Tilawain Jesúsne uspa tugin it. Pi isalparain mittiwara imtuazi. 26 Usna tugin pianamtuasmin, kammuruzne ussa pi isalpara chamtu izara. Uspane ishkuat kit kwianara:

—Irit izpul izpuspas, kizara.

27 Suasne Jesúsne usparuza parat kit kaiznara:

—Une tinta kultain. Na ish. Ishkuman.

28 Suasne Pedrone sinkara:

—Anpat. ¿Nu kish? Nu sua chamtuasmin, nawa chanpa inincha, nu kuntakima, pi isalpara in.

29 Jesúsne kaizta:

—Nawa at, kizta.

Pedrone kanuaras kihsh kit pi isalpara imizta, Jesús kuntakima. 30 Kwisha tinta inkwa iztuasmin, Pedrone ishkwat kit pira unainmiz kit ka kwianmizta:

—Anpat kiwaincha, kizta.

31 Irattuín Jesúsne ussa piz kit tainak kit kaizta:

—¿Chitma nawa wat nijkulmas?

32 Kanuara nuilkane, inkwane pamtuchi parit.

33 Suasne kanua waruzne Jesús iztukin wakpuj wainñat kit kaizara:

—Watcha. Nune Dios Painkul i, kizara.



Jesús Pedrora piztu

Jesúsne Genesaret su imturuza kakulninnamtu

(Mr 6.53-56)

34 Uspañe pi kwakkat kit Genesaret sura pianara. 35 Sun suras awa Jesús pa pianamarawane, uspañe wan awaruza Jesús pianarit kainanara. Pianamarawane, uspañe Jesús tukin imturuza karaara. 36 Uspañe Jesús ta paikuara, ishturuz paiña pínkin paanapa. Wan paiña pínkin paaruzne kakularit.

Jesús an ñamin kamtam watchi kiztu

(Mr 7.1-23)

15 ¹ Suasne minpazha Fariseo awaruzkas Moisés kaizta aizpa kamtamtuzkas Jerusalén pipuluras puzat kit Jesús ta tukin aat kit mimaara.

²—Up kammuruzne ¿Chikishma ñamin iarit kamtamtuz kainara aizpa miamtuchi? Kuamiztune, uspañe chihti kittarazi, uspa kwail kiarit aizpa kihana.

³ Jesúsne sinkanat kit mimanara:

—Une ¿Chikishma Dios kaizta aizpa miamtuchi? Umin u ilaparuz manta kiamtu aizpa minñamtu, Dios uruza manta kinamtu aizpa kiamanapa. ⁴ Diosne awaruza ininnat kit ka kaiznara: “Une papihshtakas akkuhshtakas wat nijkulat kit wat kiarawa.”^z Kawarain “Minpazha papihshtakas akkuhshtakas kwail paramtune, awa ussa piantarawa, inapa.”^a ⁵ Kancha umin papihshtuzpakas akkuhshtuzpakas ka kamtanamtu: “Papihshtakas akkuhshtakas milanashimtukine, une ka kizarawa: ‘Nane na papihshtakas akkuhshtakas milasachish, na wan mij aizpa Diosta milat akwa.’ ⁶ U sun kamtamtu akwa, une ‘au papihshtuzakas au akkuhshtuzakas kiwainsachimakpas’ minñamtu. U sunkana kamtaamtune, u kwalta kiwaintuchine, une Dios manta kimtu aizpa kiamtuchi. U ilaparuz kamtanamtu aizpa miashimtu akwa, une kwail kiamtu. ⁷ U papihshtakas u akkuhshtakas kiwainamtuchi akwa, une we nijkulamtu, Dios kaizta aizpa kiamtuchi akwa. Isaíasne, Dios kaimammikane, ñamin uruzpa nil kaiznara:

⁸ ‘An awa uspa pitkasain nawa wat kizamtukas, uspañe nawa wat nijkulamtuchi.

⁹ Nawa wakpuj wainñamtukas, uspañe nawa piankamamtuchi.

^z 15.4 Éx 20.12; Dt 5.16 ^a 15.4 Éx 21.17; Lv 20.9

Kamtanamtuasmin, uspane “au kamtamne Diospa kamtam i” kizamtu.

Sunkana chi. Uspane uspain kamtam kamtanamtu.’”^b

10 Sun kiztawane, Jesúsne akkwan awaruza wanmakninnat kit kaiznara:

—Na kaiztu aizpa mirain, piankamanapa. 11 Chiwazha kumira kumtukas, kumira kumtumikasha kwail namninmanazi. Me kwail pit kaiztamikane kwail kimmikakana namnazi.

12 Suasne Jesúsna kammuruzne us tukin aat kit kaizara;

—Nu kaizta aizpa akwa, Fariseo awane nukasa aliz kulaarit. ¿Sun piankamtukish? kizara.

13 Usne sinkanara:

—Ap chiyuras Taittane paiña kamtam chihkanara. Usne nil chi kamtamtuzakas nilchi nijkultuzakas pailnintinazi. Awane usparuzza kwail tikana puhstinazi. 14 Usparuzza kurunnaman. Sun we pian kamtamtuzne mamaz we piantuza kamtanamtu. Wan karinazi. Sun kwail kamtamtuzne kasu izsachiruzkana mai. Kasu izsachimika kai izsachimikasha taintane, paasas kulkin taiziltinazi.

15 Pedrone Jesúsna kaizta:

—An kamtam kwinta aumiza piankamninchain.

16 Jesúsne mimanara:

—Une we piankaamtu. ¿Une misachimakkiwas? 17 ¿Kumira kwat aizpa pianchimakkiwas? Wan kumira kwat aizpa pusunmal wa. Kwiztane awaras puztu. 18 Awa chiwazha ayuk kaijchira minñamtukas, kwiztane awane pitkasa paramtu. Kwail pit kaiztamikane kwail kimtu. 19 Wan kwailne kaijchuras puzamtu. Kwail mintumikakas, awara pian tamtumikakas, mamazpa ashampakasa pittumikakas mamazpa ampukasa pittumikakas, walkumtumikakas, pirail kaiztumikakas, mamazta kwail pit paramtumikakas kaijchukin min kit chiwazha kwail kimtu. 20 Sunpawa kwail kimtumikane, Dios iztakin kwail kit kit ayukta sinam chi namnazi. Chihti kittuchi kwatmikane Dios iztakin kwail kimtuchi. Usne ayukta sinam i.

^b 15.9 Is 29.13

Mamaz suras ashampane Jesússta nijkulta

(Mr 7.24-30)

21 Tas puztawane, Jesúsne mamaz sura it kit Tiro pipulurakas Sidón pipulurakas pianara. 22 Cananea suras ashampane sun sura uzta. Usne Judío awa chi. Usne Jesús tukin it kit ka kwianta:

—Anpat. Nawa mizha. Nune ñamin inintamika Davidpa kwal i. Nawa kiwaincha. Kwail saliz ap pashura pizta akwa, ap pashune kwisha naizmiztui, kizta.

23 Jesúsne ussa sinkarachi. Suasne paiña kammuruzne Jesússta aat kit ka paikuara:

—An ashampa paiña pashu akwa paikumtu akwa, us paikumtu aizpa kit kit ussa attishta ininti. Usne au kwizpa tinta kwiantu.

24 Suasne Jesúsne an ashampara kaizta:

—Diosne nawa Israel awaruza ininta. Uspane piriku karituzkanain uzamtu, piriku izmumika mijchi akwa.

25 Ashampane kasha it kit us iztakin wakpuj wain kit kaizta:

—Anpat mizha. Kiwaincha, kizta.

26 Jesúsne ussa sinkara:

—Nane Judío awaruza kiwainarawash. Sunkana pashpawa kumira nakasachish, kwizaruza kwinna. Kawarain nane Judío awaruza kiwainarawash, Judío awachiruza kiwainarachin.

27 Usne kaizta:

—Watcha Anpat. Nu watcha i kaiztukas, kwizakas pamikawa mishariras pak taizka sak kit kum. Sunkana, na Judío awachi akwa, nawa pitchin kiwaincha, kizta.

28 Suasne Jesúsne ussa kaizta:

—Ashampa mizha. Nu kwisha wat nijkultit akwa, nu pashimtu aizpa kinash, kizta.

Sun urain paiña pashune kakultit.

Jesúsne akkwan inturuza kakulninnamtu

29 Jesúsne tas puz kit Galilea pimamin pianara. Kwiztane maza izara nut kit sua uzta. 30 Kwisha akkwan awane us tukin aara. Uspane chasachiruzakas kasu izsachiruzakas pit parasachiruzakas sail puil patturuzakas pimpul kwail mijtuzakas an akkwan inturuzakas karaara, Jesús kakulninnanapa.

31 Jesús kit aizpa izarawane, awa sun izararuzne iztasparit. Pit parasachiruzakas paraara. Sail puil patturuzne wat parit.

Chasachiruzne chaara. Kasu izsachiruzne izara. Watsal iztasparit kal izarit akwa, uspane Israel awawa Dios kwisha wari kizamizta.

Jesúsne ampara mil awara kumira kwinamtu

(Mr 8.1-10)

32 Suasne Jesúsne kammuruza akwanat kit kaiznara:

—An awane nakasa kutña payukima chaamtu. Mane uspa kumira mijchi akwa, kiwainashimtus. Nane usparuzpa yalta ininashimtachish, uspa kumira kwatchi akwa, miwara najarin akwa.

33 Suasne paiña kammuruzne mimara. Apain akkwan awa uzamtuchi akwa,

—¿Mintama kumira sayanapai? An sukinne minminkas uz chi, chiwazha paina, kizara.

34 Jesúsne mimanara:

—Une ¿Yawa pan mijmakpas? kiznara.

Uspane kaizara:

—Siete pankas akkwan pishkaruchikas mijmakpas, kizara.

35 Suasne Jesúsne awaruza ininnara, pilita uzanapa. **36** Usne siete pankas pishkarukas sap kit Diosta aishtaish kizta. Suasne kiz kit kammuruza nailnara. Uspane awaruza nailnara. **37** Wanne tuktakima kuat. Wan kwatpane, uspane tiztit aizpa siete timta winñara. **38** Ampara mil ampune kuara. Ashampakas pashpakas winñamtachin kuara. **39** Kwiztane Jesús awara “iru” kiz kit kanuara wat kit Magdala sura imizta.

Fariseo awakas Saduceo awakas Jesústa chiyuras iztasparit kal kinpa paikuumtu

(Mr 8.11-13; Lc 12.54-56)

16 ¹ Fariseo awakas Saduceo awakas Jesústa iat kit paikua-ra, chiwazha chiyuras iztaspat kal kinpa. Us iztasparit kal kikane, uspane ussa kwail kimtu kizshiara, awa us akwa kwail minñanapa.

² Jesúsne usparuzpa sinkanara: “Nashmizkane, kwanam parikane, une ‘tilawa watsal kinnazi,’ kizamtu. ³ Kinmizkane, ‘Une mane kwail payu anpai’ kizamtu, ‘wanish siptit akwa, chiyu kwanam iztit akwa.’ U chiyura kimtu aizpa wat piankas, une ma payu na kimtu aizpa wat piankamasachi. ⁴ U kwail awa chiyuras iztasparit kal izshiamtukas, une Diosta an wat piankama-

shitchi. Diosta kanpaashimtuchi akwa, une kwail cha ashampakana chaamtu. Mane iztaspat kal u iztukin kimanash. Une maz tuntu kal izanazi. Une Jonásta kit aizpakana izanazi.”

Suasne Jesúsne awaras irit.

Fariseo awa kamtamtu aizpa kwail i

(Mr 8.14-21)

5 Pi kwakkarawane, kammuruzne pan milna mainñarit.
6 Suasne Jesúsne kaiznara:

—Fariseo kamtamtu aizpakas Saduceo kamtamtu aizpakas kwiraruin. Uspa kamtamtu aizpa kiñakana i. Kiñane chiwazha sulnin kit wan chiwal maiznamtu.

7 Suasne kammuruzne usparuzpain kaizamizta:

—Au pan karatchi akwa, Jesúsne sunkana kaiztu.

8 Jesúsne uspa minñamtu aizpa nijkul kit kaiznara:

—¿Chikishma pan karazamanas kizamtuas? Une nawa wat nijkulamtuchi. 9 ¿Na kaizta aizpa wat mímtechimakkiwas? Nane cinco pankasain cinco mil awara nailnarau. ¿Yawa pak tiztít tímta winñara? ¿Nijkultuchimakkiwas? 10 Nane siete pankasa ampara mil awara nailnarau. ¿Yawa pak tiztít tímta winñara? ¿Nijkultuchimakkiwas? 11 ¿Mizama na kaizta aizpa nijkulamtuchi? Nane panpa paramtuchish. Kiñawa paramtuchish. Nane Fariseo kamtamtu aizpakas Saduceo kamtamtu aizpakas paramtus, u uspa kamtaamtu aizpa kiamanpa.

12 Suasne kammuruzne Jesús kaizta aizpa piankamarit. Jesúsne panpa kiña kamtanarachi. Usne Fariseo kamtampakas Saduceo kamtampakas kamtanara, uspa kamtamtu aizpa kiamanpa. Kuiraruin.

Pedrone Jesús Dios niritmika i kiztu

(Mr 8.27-30; Lc 9.18-21)

13 Filipowa Cesarea sura pianatpane, Jesúsne kammuruza mimanara:

—Awane ampu namtítmikawa paraamtu. Uspane ¿nane minma i kizamtu?

14 Uspane sinkaara:

—Minpazha nune Juan munnammika i kizamtu. Mamaztuzne “nune Elías, ñamin Dios kainammika i” kizamtu. Mamaztuzne nune Jeremías, ñamin Dios kainammika, i kizamtu.

M̄inpazha “nune mamaz ñamin uztamika, Dios pit kainammika i” kizamtu.

15 Suasne Jesúsne m̄imanara:

—Une ¿Chima minmuspas? Nane ¿m̄inma ish?

16 Suasne Pedrone kaizta:

—Nune Dios n̄iritmika i. Nune Cristo muntitmika i. Nune chiyuras Dios Painkul i, kizta.

17 Jesúsne Pedrora, Jonás̄pa painkulta, sinkara:

—Nune watsal kianazi. M̄inminkas nu pian aizpa n̄ijkulnintachi. Ap chiyuras Taittain sunmin nua n̄ijkulninta. 18 Nane up mun maizninnash. Ñamin nune Simón muntit. Nu nawa kaizta akwa, nane makis nua Pedro munnintus. Nu tinta akwa, m̄inminkas nua maizsachi. Nane wan nawa piantuzakas wan na kamtamtu aizpa m̄imturuzakas kiwainnash, na kaizta aizpa n̄ijkulanapa, an kamtam akwa tinta ukkana namanapa. Uspa purakis wan ñin saliztuzne nawa piantuza anuppasachi. 19 Nane nua ñinmika naminnash, Dios kaizta aizpa m̄imturuzakurunnana, nu Dios akwa paranapa. Nune awaruzachiwazha wat aizpakas chiwazha kwail aizpakas kamtanana. Nu wat kimturuzak u wat kiamtu kiznarane, Dioskas sunkana kiznazi. Nu kwail kimtuza u kwail kiamtu kiznarane, Dioskas sunkana kiznazi.

20 Suasne Jesúsne kammuruza ka kurunnara:

—M̄inainkas “nane Dios n̄iritmika ish” kizman.

Jesús nane ir̄inash kiznamtu

(Mr 8.31-9.1; Lc 9.22-27)

21 Sun payuin Jesúsne paiña kammuruza “nane Jerusalén pipulura ir̄inash” kainanamizta. “Judío ilaparuzkas katsa pariya ñintuzkas Moisés parit aizpa kamtamtuzkas nawa kwisha naizninana. Uspa nawa piantarawane, nane kutña payura ir̄ittas kuhsnash.” 22 Pedrone Jesús̄ta paimpa mit kit tinta pilchapuz kit kaizta:

—Nu kaizta aizpa kaizmun. Nu kaizta aizpa nua kimanazi, kizta.

23 Jesúsne puijchat kit Pedrora kaizta:

—Nakis paimpa iri. Nune Satanáskana mintu. Nune nawa kiwaintuchi, Dios pashimtu aizpa kin. Nu awakana mintu akwa, nune Dios mintukana mintuchi.

24 Suasne Jesúsne kammuruza kaiznara:

—Minpazha nawa kanpammika namshitne, usne usmin pashit aizpakin maintawa, Dios pashimtu aizpa kin. Naiztukas, kurishta irimtukas, usne nawa kanpamiztawa. ²⁵ Nawa kanpashitchimikakas au sura watmin uzshitmikakas paiña izpul karinazi. Na akwa iritmikakas, na akwa uzshitmikakas, paiña izpul kamanazi. ²⁶ Minpazha wan sukin pura aizpa kana kitkas, izpul karitmikane chinkas mijchianazi. Kwazpamikanane paiña izpul watsat milnana pial tasachi. ²⁷ Nane, Ampu namtitmikane, chiyuras anash. Na akane, ap Papihshne nawa paiña ángeltuzakas ininnanazi. Usne nawa piantuza chiwazha milam tananazi. Ap kal kimturuzne sun milam sappanazi. ²⁸ Watcha kaiznamtus. Minpazha ma payu uztuzne iamanazi, Ampu namtitmika awaruza ininnamtu izanakima. Usne katsa mikwakana iztinazi.

Jesúsne kai sanazi

(Mr 9.2-13; Lc 9.28-36)

17 ¹ Seis payu pailkane, Jesúsne Pedrorakas Santiagorakas Juantakas, paas aimpish parain, paimpa akwanat kit kwash izarakima minara. ² Suane usne uspa iztakin mamaz tuntukanain maiztit. Paiña matsihne pñanaztamkana malta. Paiña kwaksham impilkanain putchã iztit. ³ Masain uspane Moiséstakas Elíastakas izara. Uspa paas Jesúska kwinta kiamtazi. ⁴ Pedrone Jesúska kaizta: “Anpat, kwisha wat tumakpas akkine. Nu pashitne, nane kutña ainki yal sanash. Mazane up, mazane Moiséska, mazane Elíaska.” ⁵ Pedro paramtuasmin, naztam wanish taiz kit usparuza sipnara. Diosne wanishkin kaiznara: “Anne ap painkul i. Ussa kwisha pashimtus. Usne ap naritmika i. Us kimtu aizpa wari pianish. Us kaiztu aizpa mirain.”

⁶ Sun mirawane, kwisha ishkuamtu akwa, paiña kammuruzne matsih pilita wainñara. ⁷ Suasne Jesúsne uspa purakin it kit usparuza panat kit kaiznara. “Kuhstain. Ishkuman,” kiznara.

⁸ Kasu izkulakane, uspane minainkas izarachi. Jesúska izara. ⁹ Kwash izaras kihshamtuasmin, Jesúsne ka kurunnara:

—U izara aizpa minainkas kainamman, Ampu namtitmika irittas kuhsnakima.

¹⁰ Katmizna paiña kammuruzne Jesúska mimaara:

—Moisés parit aizpa kamtamtuzne “Elías Cristokin, Ampu namtitmikakin, an ñancha anazi” kizamtu. ¿Chikishma sun kizamti?

11 Jesúsne sinkanara:

—Watcha, Elíasne an ñancha atmika azi. Usne awaruza kurunnanazi, wan watsananapa. 12 Nane kaiznamtus. Awa ussa piankamarachikas, Elíasne me arit. Uspane uspa kwail kishiarit aizpa ussa kiarit. Sunkanain awane Ampu namtitmikasha naizninat kit piantanazi.

13 Suasne paiña kammuruzne Jesús Juan munnammikawa kaizta piankaamara.

Jesúsne salizta puznintu

(Mr 9.14-28; Lc 9.37-43)

14 Awa purakin piannaakane, maza ampune Jesústa at kit us panakin wain kit kaizta:

15 —Anpat. Ap painkulta kiwainti. Usne ul kit kwisha naizmitzu. Kwisha akkwan pijikima ñntakas pirakas taizta. 16 Na up kammuruza karanarakas, uspane ussa kakulnintachi.

17 Jesúsne wan awaruza kaiznara:

—Une mama nawa nijkulamtuchi. Une watcha piankama-shitchi. Nane ukasa akkwan payuchin uznash. Uruza tailchasa-chish. Up painkulta apa nawa karat, kizta.

18 Sun urain Jesúsne salizta tinta kaiz kit inin kit pashparas puzninta. Sun urain wat parit.

19 Kwiztane kammuruzne Jesúska paimpa kwinta kiat kit ka mimaara:

—¿Chitma aune saliz puzninsachimakpas? kizara.

20 Usne sinkanara:

—Nawa we nijlulamtu akwa, une salizta puzninsachi. Watcha kaiznamtus. Ma pitchin nijkultumikane “sun izará pi kwakara it” kizshina. Suasne sun iza kwakara irinazi. Wemin nijkultumikane akkwan chiwazha kinazi. 21 Dios akwa pala kwatchin chamtuasmin, Diosta paikuamtuasmin, une sun tuntu salizta puzninshinai.

Jesúsne mamasa inash kiztu

(Mr 9.30-32; Lc 9.43-45)

22 Galilea suwara parejuin chaamtuasmin, Jesúsne kaiznara:

—Kwail awaruzne nawa, Ampu namtitmikara, pizat kit ma-

maztuza chihkaanazi, nawa piantanapa. ²³Nawa piantarawane, kutña payura kuhnash.

Us kaizta aizpa miarawane, uspane kwisha tayalamizta.

Judío wanmakmu yalkin pial tamtu

²⁴Jesúskas, paiña kammuruzkas, Capernaum pipulura pianakane, Dios yalkis awaruzne, pial sapmuruzne, Pedrorá iat kit mimaara:

—Up kamtam Dios yalkin napkane, ¿Up kamtammikane pial tanasa? kizara.

²⁵Pedrone sinkanara:

—Watcha. Usne pial sapmuruza pial tamtu.

Kwiztane Pedrone Jesús tukin yalta napta. Pedro parachasmin, Jesúsne an ñancha ussa kaiz kit parat:

—Pedro, nune ¿Chi mintus? Wan sukin katsa mikwaruzne gobiernowa pial sappamtu. ¿Minmikama katsa mikwara pial tamtu? ¿Uspa sukin uztuzne pial taamtuki? ¿Mamaz suras anupparittuzne pial taamtuki? kizta.

²⁶Pedrone sinkara:

—Mamaz suras anupparittuzne pial taamtu.

Jesúsne kaizta:

—Suasne, au Diosta piankamamtu akwa, Dios aumiza ininamtu akwa, aune Dios yalta napna sun pial taasachimakpas. Sun Dios yal ininturuz na kaizta aizpa piankamasachi akwa, taarawamakpas, usparuza aizappamanpa. ²⁷Mane na kaiztu aizpa nu kitpa, pial sapmuruz aliz kulamanpa. Pira it kit ñampi pira kiinti. An ñancha pishkaru tainaktash. Nune pishkaru pita pial wanmalnazi. Sun pialkasa na akwakas nu akwakas pial sapmuruza tanashina.

¿Minma an tintamika i?

(Mr 9.33-37; Lc 9.46-48)

18 ¹Maza payune kammuruzne Jesústa iat kit mimaara:

—Dios inintukin ¿Minma an tintamika i?

²Suasne Jesúsne pashpara akwat kit uspa paizkakin kunnin kit ³kaiznara:

—Watcha kaiznamtus. U mintu aizpa maizarachine, pashpanain namarachine, une Dios inintukin nappamanazi. ⁴Dios inintukin an tinta namtamikane “nane an warish” minmanazi.

Usne an pashpakanain namtawa, “nane an tinta ish” mintachin. 5 Minpazha na akwa an pashparakanain kiwainshimtune, nawa-kas wat min kit saptu.

Mamazta kwail kinintane, kwail i

(Mr 9.42-48; Lc 17.1-2)

6 “Minpazha an pashparuzakanain, nawa we tinta nijkultuza, kwail kininnarane, uspane kwisha naizarinazi. Mamazta kwail kintuchasmin, ina an wari. Anza wari katsa kimu ukkasa paiña timpukin kuh kit pi pinta kiakpinna. 7 Au sukin akkwan tuntu kwail wa. Minpazha nawa nijkulturuza kwail kininturuzne an sura kwisha naizarinazi. Apas awa mamaztuza kwail kininnamtukas, mamaztuza kwail kininturuzne an akkwan naizana, uspa kwail kiarit akwa.

8 Katmizna, uruzpain kwiraruin. Awane chihtikas mittikas waj. Uspa chihtikasa kwail kinturuzkas kwail kin chamturuzkas maizarawa, uspa mittikas kwail kiamanpa, awa kwail kiamtukin chamanpa. Chihtikasa kwail kintuzkas awa kwail kiamtukin chamturuzkas Dios uztukin nappasachi. Īnta ianazi. 9 Awane kasu waj. Chiwazha kwail saimtumikane kwail min kit kinazi. Kwail kin saimtuchimikane Dios uztukin napnazi. Kasukasa kwail sait kit kintumikane ĩnta ĩrinazi. Katmizna kwail saiman, ĩnta iamanpa.”

Piriku karit kamtam kwinta

(Lc 15.3-7)

10 “Mirain. Pashparuzpakas nawa wat we piantuzpakas kwail minñanachi. Watcha kaiznamtus. Ángeluzne nawa we piantuza iznat kit au chiyuras Taitta iztakin pura. Uspañe pailta payukima Diosta izamtu. 11 Ampu namtĭtmikane apa at, ussa pianchiruzakas karittuzakas watsat milnana.

12 Sun kwinta mirain. Maza ampune cien piriku mij. Maza piriku karikane, pirikuwamikane noventa y nueve pirikuruza ĩzara kwaittarit kit maza piriku karitmikara saimĭztu. 13 Karit pirikura wanmaltane, usne sun piriku akwa anza wat kultit uz. Usne noventa y nueve piriku kaarachiruzpa wemin mintu. 14 Sunkanain au chiyura Papihshne nawa we piantuza, pashpakanaintuza, kiwainnashimtu. Mazantuz karintukas, usne usparuza watsat milnashimtu.”

Diosta piantuza wat kultawamakpas

(Lc 17.3)

15 “Mamaz awa nua kwail kikane, nune ussa paimpa it kit us kwail kit aizpa piankamnintawa. Nu kaizta aizpa mirane, usne up izmuruz namnazi. 16 Us nua mishimakane, paastakas kutñarakas wanmaknintawa. Suasne nune uspa iztakin paiña kwail kit aizpa kainarawa, kutñaruz piankamnapa.^c 17 Suasne uruza mishimakane, nune iglesia wanmakmuruz us kwail kit aizpa piankaminarawa. Iglesia wanmakmuruz kaizara aizpa mishimakane, une ussa ka mintain: Nune Dios pianchimikakana i. Nune Diosta nijkultuchikana i.

18 Watcha kaiznamtus. Une awaruza chiwazha wat aizpakas chiwazha kwail aizpakas kamtananazi. U wat kimtuza ‘u wat kiamtu’ kiznarane, Dioskas sunkana kiznazi. U kwail kimtuza ‘u kwail kiamtu’ kiznarane, Dioskas sunkana kiznazi.

19 Mamaz pitkas uruza kaiznamtus. An sukin paas awane nijkul kit nijkulpailshina. Diosta paikukane, ap chiyuras Taittane u pashimtu aizpa milanazani. 20 Paaskas kutñakas na akwa wanmakkakane, nane uspa paizkakin tuanash.”

Kiwainmumika mamazpa kwail wat kulshitchi

21 Suasne Pedrone Jesúsata it kit mimara:

—Anpat. Ap aña nawa kwail kitne, ¿Yawa pijikima paiña kwail kimtu aizpa wat kultawaish? ¿Ussa siete pijikima wat kultawaki?

22 Jesúsne sinkara:

—Ussa siete pijikimain wat kulman. Nune aimpishsta an akkwankima, ciento cuarenta pijikima, ussa kwail kirít aizpa wat kultawa.

23 “Katmizna, nane maza kamtam kwinta kainanash, miza Dios inintu piankamanapa. Katsa mikwane paiña kiwainmuruz akwanara, paiña pialpa pui aizpa kwinta kin. 24 Paiña pialpa kwinta kimiztuasmin, mikwane mazara ininta, maza kwisha puimikasha karan. Usne 10.000 kilo pial puiara. 25 Paiña kiwainmika wan pial mijchi akwa, usne paiña pui aizpa tasachi. Suasne pamikane paiña pit ininta, kiwainmikarakas paiña ashamparakas paiña painkultuzakas wan mij aizpa paininnapa,

^c 18.16 Dt 19.15

pui aizpa taanapa. ²⁶Suasne kiwainmikane pamika iztakin wakpuj wain kit paikwat: ‘Anpat mizha. Ma pitchin tirizti, pial sainakima. Nua wan tanash,’ kizta. ²⁷Us akwa tayaltu akwa, pamikane ussa kiwainshit kit us wan pui aizpa wat kulta. Chin-kas saptachin, ussa chihtta.

²⁸Tas puztawane, sun kiwainmikane mamaz kiwainmikara wanmalta. Usne ussa we pui. Ussa kwilkin tulpiz kit kaizta: ‘Nu pui aizpa tazha.’ ²⁹Suasne paiña kiwainmikane us iztakin wakpuj wain kit kaizta. ‘Ma pitchin tirizti. Na pui aizpa tanash,’ kizta. ³⁰Sunkana usne tirizshitchi. Usne puimikara kajchira sipninta, pui aizpa tanakima. ³¹Mamaz kiwaintuz sun izarawane, uspane kajchira siptitmika akwa kwisha tayalat kit uspa pamikara sun kit aizpa kainanara. ³²Suasne pamikane an ñancha pui wat kultitmi-kasha akwanpa inin kit kaizta: ‘Nune kwail kiwainmika i. Nu nawa paikwara akwa, nane wan nu pi aizpa wat kultau. ³³Nukas na nu pui aizpa wat kultitkana mamaz kiwainmikasha wat kulkamtish.’ ³⁴Suasne anpatne kwisha pilchapuz kit ussa kajchira inin kit ussa sipta, naiznapa, wan chiwal pui aizpa tanakima.”

³⁵Kapal kwinta kitpane, Jesúsne kaiznara:

—Une u aimpish kwail kiati aizpa watcha wat kularakine, u chiyuras Taittane u kwail kiamtu aizpa wat kulmanazi.

Ashampa mijne, ussa kwaikain

(Mr 10.1-12; Lc 16.18)

19 ¹Kapal sun pit kamtanarawane, Jesúsne Galilea sukis puz kit Judea sura it. Jordán pi pñ puzmumal piannara. ²Kwisha akkwan awane ussa kanpaarit. Suane inturuza kakultanara.

³Suasne minpazha Fariseo awane Jesús tukin aara, ussa kwail kininna. Ussa ka mimaara:

—Ampu paiña ashampara an pashitkine, ¿Ampune chiwazha akwa ussa kwaishinaki? mimaara.

⁴Jesúsne sinkanara:

—Une Dios paiña pinkihta panintit aizpa izara. An ñamin awa sarawane, Diosne “ampurakas ashamparakas sara.”^d ⁵Ankas kaiznara: “Sun akwa ampune paiña papihshtakas paiña akkuhshtakas paimpa inazi, paiña ashampara wanmakna. Paasas maza awakanain namnazi.”^e ⁶Sunkana uspane paas awa chi.

^d19.4 Gn 1.27; 5.2 ^e19.5 Gn 2.24

Maza awain. Katmizna Dios ampurakas ashamparakas wanmakninta akwa, minminkas sun paasta kwainnachi, paimpa uzmanpa.

7 Suasne Fariseo awane Jesússta mimaara:

—Moisés ka parit: “Ashampara kwaishitne, ampune ashampara kwaina pinkih chihkatpa.”^f ¿Sunne chitka parit?

8 Jesúsne sinkanara:

—U Dios pashit aizpa kiashimtuchi akwa, Moisésne kwaina pinkih chihkashina kiznara, ashampara kwainapa. An ñamin Diosne sunkana pashitchi. 9 Nane sunkana kaiznamtus. Ashampama mamaz ampukasa pittane, paiña ampune paiña ashampara kwaina kit chihkashina. Paiña ashampa mamazkasa pittukine, usne paiña ashampara kwaisachi. Sun ampu paiña ashampa mamaz ampukasa pittachimikasha kwairane, sun ampune kwail kinazi, mamaz ashampara miltane. Sun kwairit ashampara miltumikane kwail kinazi.

10 Kammuruzne Jesússta kaizara:

—Ampu paiña ashampara kwaisachine, anza wat ashampara milnachi, kizara.

11 Jesúsne sinkanara:

—Wanne Dios kaizta aizpa piankamasachi. Diosne ashampara miltumikasha kiwainnashina, paiña ashampakasa wat uznanpa. 12 Pashparasmin minpazha ampune kasara kisachi. Awane mamaztuza kasara kininarachi. Minpazha ampune ashampara milshitchi, Dios inintukin kal kinpa. Na kuruntu aizpa mishimturuzne na kaizta aizpa piankamtawa.

Jesúsne pashparuza wat kinamtu

(Mr. 10.13-16; Lc 18.15-17)

13 Suasne uspane minpazha pashparuza Jesússtakin karaara, paiña chihtikasa paat kit uspa akwa Diosta paikwanpa. Kammuruzne pashparuza karamtuza pilchaapuzta. 14 Suasne Jesúsne kaiznara:

—Nakin pashpa karaman kizman. Awane an pashpakanain Dios inintukin uzanazi.

15 Pashparuza paiña chihtikasa paanarawane, suas irit.

^f19.7 Dt 24.1



*Awa pashparuza Jesús
tukin karaamtu*

Musittu kwazpamika

(Mr 10.17-31; Lc 18.18-30)

16 Maza musittune Jesús pakin it kit mimara:

—Wat Anpat. ¿Chi wat kalma kinpai, chiyura pailta payuki-
ma uzna? kizta.

17 Jesúsne sinkara:

—¿Chitma nawa wari kiztus? Diosmin wari. Sunkana chiyu-
ra uzshitne, Dios kaizta aizpa kiri, kizta.

18 Musittune kaizta:

—¿Chima kinpai? Diosne akkwan pit ininta.

Jesúsne sinkara:

—“Awara piantamun. Mamaz ashampakasa pitmun. Walku-
mun. Minainkas pirail kaizmun. 19 Papihshpakas akkuhshpakas
wat mintawa. Nuin pashimtukanain makin uztuza pashinara-
wa,”[§] kizta.

20 Musittune sinkara:

—Nane pashpa asmin nu kaizta aizpa kirau. ¿Anne chima
kinpai?

21 Jesúsne kaizta:

[§]19.19 Éx 20.12-16; Dt 5.16-20; Lv 19.18

—Nu wan nil kishitne, nune wan mij aizpa painin kit puizara milanarash. Sunkana kitne, nune chiyura pān kulnazi. Kwiztane nakin at kit nawa kanpazha, kizta.

22 Sun mirawane, musittune tayal kit irit, kwisha kwazpa akwa.

23 Suasne Jesúsne kammuruza kaiznara:

—Watcha kaiznamtus: “Kwazpamikane kwisha sam i, Dios inintukin napna.”

24 Mamasa kaiznamtus. Camellone chihku kasura napsachi. Kawarain pān kulshitmikane Dios inintukin napsachi.

25 Sun miarawane, kammuruzne kwisha iztaspaat kit usparuzpain mimaara:

—Kwazpa awa Dios inintukin nappasachine, suasne minminkas watsat milmanazi.

26 Jesúsne usparuza iznat kit kaiznara:

—Awane usparuzpain watsat milnasachi. Diosmin chiwazha awaruza watsat milnashina.

27 Suasne Pedrone Jesússta kaizta:

—Aune wan mij aizpa chihkaritmakpas, nua kanpana. ¿Chima saptawaime?

28 Jesúsne sinkanara: “Watcha kaiznamtus. Mamaz payura Diosne wanta masas namnintinazi. Sun payura nane, Ampu namtitmikane, Dios inintukin uz kit kwisha naztam malnash. Une, ap kanpamturuzne, doce inintukin nakasa uzanazi, doce Israelpa kwaltuza ininnana. 29 Nawa kanparamikane, minpazha na akwa yalkas, aimpishtakas, kwampishtakas, papihshtakas akkuhshtakas painkultakas paiña sukas chihkatmikane, apain an akkwan pijikima sappanazi. Kwiztane chiyura pailta payukima uzanazi. 30 An sukin an tintaruzne Dios inintukin an we tintakana namanazi. An sukin an we tintaruzne Dios inintukin an tintaruzkana namanazi.”

Kal kimmikawa kamtam kwinta

20 1 Suasne Jesúsne ka kamtanamizta: “Dios ininkane, usne su pamikakana i. Su pamikane tilawain it kit kal kimtuza sainara, wankail pippa pakna. 2 Usne kal kimtuza pial tana namninnat kit paiña sura ininnara, kal kianapa. 3 Nueve urara pakane, usne awa wanmakchamkin it kit awa kal kishimturuzsa sainara. 4 Usne kaiznara: ‘Ukas ap kal kin irain. Nane nil tana-

nash,' kiznara. Uspane kal kin iara. ⁵Pamikane mamasa paizka payu pakakas, kutña urakas puzta, kal kimtuza sainana. Usne sun pitmin kaiznat kit ininnara, paiña kal kianapa. ⁶Cinco ura pakakas, usne awa wanmakchamkin puzta. Mamaz kal kimtuchiruzawa wanmaknat kit kaiznara: '¿Chitka une akki mansih pura, kal kimtuchin?' mïmanara. ⁷Uspane kaizara: 'Minminkas aumiza kal kin namninnarachi.' Suasne usne kaiznara: 'Une ap sura kal kin irain. U kal kit aizpa tananash,' kiznara.

⁸Tilpamizkane, pamikane paiña kal ininmikara kaizta: 'Kal kimtuza akwanat kit pial tanamizti. Kwizta piannattuzakas an ñancha tanamizti. An ñancha pianattuzakas an kwizta tanamizti,' kizta. ⁹Suasne cinco horara naptuzne iat kit maza payus kal kitkana sappara. ¹⁰Kwiztane an ñancha mansih naptuzne iara, uspa pial sappana. Uspane an akkwan sapanash minñara. Uspane maza payus kal kit kitkana kapal sappara. ¹¹Pial sapparawane, uspane pamikara pilchapuzamiz kit ¹²kaizara: 'An kwizta aaruzne maza urain kal kiarakas, nune usparuza aumizakanain tanara. Aune mansih kalkas ikas tailchatmakpas,' kizara. ¹³Pamikane sinkanat kit mazara kaizta: 'Izmuruz. Nane nua kwail kain kinintachish. Nane nukasa sunpawa pial tana namtau. ¹⁴Up pial sap kit it. Nane kwizta kal kin atmikashakas nuakanain sun pawain tashimtus. ¹⁵Nane ap pialkasa na pashit aizpa kishinash. Nane uspa akwa wat kinarau. Nune pilchapuznachi.' Sun kwinta sunkana pailti.

¹⁶Dios inintukin sunkanain anazi. An kwizta naptumikane an ñancha naptumikakana namnazi. An ñancha naptumikane an kwizta naptumikakana namnazi. Dios akkwantuza ussa kanpaana akwannaritkas, usne akkwanchin nanarit."

Jesúsne mamasa "nane inash" kainammtu

(Mr 10.32-34; Lc 18.31-34)

¹⁷Jerusalén pipulu miwara imtuasmin, Jesúsne paiña doce kammuruza paimpa milnat kit kaiznara:

¹⁸—Mane aune Jerusalén pipulura numiztumakpas. Tane Judasne nawa, Ampu namtïtmikasha, pariya ininturuzakas Moisés kaizta aizpa kamtamtuzakas chihkaanazi, na inapa kizana. ¹⁹Uspane nawa Judío awachiruzawa chihkaanazi, nawa ishaanapa, nawa aim kianapa, nawa tira patpïantanapa. Kutña payu pailtikane, nane mamasa kuhsnash, kiznara.

Santiagowakas Juanpakas akkuhshne Jesússta paikumtu

(Mr 10.35-45)

20 Suasne Santiagokas Juankas, aimpish parain, uspa akkuhshkasa Jesús tukin aara. Uspane Zebedeo painkul mai. Akkuhshne Jesús iztakin wakpuj wainta, chiwazha paikwan.

21 Jesúsne ussa mimara:

—Nune ¿Chima pashiras?

Usne kaizta:

—Na paikwantu aizpa kiri. Nane ap paas painkul u nukasa ininnapa pashirash, maza numal uznapa, mamaz kwiyamal uznapa.

22 Jesúsne aimpishstuza sinkanara:

—Une u paikuantu aizpa pianchi. Nane kwisha naiztinash. ¿Une nakanain naizmu tailchashina?

Uspane sinkailta:

—Aune naizmu tailchashinawas.

23 Jesúsne kaiznara:

—Watcha kaiznamtus. Une kwisha naizmu tailchailnazi, awa uruza kwisha naizninamtu akwa. Nakasa ininna uzashimtukas, nane uruza ap numalta ap kwiyamalta uznapa kizsachish. Ap Taittane apmamin uztuza nanarit me, kiznara.

24 Mamaz diez kammuruz sun miarawane, uspane paas aimpishstuza pilchapuzara. 25 Jesúsne kammuruza akwanat kit kaiznara:

—Une katsa mikwawa wat pian. Judío awachi ininturuzne wan awaruza ininnamtu. Katsa mikwaruzne tinta ininnamtu, uspa kal kianapa. 26 Uruzpain sunkana kiman. Kancha sunkana kiarain. Uruzpain an katsa namshitmikane mamazta kiwainnarawa. 27 Minpazha an ñancha ininmika namshitne, usne kiwainmikakana namshina, mamaztuza kiwainnana. 28 Kawarain Ampu namtitmikane awaruza ininnana atchi. Awaruza kiwainnana azi. Usne awa akwa inna azi, akkwan awa siptittuza chihtnana.

Jesúsne paas kasu izsachira kakulnintu

(Mr 10.46-52; Lc 18.35-43)

29 Jericó pipuluras puzamtuasmin, akkwan awane Jesússta kanpaara. 30 Suane paas kasu izsachiruzne mikin uzpailta. Jesús pintu mimtazasmin, paasne kwianpailta:

—Anpat. Nune Ininmika Davidpa kwal i. Aumiza kiwaincha.

31 Mamaz awaruzne usparuza chinkas kaizmun kiznara. Sun kaizarakas, uspane an tinta kwianpailta:

—Anpat. Nune Ininmika Davidpa kwal i. Aumiza kiwainchain.

32 Suasne Jesúsne kun kit kasu izsachiruzakwat kit mima-ra:

—U akwa ¿Chima kinpai?

33 Uspane sinkailta:

—Anpat. Au kasura izkulnincha.

34 Suasne Jesúsne usparuza kiwainshit kit uspa kasukin paanara. Sun urain sun paas izsachiruzne izkulpail kit Jesústa karpailta.

Jesúsne Jerusalén pipulura naptu

(Mr 11.1-11; Lc 19.28-40; Jn 12.12-19)

21 1 Jerusalén pipulura piannanpain. Betfagé pipulura piannachasmin, uspane Olivos izara kunnara. Jesús paas kammuruza akwanat kit ininnat kit 2 kaiznara:

—Au izkwakpara pipulura irain. Suane maza ashampa burra kantit wanmalpailnazi, ainki ampu burrokasa. Burrara chiht kit paasas nawa karaanaka. 3 Minpazha uruza chiwazha kaizkane, ka kaiztain: “Anpatne paasas pashimtu. Masakin an kwizta kailninnanazi,” kiznaka.

4 Sunkana Dios kainammika para aizpa kirit. Sunkana parit:

5 “Jerusalén pipulu uztuza kaiztain:

‘Iztain. Up katsa mikwane amtui.

Us wat akwa, kalpain uztu. Burrora anuztui.

Ainki kwa kamtitchi burrora anuztui.”^h

6 Suasne paas kammuruzne iil kit Jesús kaizta aizpa kiilta. 7 Ashampa burrora pashpa burrokasa karailtawane, kammuruzne uspa pñ ainki burrora palkwanat. Jesúsne anuzta. 8 Akkwan wanmaktuzne uspa pñ mikin kihamizta. Mamaztuzne ti kihwil tittat kit Jesús pintukin kihamizta, mi watsanapa. 9 An ña imtuzkas an kwizta imtuzkas ka kwisha watsal kwianamizta:

^h21.5 Zac 9.9

“An Diospa ininmikane, an Davidpa kwalmikane, kwisha wari.

An ñamin Davidne mikwa azi. Au Anpatne kwisha wari.

Chiyuras Diosne kwisha wari,” kizara.ⁱ

10 Jesús Jerusalén pipulura napkane, akkwan pipulu uztuzne kwisha kwiat kit kaizara:

—Sunne ¿minma kai?

11 Awane kaiznara:

—An kainammikane Jesús i. Usne Galilea suras, Nazaret pipuluras, ara.

Paininmuruz Diospa yalkin

(Mr 11.15-19; Lc 19.45-48; Jn 2.13-22)

12 Jesúsne katsa Diospa yalkin nap kit wan paininturuzakas paimturuzakas pianamal tinta ininnara. Pial maizmuruzpa mi-sharirakas utkuru paininmuruzpa uzmukas kiakpinnat 13 kit kaiznara:



Jesús painintuza Dios katsa yalkis ininnamtu

ⁱ21.9 Sal 118.26

—Dios pinkihta ka parit: “Diosne paiña yal sara, awa sua Diosta paikwanpa.”^j Une ap yalta nappamtu, awa mij aizpa walkuana.

14 Kwiztane minpazha kasu izsachiruzkas chasachiruzkas Jesús tukin aara. Usne kakultanara. 15 Katsa pariya inintuzkas Moisés kaizta aizpa kamtamtuzkas Jesús iztasparit kal kit aizpa izara. Pashparuzkas katsa Dios yalkin ka kwianara: “David ininmikawa pampa pashpane kwisha wari.” Judío awa inintuz sun miarawane, uspane Jesússta aliz kulat 16 kit kaizara:

—¿Uspa kizamtu aizpa mimitukish?

Jesúsne sinkanara:

—Watcha mimitus. ¿Une Dios pinkih parit aizpa izarachimakkiwas? Ka parit:

“Ainki pashparuzkas pashpa chitchu kumturuzkas Dios kwisha wari nil kizanazi.”^k

17 Suasne Jesúsne usparuza kwainat kit sun pipuluras puz kit Betania pipulura pitna napta.

Higuera ti pippa wachi

(Mr 11.12-14, 20-26)

18 Tilawain Jesúsne Jerusalén pipulura kail kit yak kira.

19 Usne higuera ti mikin iz kit kashara it. Ti kihmin waj wanmalta. Suasne Jesúsne higuera tira kaizta:

—Mizurainkas pippa wamanazi.

Sun payukis higuera ti pulpalmizta. 20 Mamaz payura sun ti izarawane, kammuruzne iztaspaat kit mimaara:

—An tine ¿mizamaka azain pulpaltimtu? Me inapain iztit.

21 Jesúsne sinkanara:

—Watcha kaiznamtus. Chiwazha Diosta paikukane, une Diosta wat nijkularawa, us kaizta aizpa maintachin. Sun minñamiztane, ukas sunkana higuera tira kiashinazi. Sunkana kalkas an tinta kalkas kiashina. Izara ianinshimtune, “une izara pirain iri” kizashina. Suasne izane u inintu aizpa kinazi. 22 Diosta nijkulturuz Diosta paikuakane, usne u paikuamtu aizpa kinazi.

^j 21.13 Is 56.7; Jer 7.11 ^k 21.16 Sal 8.2

Pariya inintuzne Jesústa mimaamtu

(Mr 11.27-33; Lc 20.1-8)

23 Suasne Jesúsne Dios katsa yalkin nap kit kamtanamizta. Katsa pariya inintuzkas ilapa Judío inintuzkas Jesústa iat kit mimaara:

—¿Chikishma sun kintus? ¿Minma nua ininta, sun kinpa?

24 Jesúsne sinkanara:

—Nakas chiwazha uruza mīmanash. Na uruza mīmanara aizpa sinkaarane, katne nakas minma nawa ininta ap kal kinpa sinkananash. 25 ¿Minma Juan munnammikara ininta? ¿Diosne ussa inintaki? ¿Awane ussa inintaki?

Uspane usparuzpain tinta kwinta kiamiz kit kaiznamizta: “Aune Dios ussa ininta kisachimakpas. Au sun kizakane, usne sunkana aumiza kiznazi: ‘Suasne une ¿chikishma us kaizta aizpa nijkularachi?’ 26 Aune ‘awa ussa ininta’ kizsachimakpas, awa aumiza ishkwinninamtu akwa, wan awa Dios Juanta ininta minñamtu akwa. Au sun kizarane, awane aumiza chiwazha kishina.” 27 Jesústa sinkaat kit kaizara:

—Minma Juanta ininta pianchimakpas.

Suasne Jesúsne kaiznara:

—Nakas minma nawa ininta an kal kin uruza kainammash.

Paas painkul kamtam kwinta

28 Jesúsne kaiznara:

—An kamtam kwinta wat mirain. Maza ampune paas painkul mijara. Maza painkulta kaizta: “Painkul, ap wankail pippa waritkin kal kirash.” 29 Painkulne ussa sinkara: “Kishitchish.” Kwiztane us minta aizpa maiz kit kal kin it. 30 Suasne papihshne mamazta izna it kit sunkanain kizta. Usne papihshta sinkara: “Watcha kal kinash.” Kwiztane usne itchi. 31 ¿Minmika papihsh pashit aizpa kirit?

Uspane kaizara:

—An ñanchamika papihsh pashit aizpa kirit.

Suasne Jesúsne kaiznara:

—Watcha kaiznamtus. Une kwiztamikakana mai.

Gobierno pial sapmuruzkas kwail ashamparuzkas ukin an ñancha Dios inintura nappanazi. 32 Juan munnannammikane at kit uruza miza uzna kamtanara. Une us kaizta aizpa nijkulara-

chi. Kancha Gobierno pial sapmuruzkas kwail ashamparuzkas us kaizta aizpa nijkulara. Wan sun izarakas, une maizarachi. Nijkularachi.

Kwail kal kintuz kamtam kwinta

(Mr 12.1-12; Lc 20.9-19)

33 Mamaz kamtam kwinta mirain. “Su pamikane paiña sukin wankail pippa wana it. Usne sun sukin kinta. Wankail pippa kim yal sara. Usne kwash yal sara, izmumika wankail pippa sau iznapa.

Suasne usne kal kintuza unanat kit attishta irit. **34** Paktu payu taizkane, su pamikane paiña kiwaintuza ininnara, paiña paimpa sapnapa. **35** Kal kintuzne kiwaintuza piznara. Mazara aim kiara. Mamazta piantaara. Mamazta uk kiara. **36** Su pamikane anza akkwan kiwaintuza ininnara. Kal kintuzne wanta sunkanain kinara.

37 Minpara usne paiña painkulta ininta. Usne ka minta: ‘Us-pane ap painkul kaizta aizpa mianazi.’ **38** Paiña painkulta amtuasmin, kal kintuzne paiña painkulta izarawane, uspane usparuzpain kaizara: ‘Anne su sapmumika i. Ussa piantana izhain, paiña su pakin.’ **39** Sunkana ussa pizat kit paiña sukis ukkat kit piantaara. **40** Suasne Jesúsne mimanara:

—Supamika akane, ¿Chima kinsa, sun kal kintuzkasa?

41 Usne kaizara:

—Usne sun kwail awaruza tinta naizninnanazi, inakima. Suasne usne mamaz kal kintuza unananazi, paiña paimpa pippa sapnapa.

42 Suasne Jesúsne mimanara:

—¿Une Dios parit aizpa izarachimakkiwas? Sunkana parit: ‘Yal samturuzne an watsal uk kiakpinara.

Kwiztane Diosne sun watsal ukkasa yal sarit.

Aune us sarit aizpa kwisha wari minpuspas.’¹

43 Katmizna kainammtus. U Diosta miashimtuchi akwa, une Dios inintukin nappasachi, uskasa ininna. Diosne mamaztuza napninnanazi, uskasa uzanapa, uskasa ininnanapa. Dios kaizta aizpa kishimturuzne Dios inintura nappanazi. **44** An ukta naintumikane pak pak kiztinazi. Uk minpazhara taiztane, ussa kiri-

¹21.42 Sal 118.22-23

nazi. Nane an ukkana ish. Nawa aliztuzne naizarinazi, pak pakkanain namanakima. Nawa kiakpinturuzne wan kaat kit polvokana namarinazi.”

⁴⁵Katsa pariya inintuzkas Fariseo awaruzkas Jesús kaizta aizpa miarawane, uspane Jesús usparuza kamtam kwinta kitta piankamara. ⁴⁶Katmizna uspane ussa pizshiara. Akkwan awa Jesús Dios kainammika i miantu akwa, inintuzne awa akwa ishkuat kit ussa pizarachi.

Kasara kin pishta kamtam kwinta

(Lc 14.15-24)

22 ¹Jesúsne mamasa usparuza paramiz kit mamaz kamtam kwinta kiznara:

²“Diosne paiña inintura sunkana kimtu. Katsa mikwane paiña painkul akwa kasara kin pishta sara. ³Paiña kiwaintuz kasara pishtara akwattuza ininnarakas, uspane aashitchi. ⁴Mamasa mamaz kiwaintuza, ininnara ka kaiznanapa: Akwarittuza kaiztain: ‘Nane kumkin kapal sarit mijash. Nane pintit wakara piantarau. Wan kapal sarit me. Kasara kit pishtara aana. ⁵Akwarittuzne miashitchi. Mazane paiña sura it. Mamazne paiña chiwazha paininmizta. ⁶Mamaztuzne mikwawa kiwaintuza piznat kit aim kiara, piantanakima. ⁷Suasne mikwane kwisha aliz kul kit paiña suldaruruza ininnara, paiña kiwaintuza piantamtuza piantanapa, uspa pipulura impaktanapa. ⁸Kwiztane paiña kiwaintuza kaiznara: ‘Wan kapal sarit, kasara kit pishta izna. Nawa paashitchi akwa, akwarittuzne aasachi, na kaizta aizpa miashitchi akwa. ⁹Katmizna une pipulu pianamal irain. Wan puizaruzakas uspa wanmaltukin akwanarain, kasara kit pishta izaanapa,’ kiznara. ¹⁰Kiwaintuzne pipulura pianamal puzat kit wanmaltaruza wanmakininnara. Kwailtuzakas wattuzakas wanmakninnara. Uspane yalta nappara, yal punnakima.

¹¹Suasne mikwane yalta napta, akwarittuza iznana. Usne maza ampu pishtara cham kamisha kwachira izta. ¹²Usne ussa kaizta: ‘Izmumika. ¿Mizamaka naptau, pishtara cham kamisha kwachine?’ Usne puñain parit. ¹³Suasne mikwane kumira nailmuruza kaiznara: ‘Ussa mittikas chihtikas kuh kit pianamal, tilkwilmal, ininti. Suane azat kit sula sit sit kinazi.’ ¹⁴Akkwan awaruz akwanarakas, Dios akkwan chin nanarit.”

Gobierno pial saptu

(Mr 12.13-17; Lc 20.20-26)

15 Suasne Fariseo awane suas iat kit wanmakkat kit usparuzpain kwinta kiara. Uspane usparuzpain nijkulat kit Jesúska kwinta kishiara, Jesús kwail pit paraninna. 16 Sunkana uspane uspa kammuruzakas Herodespa kanpamtuzakas Jesúska innara, ka kaizanapa:

—Anpat. Nu watcha kiztu akwa, nu wat awa i pianmakpas. Nune Dios inintu aizpa kamtanamtu, awa nil uzanapa. Nune awa minñamtu aizpa mirachi. Nune wantuza nil kaiznamtu, ishkwachin. 17 Nu mintu aizpa aumiza kainazhain. ¿Aune pial, Cesarta, Roma pipulu katsa mikwara, tana watsa?

18 Jesúsne uspa kwail minñamtu aizpa piankamta. Uspane Jesúska kwail kizninshiara, awa us akwa kwail minñanapa. Usne kaiznara:

—Une nil chammuruzkana uzamtuchi. ¿Chikishma kwail kiamtus nawa? 19 Une pial mikwara tamtu aizpa anchain.

Uspane ussa maza pial karaara. 20 Pial iztawane, Jesúsne mi-manara:

—Pialkin ¿minpa matsih makai? Pialkin ¿minpa mun parit makai?

21 Uspane sinkaara:

—Cesarpa matsih, Roma mikwawa matsih, pialkin uz, kizara.

Suasne Jesúsne kaiznara:

—Une apas sukin mikwara paiñawa milarawa. Ukas au Dios-takas watcha paiñawa milarawa.

22 Sun miarawane, uspane iztaspaat kit ussa tuij iara.

Uspane ¿irit kuhstu? mimaantu

(Mr 12.18-27; Lc 20.27-40)

23 Sun payune minpazha Saduceo awane us tura izna iara. Uspane iritmika irittas kuhstuchi kiz kamtaamtu. Katmizna uspane ussa kaizara:

24 —Kamtam, miri. Moisésne sunkana pat kit kaizta: “Ampu ashampara miltane, pashpa mijki irakane, aimpihshne paiña aimpihsh irit ashampara miltawa, pashpa mijan. Pashpa kawirane, irit aimpihshpa pashpakanain kawirarawa.”^m 25 Mane au-

^m 22.24 Dt 25.5

ruzpain siete aimpishsh uzara. An ilapamikane ashampara mil kit irit, pashpa mijchin. Pashpa mijchi akwa, aimpishsh kanmikane sun ashampara milta. ²⁶ Aimpishsh kanmikakas sunkanain irit. Mamaz aimpishsh kanamikakas sunkana kirit. Wan siete aimpishshtuza sunkana kiarit. ²⁷ Wan siete aimpishshkasa uzta-wane, ashampakas irit. ²⁸ Mane irittas kuhstu payura taizkane, ¿Minmikama siete aimpishshtas ashampara milnasa? Wanne sun ashampara milarit. Sun akwa irittuzne irittas kuhsamanazi, kiz-ara.

²⁹ Sun akwa Jesúsne sinkanara:

—Une ñanta kiarit, u Dios pinkihta parit aizpa pianchi akwa. Une Dios kishimtu aizpa piankamarachi. ³⁰ Awa irittas kuhsara-wane, ampune ashampara milmanazi. Pashurakas milmanazi. Wanne Diospa ángelkana chiyura puranazi. ³¹ Mane irittuzne irittas kuhsanazi. Watcha, une Dios parit aizpa izara. Sunkana kaiztit: ³² “Nane Abrahampa Dios ish. Isaacpa Dios ish. Jacobwa Dios ish,”ⁿ kiznara. Abrampakas Isaackas Jacobkas ñamin iaritkas, uspane Dioskasa uzamti. Diosne irittuzpa Dios chi. Diosne uztuza ininnamtu, kiznara.

³³ Jesús kamtamtu aizpa miarawane, awane iztaspaarit.

An tinta inim

(Mr 12.28-34)

³⁴ Jesúsne Saduceo awaruza nil sinkanat kit puña paninna-rit, ussa mamasa mimamanpa. Suasne sun miarawane, Fariseo awane wanmakkara. ³⁵ Mamaz Fariseone, Moisés kaizta aizpa kamtammikane, Jesússta kwail kizninshit kit mimara:

³⁶ —Kamtam miri. Diosne akkwan inim pinkihta para. ¿Min inimma an tinta i?

³⁷ Jesúsne kaiznara:

—“Une Anpat Diosta pashiarawa. Kaijchuras nijkulat kit ussa pashiarawa. Wan izpulkasa ussa pashiarawa. Diospa min-ñamtuasmin, Diostain pashiarawa.”^o ³⁸ An ñancha inimne tinta inim i. ³⁹ Mamaz inimne an ñancha ininkana i. Sunkana parit: “Une u izmuruza pashinarawa, u uruzpain pashiamtukanain.”^p ⁴⁰ An paas inim miarane, une wan Moisés para aizpakas wan Dios kainammika kamtara aizpakas kianazi.

ⁿ 22.32 Éx 3.6 ^o 22.37 Dt 6.5 ^p 22.39 Lv 19.18

Jesúsne Davidpa painkulkas Davidpa anpatkas i

(Mr 12.35-37; Lc 20.41-44)

41 Fariseo awa me wanmaktittuasmin, 42 Jesúsne mïmanara: —Une ¿Chi Ampu namtïtmikawa minñamtu? Usne ¿Minma painkul i?

Uspane sinkaara:

—Usne Davidpa kwalpa painkul i. Usne ñamin mikwa Davidpa kwaltas kawira.

43 Suasne Jesúsne kaiznara:

—Dios Izpulne Davidta minninta, Cristo ap Anpat i kiznapa. ¿Chikishma sun kiztit? 44 Davidne ka kizta:

“Diosne ap Anpatta ka kaizta:

Nune nakasa ap inintukin uzi,

Wan aliz awaruza ininnanakima.”^q

45 Davidne “Cristo ap Anpat i” kizta. ¿Davidpa painkulkas ashinaki?

46 Minminkas us kaizta aizpa akwa maza pitminkas sinkaasachi. Sun payukis minminkas ussa an mïmaarachi.

Jesúsne Fariseo awaruzakas Moisés kaizta aizpa kamtamtuzakas kwail kiamtu kiznamtu

(Mr 12.38-40; Lc 11.27-54; 20.45-47)

23 ¹ Suasne Jesúsne wan puraruzakas paiña kammuruzakas ka kaiznara: ² “Moisés para aizpa kamtamtuzkas Fariseo awaruzkas Moisés parit aizpa piankamat kit awaruza kamtanamtu. ³ Katmizna uspa kamtamtu aizpa miat kit kiamiztawa. Uspa uzamtukana uzman. Uruza chiwazha kianapa kurunamtuasmin, uspane mamaz tuntu kiamtu. ⁴ Uspane awaruza uspain minñamtu aizpa kinpa kurunnamtu. Uspa kaizamtu aizpa kwisha sam. Uspa kaizamtu aizpa kwisha us kwakanain i. Uspane uspain kaizamtu aizpa kiashitchi. ⁵ Suntuzne chiwazha kiamtu, awa usparuza izanapa, awa uspawa wat minñanapa. Uspane Dios pit ainki pinkihta pat kit ip kit ainki cajóna winñara. Suasne uspane sun ainki cajónuza kinijkinkas sailkinkas akkal titkasa kanarit, awa usparuza an wat izanapa. Uspane maz awawa ainki cajónkin anza katsa cajón saara. ⁶ Awa pishtarara iakane, uspane yalta iat kit anza wat uzmura sayamtu, awa

^q22.44 Sal 110.1

usparuzpa wat minñanapa. Kammu yalta nappakane, uspane nappat kit an wat uzmura sayamtu, awa iztakin usparuza an tinta namninnana. Sun akwa aune mamaz awakinkas an wat makpas minñara. Uspakas watsal aks tit uspa kwaksham, kantit pil-takima. Sun akwa aune mamaz awakinkas an wat makpas minñara. 7 Pipulumal pintuasmin, awa usparuza 'kamtam kakishapu' kizakane, uspane 'an wat awa mai' minñamtu.

8 Une uruzpain an katsa mika namninman, awa uruza kamtam i kizamanpa. Une aimpihstuzpakanain mai. Une maza kamtammin mij. Usne Cristo i. 9 Une an sukin minainkas 'ap taitta' kizman. Une maza Taittain mij. Usne chiyura uz. 10 Uruzpain mazara 'kamtammika' akwanchi. Une kamtammikane mij. Usne Cristo i. 11 Wantuza kiwainmumikane uruzpain an tinta namtinazi. 12 Usmin an tinta namshimumikane an wewazhain namtinazi. Usmin an wemin namtimumikane an tintawazha namtinazi.

13 Moisés para aizpa kamtamtuzkas Fariseo awaruzkas mizhain. Uruzmin awa iztakin wat awakana izninnamtukas, une ñanta kiamtu. Katmizna une kwisha naizarinazi, u kwail kiamtu akwa. Une chiyu pijta sippamtu, awa sua nappamanpa. Ukas sua nappashimtuchi.

14 U Moisés para aizpa kamtamtuzkas Fariseo awaruzkas na kuruntu aizpa mizhain. Uruzmin awa iztakin wat awakana izninnamtukas, une ñanta kiamtu. Katmizna une kwisha naizarinazi, u kwail kiamtu akwa. Une ampu iritpa ashampawa yal walkuamtu. Kwiztane une awa iztukin Diosta paikuamtu, awa uruza izanapa, u wari kizanapa. Sun kiamtu akwa, une an kwisha akkwan naizarinazi.

15 U Moisés para aizpa kamtamtuzkas Fariseo awaruzkas na kuruntu aizpa mizhain. Uruzmin awa iztakin wat awakana izninnamtukas, une ñanta kiamtu. Katmizna une kwisha naizarinazi, u kwail kiamtu akwa. Wan suwara pinamtuasmin, akkwan ñam pira kwakkamtuasmin, une mazara sayamtu, u kamtamtu aizpa kinpa. An kammumikara kamtawane, usne ukin anza kwail nam kit ñnta an akkwan naiznazi.

16 Une kwisha naizarinazi. U kamtanamtukas, une kasu izsachimikakana mai, u kamtaamtu aizpa wat piankamamtuchi akwa. Une ka kamtamtu: 'Minpazha Dios katsa yal akwa chiwazha kin namtu. Usne sunpa Dios katsa yalkin kiztu, iztumika us

kaiztu aizpa minapa. Dios katsa yal akwa kin namtumikane us kin namtit aizpa kinchi. Minpazha uru akwa Dios katsa yalkin chiwazha kin namtune, usne us kin namtu aizpa kitpa,' u kizamtu. 17 Une timpa awakana mai. Une u kaizamtu aizpa wat miamtuchi. Une kasu izsachiruzkana mai, u kamtamtu aizpa wat piankamamtuchi akwa. Dios katsa yalne urukin an tinta i, Diospa yal sun urura Dios akwa paimpa namnintit akwa. 18 Une ankas ka kizamtu: 'Minpazha Dios katsa yalkin milam mishari akwa chiwazha kin namtu. Usne sunpa Dios katsa yalkin kiztu, iztumika us kaiztu aizpa minapa. Dios katsa yalkin milam mishari akwa kin namtumikane us kin namtit aizpa kinchi. Minpazha chiwazha milam Diospa katsa yalkin milam misharira tarane, sun milam akwa kin namtumikane us kin namtit aizpa kitpa,' u kizamtu. 19 Une kasu izsachiruzkana mai, u kamtamtu aizpa wat miamtuchi akwa. Dios katsa yalkin milam misharine milamkin an tinta i, Dios paiña yalkin milam mishari sun milamtu aizpa sinam namnintu akwa. 20 Dios katsa yalkin milam mishari akwa kin namtumikane milam mishari akwa kin namtuchi. Milam mishari akwa kin namtumikane wan milam misharikin isalpara tarit akwa, kin namtu. 21 Minpazha Dios katsa yal akwa kin namtumikane Dios katsa yal akwa kin namtuchi. Uskas Dios akwa kin namtu, us sua uztu akwa, us sua inintu akwa. 22 Chiyu akwa kin namtumikane Diospa uzmu akwa kin namtu, tas Dios inintu akwa, ta Dios uztu akwa.

23 U Moisés para aizpa kamtamtuzkas Fariseo awakas mizhain. Uruzmin awa iztakin wat awakana izninnamtukas, une ñanta kiamtu. Katmizna une kwisha naizarinazi, u kwail kiamtu akwa. U chiwazha diez mijne, une Diosta maza milamtu. Diez menta kih mijne, une maza kih Diosta milamtu. Aniskas cominokas mijne, une diezkis maza Diosta milamtu. U muinchi kih Diosta milamtukas, une Dios kamtamtu aizpa miashimtuchi. Diospa kamtamne u kamtamkin anza tinta i. Une nil uzarawa. Une mamaztuza kiwainnarawa. Une Diosta wat nijkularawa. Une sunkana kiarawa, mamaz inimkas maintachin. 24 Une kasu izsachiruzkana mai, u kamtamtu aizpa wat piankamamtuchi akwa. Une we kamtamtu aizpa miamtu. Une an tinta kamtamtu aizpa miamtuchi.

25 U Moisés para aizpa kamtamtuzkas Fariseo awaruzkas na kuruntu aizpa mizhain. Uruzmin awa iztakin wat awakana,

kwail kitchiruzkana, izninnamtukas, une ñanta kiamtu. Katmizna une kwisha naizarinazi, u kwail kiamtu akwa. Une pilatturakas tasarakas isalpara kitmuruzkana mai. Une pilattukas tasakas ayukman kittachin. U kwail kitchiruz awakanain namninnamtukas, une ayukmal pil pattitkanain mai, u walkuamtu akwa, u kwazpa kulashimtu akwa. **26** Fariseo awaruz mizhain. Une kasu izsachiruzkana mai, u kamtamtu aizpa wat piankamamtuchi akwa. Une an ñancha uruzpain ayukmarain kihanintain. Ayukmaltain kiharawane, u pianamal kiharit manazi.

27 U Moisés para aizpa kamtamtuzkas Fariseo awaruzkas na kuruntu aizpa mizhain. Uruz awa iztakin wat awakana izninnamtukas, une ñanta kiamtu. Katmizna une kwisha naizarinazi, u kwail kiamtu akwa. Une awa irit kamkin yalkanain izarit. Awane sun yaltuza putchã niarit, isalpara watsal izanapa. Ayukmalne irit sihkas wan kwailkas wakularit. **28** Une irit kamkin yalkanain mai. Une isalpara awa iztakin sinam izarit. Une ayukmal kajchumal kwail minñamtu. Sun akwa une kwail kiashimtu.

29 U Moisés para aizpa kamtamtuzkas Fariseo awaruzkas na kuruntu aizpa mizhain. Uruzmin awa iztakin wat awakana izninnamtukas, une ñanta kiamtu. Katmizna une kwisha naizarinazi, u kwail kiamtu akwa. Ñamin Diospa kainammtuz iarikane, u pamparuzne irit kamkin yal saara. Uspañe irit awawa kamkin yalta iat kit uspa kamkin yal watsal sanara, uspa sun awaruza pashinat annanapa. **30** Ukas ka kaizamtu: 'Au ñamin irit kwal uzta payura uzaratne, aune uspakana Dios pit kainammtuza piantarachimanatpas.' **31** Sun pit kizamtuasmin, une u irittuzpa kwal mai piankamamtu. Une u ñamin irit kwalkana mai, uspa Dios pit kainammtuza piantaarit akwa. **32** Une ñamin irittuzpa kwalpa kwail kal kamamtu aizpa kiamiznazi, wan pailnakima. Une u pampawa kalkin anza kwail kianazi.

33 Une kamtakana mai, sula kumtu akwa. U pit kaizamtu aizpa kamta pininukana mai. U ñanta naizamtuasmin, une mizurainkas ñantas puzamanazi. **34** Katmizna nawa mizhain. Nane u uzamtukin Dios pit kinaruzakas wat piantuzakas kamtamtuzakas innamtus. Une minpazharuzakas kurishta patpian kit piantananazi. U uztukin aakane, une minpazharuzakas kammu yalkin aim kianazi. Une minpazharuzakas wan pipulu aizpa sayanazi, usparuza pizanapa. **35** U ñamin uztit kwal wan wat awa

piantarit akwa, une kwisha naizarinazi. U kwalne wat awaruza, wat Abeltakis Zacariastakima piantaara. U kwalne sun unam misharikin kasha Dios katsa yalta Zacariasta, Berequiaspa painkulta, piantaara. ³⁶Wacha kaiznamtus. An ñamin uztuz wat awaruza piantanaritkas, ma uztuzne uspa kiarit akwa kwisha naizarinazi.”

Jesúsne Jerusalén pipulura uztuz akwa tayal kit aztu

(Lc 13.34-35)

³⁷“Jerusalén pipulura uztuzne nawa mizhain. Une Dios pit kainammtuza piantaara. Une Dios inintuza ukkasa aim kiara. Nane Jerusalén pipulura uztuza wanmakshininnamiztau. Aral kamne aral pashpara ilsap ayukman wanmakninñamtu. Sunkanain nane uruza wanmakshinamiztau. Une sun pashiarachi. ³⁸Nawa mizhain. U pipulu azpiannapain. ³⁹Nane uruza ka kaiznamtu: ‘Une nawa akkwan payurakima izamanazi, na chiyuras kailnakima. Suasne une Dios inintamikane kwisha wari,’^r kizanazi.”

Jesúsne Dios katsa yal azpianinazi kiznamtu

(Mr 13.1-2; Lc 21.5-6)

24 ¹Jesúsne Dios katsa yalkis puzta. Iamtuasmin, paiña kammuruzne ussa kasha aat kit ussa Dios katsa yalta anamizta. ²Jesúsne sinkanara:

—Une ma payu sun wan izamtu. Na nua kaiztu aizpa wacha i. An Dios katsa yalkin wan uk taizanazi. Awane wan uk kiakpinanazi, wan azpiannapa.

Au su pailtinazi

(Mr 13.3-23; Lc 21.7-24; 17.22-24)

³Suasne Jesúska paiña kammuruzkas Olivos ti kunkin izara nuara. Jesús sua uzasmin, paiña kammuruzne paimpa kaizara:

—Aumiza kainazhain. ¿Miza urama sun kirinsa? ¿Nu mama-sa kailtuchasmin, au sukin chima kirinasa? Wan minpa payura ¿chima kirinsa? kizara.

⁴Suasne Jesúsne kaiznara: “Kuiraruin uzizanaka, minainkas uruza kain kiamanpa. ⁵Akkwan awa nakana namashimtuasmin, uspane ‘Nane Dios niritmika ish,’ kizanazi. Pírail kaizamtu

^r23.39 Sal 118.26

akwa, uspane akkwantuza kwisha kain kianazi. **6** Awane kasha surakas attishtas surakas waya kianazi. Sun awa waya kiamtu miamtane, une ishkwaman. Sunkana watcha kianazi. Mama minpa payu taiztuchi. **7** Maza sura uztuzne mamaz sura uztuzkasa waya kianazi. Katsa mikwane paiña awa wanmaknat kit mamaz mikwakasa waya kianazi. Awane yak kiarinazi. Katsa ki puranazi. Wan su ulanazi. **8** Sunkasa awane naizamiznazi.

9 Suasne awane uruza inintuza chihkanazi, uruza kwail kiat kit piantanapa. U nawa kanpaamtu akwa, wan awane uruza pashiamanazi. **10** Sun payune akkwan awane na kaiztu aizpa mama nijkulamanazi. Usparuzpain pashiamtuchi akwa, uspane usparuzpain mamazuza chihkaanazi. **11** Akkwan nilchi kainammutuzne aat kit akkwan awaruza kain kianazi. **12** Akkwan kwail kiamtu akwa, awane usparuzpain pashiamanazi. **13** Nane minpa payurakima nawa kanpamtuza watsat milnanash. **14** Wan sura uztuzne Dios watsal pit mianazi, us inintukin uzanapa. Kwiztane minpa payu taiznazi.

15 Daniel ñamin parit aizpa kirinazi. Kwail awane Dios sinam yalta nappat kit sua kwail kiarinazi, awa sua Diosta wakpuj wainñamanpa. 'Uspane Dios iztakin kwisha kwail kianazi.'^s Sun pinkih izturuzne Daniel parit aizpa piankamtain. **16** Katmizna sun iztawane, Judea su uztuzne inkal izara aza iarawa, usparuzka kulanapa. **17** Yal isalta kwaizkulturuzne ayukman napman, chiwazha ayukmal wa aizpa ukkana. **18** Nanmal kal kimturuzne yalta kailman, uspa pñ wa aizpa ukkana. **19** Sun payura ashampa piya wararuzkas chitchu kwintaruzkas kwisha naizarinazi. **20** Diosta paikuamiztain, alu kimtu payurakas kwaizkultu payurakas iamanpa. **21** Sun payu taizkane, awane kwisha naizarinazi. Dios an su sarakima, awane sunkana naizarachi. Sunkanane mamasa awane an naizamanazi. **22** Diosne sun naizmu payu an azain pailninnazi, wan awa iamanpa. Dios narittuza pashinamtu akwa, usne sun payura an azain pailninnazi.

23 Suasne sun payurane awane 'Iztain, Dios inintamikane, Cristone, apa tui,' kizanazi. 'Iztain, Dios inintamikane, Cristone, sua tui,' kizanazi. Minpazha sun uruza kizakane, miman. **24** Akkwan pirail kaizmuruzne chaat kit 'nane Dios niritmika ish' kizanazi. 'Nane Diospa kainammika ish' pirail kizanazi. Uspane

^s24.15 Dn 9.27

iztasparit kal kianazi, Dios narittuzakas kain kianapa. ²⁵Nane an ñamin uruza sun kurunnarau. ²⁶Katmizna usparuzakas kwi-raruin. ‘Sua sak pul pilkin tui’ kizkane, sua iman. ‘Kalmain tui’ kizkane, ussa mïman. ²⁷Dios Painkul akane, awane ussa kai iza-nazi. Ippane azain pãn puzmukis, pãn payapmal, naztam kwan-kim. Sunkana Ampu namtitmikane azain anazi, wan awa ussa izanapa. ²⁸Kalpa irikane, pikumtuzne irittukin azain wanmak-kanazi. Naiztintu payu taizkane, sunkanane kwail kiarittuzne naizarinazi. Awane sun urain wan kaarinazi.”

Jesúsne mamasa kailnash kiznamtu

(Mt 13.24-37; Lc 21.25-31; 17.26-30, 34-36)

²⁹“Wan naizmu payu pailtawane, sun payura pãnne mal-manazi. Palapchakas aizmanazi. Kimukas chiyuras taizanazi. Wanne chiyura wa aizpa ulanazi.’^t ³⁰Suasne Ampu namtitmi-kane chiyuras anazi, wan awa ussa izanapa. Suasne wan awane azanazi. Ampu namtitmikane, katsa mikwakanain, wanishka-sain anazi, wan awaruza tinta ininnana. Usne awa iztakin wat-sal iztīt izpannanazi.^u ³¹Iru karaskwil ustuasmin, usne paiña ángeltuza ininnanazi, wan narittuza akwaninana. Uspane narit-tuza wan chiwal suras wanmagninnanazi.”

Higuera ti kamtam kwinta

(Mr 13.28-31; Lc 21.29-33)

³²“Nane uruza higuera ti kamtam kwinta kainammtus. Sun piankamtain. Higuera ti kuna kih kwizmizkane, une pulpana-pain pian. ³³Sunkana wan na kaizta aizpa izakane, minpa payu taiznapain piankamanazi. ³⁴Watcha kaiznamtus. Ma payu uz-tuz iarachasmin, wanne na kaizta aizpa kinazi. ³⁵Wan chiyukas wan pilkas pailtamtukas, ap pitne, na kaizta aizpa, mizurainkas pailmanazi.”

Wat izkultain

(Mr 13.32-37; Lc 17.22-30, 34-36)

³⁶“Na amtu payura minpazha awainkas pianchi. Chiyuras ángelkas pianchi. Nane, Dios Painkulkas, pianchish. Taitta Diosmin na amtu payura pian.

^t24.29 Is 13.10; 34.4 ^u24.30 Dn 7.13

37 Noé uzasmin, awane wan pashiat aizpa kiara. Ampu namtitmika akane, awane kawarain kapal kianazi. 38 Sun payura an sukin pi pintachasmin, awane kuamiz kit chappi kuamiz kit karsara kit kit pashu milaara, Noé katsa kanuara napta payukima. 39 Uspane pi pinmiztu payu pianchimara, alu kimtukima, wantuza pi kwanakima. Sunkanain awane uzanazi, Ampu namtitmika kailtu payukima. 40 Sun amtu payune paas ampune nanmal tuwaiyanazi. Mazara milnazi. Mamazta tuij inazi. 41 Paas ashampane pia kimtainazi. Mazara milnazi. Mamazta tuij inazi.

42 Une iz kit tiriztain. Une Anpat amtu payu pianchi. 43 Yalpamikawa wat piankamtain. Walkummikane amtawara chamtu. Walkum amtu payura pianakane, yalpamikane izkultit tuanazi, pitnachin. Usne walkummikara paiña yalta walkwan nappinnachi. 44 Katmizna kawarain ukas kapal sarain. Us amtuchi mintuasmin, sun payura Ampu namtitmikane ashina.”

Wat kiwainmuruzkas kwail kiwainmuruzkas

(Lc 12.41-48)

45 “Wat kiwainmumikane anpat pashit aizpa min kit kimtu. Yalpamikane paiña yalta ussa kain tattimtu, wanta wat urara kumira kwinnapa, wan mij aizpa iznapa. 46 Anpat kailkane, paiña anpat kaizta aizpa kimtumikane wat kulnazi, anpat ininta aizpa kimtu akwa. 47 Watcha kaiznamtus. Anpatne wan mij aizpa kiwainmikasha kain tattinazi, anpat mij aizpa iznapa. 48 Sunkana kwail kiwainmumikane ‘anpat azain kailmanazi’ minmiznazi. 49 Suasne usne mamaz kiwaintuza kwail kinamiztu. Usne kumira kwat kit pirittuzkasa chappi kumiztu. 50 Kiwaintuz sun amtu payu pianchi akwa, kiwaintuzne anpatta tirizamtuchi. Suasne paiña anpatne sun payura kailnazi. 51 Anpatne ussa kwail awakasa uzna inin kit ussa tinta il kit ininta naizninnazi. Suasne usne az kit sula sit sit kinazi, Diosta pianchiruzkasa ininta naiztu akwa.”

Diez nimpish ashampa kamtam kwinta

25 1 “Suasne Diosne sunkana ininnazi. Diez nimpish kiwain ashamparuzne alampara muara. Uspane kasara kim pishta iara, ampura wanmalana. 2 Cinco kiwaintuzne wat minñarachi, uspa alampara putnapa watsaana. Mamaz cinco-ruzne wat minñara, uspa alampara putnapa watsaana. 3 Kapal

saritchiruz alampara milarakas, uspane alampara pi milarachi, mamasa alampara ulna. **4** Kapal sarittuzne alamparakas an alampara ulmu pikas milaara. **5** Ampu kanpain mijmika azain amtuchi akwa, wan nimpish ashamparuzne pitshiamiz kit masain pittarit. **6** Kakwamta pakane, suasne awane ka kwianara: ‘Kanpain mijmikane amtui. Puzat kit ussa wanmalnarain,’ kizara. **7** Diez nimpish ashampane izkulat kit uspa alamparara wat saarit, kai aiznapa. **8** Kapal sarachiruzne kapal sararittuza kaizara: ‘Au alampara kwirimtu. Pitchin alampara pi milazhain,’ kizara. **9** Kapal sarittuzne sinkaara: ‘Milasachimakpas. Milatne, aune kapal mijchiashinamakpas. An wat tintara it kit umin paina irain,’ kizara. **10** Cinco nimpish ashampa, kapal sarachiruz, alampara pi paina iamtuasmin, ampu kanpain mijmikane at. Suasne nimpish ashamparuzne kapal sarittuzne, uskasa kasara kit pishtara nappara. Suasne pijta sippara. **11** An kwiztane mamaz nimpish ashamparuzne aat kit ka akuamizta: ‘Anpat. Anpat. Miri. Pijta chihti,’ kizara. **12** Usne sinkanara: ‘Watcha kaiznamtus. U kapal watsaarachi akwa, une nappasachi. Uruza pianchish,’ kiznara.

13 Suasne Jesúsne ka kaiznara: ‘Wan kapal sawizanaka, u Ampu namtitmika amtu payura pianchi akwa,’ kiznara.”

Pial kamtam kwinta

(Lc 19.11-27)

14 “Diosne sunkana innnazi. Mamaz sura itchasmin, maza ampune paiña kiwaintuza wanmakininnat kit paiña pial usparuza chihkanarit, pial pamikawa kal kianpa. **15** Usne pakaish pakaish maza mazara uspa pial milanarit, us pashimtu aizpa kinpa. Usne mazara, wat kal kinpa pianmikasha, cinco mil pial milat. Mamazta, we kal kinpa pianmikasha, paas mil pial milat. Mamazta an we kal kinpa pianmikasha, maza milmin pial milat. Wanne pial sappara, sun pialkasa paiña kal kiana, an pial kana kiana. Pial chihkarawane, pialpamikane masain mamaz sura imizta. **16** Cinco mil pial saptamikane sun pialkasa chiwazha pait kit paininta. Sunkana usne an cinco mil pial kana kira. **17** Paas mil pial saptamikane sunkanain kit kit an paas mil pial kana kira. **18** Pial pamikawa pial saptawane, maza mil pial saptamikane pil kul sat kit pial pilta punta. **19** Akkwan payu pailtawane, anpatne kail kit sunpawa pial saptaruzkasa wianmizta.

20 An ñancha cinco mil pial saptamikane at kit cinco mil pialkas cinco mil kana kit aizpakas pamikasha chihkat kit kaizta: ‘Anpat. Nune nawa cinco mil chihkaish. Nane an cinco mil kana kirau. Wan sapti,’ kizta. 21 Pamikane sinkara: ‘Kwisha wat. Nune kwisha nil kiwainmumika i. Nune na pashimtu aizpa nil kirit. Nu pitchinkasa wat kirit akwa, nane nua an akkwan chihkattarinash. Nakasa at kit nakasa wat kulnaka.’ 22 Kwiztane paas mil pial saptamikane at kit pamikara kaizta: ‘Anpat, nune nawa paas mil pial chihkaish. Nane an paas mil kana kirau. Wan sapti,’ kizta. 23 Pamikane sinkara: ‘Kwisha wat. Nune kwisha nil kiwainmumika i. Nune na pashimtu aizpa nil kirit. Pitchinkasa wat kirit akwa, nane nua an akkwan chihkattarinash. Nakasa at kit nakasa wat kulnaka,’ kizta.

24 Minpa maza mil pial saptamikane at kit pamikara kaizta: ‘Anpat. Nane up kiwaintuza kwisha tinta innamtu pianish. Uspa up sukin kal kiamtu akwa, nune pial saptu. Uspa up sukin pippa pakkamtu akwa, nune uspa pippa paktu aizpa saptu. 25 Katmizna nane ishkwaat kit up pial pilta puina irau. Up pial sapti.’ 26 Pamikane sinkara: ‘Nune kwail kiwainmika i. Arakan i. Nune na kimtu aizpa nilchi mintu. Ap sukin na kal kimtuchikas, na pippa wamtuchikas, nane chiwazha pakta aizpa sapanash. Nune sun pian. 27 Sunkana mintane, nune ap pial watsamtukin watsakamtish, an pial kana kinpa. Sunkana nane ap pial kana kit aizpa sapshinas.’ 28 Pamikane sua puraruza kaiznara: ‘Ussa maza mil pial nakat kit diez mil pial mijmikasha milari. 29 Akkwan mijmikane an akkwan sapanazi, tiznakima. Pitchin mijmikane us mij aizpa karinazi. 30 An tinta kal kishimtuchimikasha tilkwilmal inintain. Suane usne az kit sula sit sit kinazi, Diosta pianchiruzkasa naiztu akwa,’ kiznara.”

Jesúsne wan awaruza kwail kiamtu kiznamtu

31 “Ampu namtitmika paiña ángeltuzkasa akane, usne watsal iz kit paiña uzmuquin chiyura uznazi. 32 Wan suras awane paiña iztakin wanmakkanazi. Usne piriku izmumikana i. Piriku izmumikane pirikuruzkas cabraruzkas paimpa ininnanazi. Kawarain Ampu namtitmikane wan awaruza paimpa ininnanazi. 33 Usne wattuza paiña numalpara ininnanazi, uskasa tuanpa. Kwailtuza paiña kwiyamarain ininnanazi, usparuza ilnanapa. 34 Suasne mikwane numal kuntuza ka kaizazi: ‘Une arain. Dios-

ne uruza wat kiwainnanazi, paiña inintukin puranpa. Au su sarchasmin, usne uruza wanmakninna minta, u uskasa uzanapa. 35 Na yak kikane, une nawa kwinñash. Na kwazi kilkane, une nawa kwazi kwinñash. Na u sura uzasmin, une u yal nammilash. 36 Na pñ wekas, une nammilash. Na ishtukas, une nawa iznash. Na kajchira warakas, une nawa iznash.’ 37 Suasne waruzne sinkanazi: ‘Anpat. ¿Miza urama aune nu yak kira iztamakpas? ¿Miza urama aune nua kumira kwintamakpas? ¿Miza urama aune nu kwazi kikka izaramakpas? ¿Miza urama nua kwazi kwintamakpas? 38 ¿Miza urama nu mamaz sura chamtu awakana iztamakpas? ¿Miza urama nua yal nammilaramakpas? ¿Miza urama nu pñ we aizpa mlaramakpas? 39 ¿Miza urama aune nua intura iztamakpas? ¿Miza urama aune nua kajchira wara izna iramakpas?’ 40 Ininmikane usparuza sinkananazi: ‘Watcha kaiznamtus. Une an we tintaruza, nawa we piantuza, kiwainanara. Usparuza wat kiwainarit akwa, une nawa wat kiarit.’

41 Suasne Mikwane kwiyamal puraruza kaiznanazi: ‘Nakis paimpa imiztain. U kwail kiarit akwa, une ñta irain, sua pailta payukima uzanapa. Diosne ñta sara, Diablokas paiña ángeltuzkas sua puranpa, sua naizanapa. 42 Na yak kirakas, une nawa kwinamash. Na kwazi kiktakas, une kwazi kwinamash. 43 Mamaz suwara charakas, une nawa yal nammilaamash. Na pñ we mijkas, une nawa pñ milaamash. Na inturakas, une nawa izaamash. Kajchira warakas, une nawa izaamash.’ 44 Suasne uspane mimaanazi: ‘Anpat miza urama aune nu yak kimta izaramakpas. ¿Miza urama nua kumira kwintachimakpas? ¿Miza urama aune nu kwazi kiktura izaramakpas? ¿Miza urama kwazi kwintachimakpas? ¿Miza urama nua mamaz sura izaramakpas? ¿Miza urama nua yal nammilatchimakpas? ¿Miza urama nua pñ we aizpa izaramakpas? ¿Miza urama pñ mlatchimakpas? ¿Miza urama aune nu intura izaramakpas? ¿Miza urama nua kajchira iztamakpas? ¿Miza urama nua kajchira izna itchimakpas?’ 45-46 Mikwane usparuza sinkananazi: ‘Watcha kaiznamtus. Une an we tintaruza nawa we piantuza, kiwainnarachi. Usparuza wat kiwainarachi akwa, kawarain une nawa wat kiwaintachi. Suasne suntuzne pailta payukima ñta naizarinazi. Wattuzne Dios iztakin pailta payukima chiyura wat uzanazi.’”

Awane Jesústa piantana minñamtu

(Mr 14.1-2; Lc 22.1-2; Jn 22.45-53)

26 ¹Wan kapal kaiznarawane, Jesúsne kammuruza kaiznara:

²—Pa payu pailtikane, une Pascua pishta taiztu pianmai. Awane Ampu namtitmikara chihkaanazi, tira patpian piantanapa.

³Sun payuin katsa pariya inintuzkas Moisés para aizpa kamtamtuzkas Judío ilaparuzkas Caifáspa katsa yal pianakin wanmakkara. Caifásne an katsa pariyamika azi. ⁴Suasne uspane Jesús pa piraíl kaizninna minñashira, ussa piz kit piantana. ⁵Uspane usparuzpain kaizara:

—Pishta chasmin, ussa piznachiwamakpas, awa kwisha pilchapuzamanpa.

Maza ashampane Jesústa piam pih parantu

(Mr 14.3-9; Jn 12.1-8)

⁶Jesúsne Betania pipulura ira, Simónpa yalkin nukkulna. Simónne pittit aya kakultitnika azi. ⁷Jesús misharikin kumtuasmin, maza ashampane piam pih ulmu karat kit kashara at. An ulmune alabastro ukkasa sarit. An watsal piam pihne kwisha muin. Jesús uzasmin, an ashampane piam pih Jesús pa kizpu kin paranta. ⁸Kammuruz sun izarawane, aliz pilchapuzat kit kaizamizta:

—¿Chikishka an piam pih kain pattarimtu? ⁹Akkwan pialkasa painninshinari, puizaruza kiwainnana.

¹⁰Jesúsne uspa kaizamtu aizpa mit kit kaiznara:

—¿Chikishka an ashampara kwail kizappamtu? Us nawa sun kirit aizpa wari. ¹¹Puizaruzne pailta payu uruzpain uzanazi. Nane ukasa pailta payura uzmanash. ¹²An piam pih ap kizpu kin parantuasmin, an ashampane na imtu payura kapal sarit, nawa kamna.

¹³Nane watcha kaiznamtus. Dios watsal pitne wan sura kainarinazi. Sun pit miraruzne an ashampa kit aizpa miat kit an ashampawa minñanazi.

Judasne Jesústa kwail awaruza chihkan namtu

(Mr 14.10-11; Lc 22.3-6)

¹⁴Mazane, doce kammuruztas, Judas Iscariotene muntit. Usne katsa pariya inintuzkasa kwinta kin it ¹⁵kit kaiznara:

—Na uruza Jesústa chihka namtune, ¿Yawa pialma nawa taanapas?

Suasne uspane treinta pial tana namaara. **16** Sun payuras Judasne wat urain saimizta, ussa usparuza chihkan.

Au Anpatpa kumira naitu

(*Mr 14.12-25; Lc 22.7-13; Jn 13.21-30; 1 Co 11.23-36*)

17 Sun Pascua pishtara awane pan kiñakasachin kuara. An ñancha pishta payura paiña kammuruzne Jesústa tukin aat kit mimara:

—¿Mintama Pascua kumira saanapai, an kumira kwan?

18 Usne sinkanara:

—Sun pipulura iat kit maza ampuwa yalta piannarain. Ussa kaiztain: “Anpatne ka kiztu: ‘Na imtu payu kasha panapain. Nane ap kammuruzkasa up yalta imtus, Pascua pishta kumira kwan.’”

19 Kammuruzne Jesús ininta aizpa kiil kit Pascua kumira sailta.

20 Amta til parikane, Jesúska paiña doce kammuruzkas misharikin uzaara. **21** Kuamtuasmin, Jesúsne kaiznara:

—Watcha kaiznamtus. Maza uruztas nawa kwailtuza chihkanazi.

22 Suasne uspane tayalmiz kit mazanta mazanta ussa mimamizta:

—Anpat. ¿Na sun kinsa?

23 Jesúsne sinkanara:

—Na uruzkasa an kumira kumtukas, mazane, nakasa kumtumikane, nawa kwailtuza chihkanazi. **24** Dios pinkihkin Ampu namtitmika irinazi parit. Us irikas, ussa kwailtuza chihkatmikane kwisha naiztinazi. An ampu kawirachiatne, an warashina.

25 Suasne Judasne, ussa kwailtuza chihkatmikane, Jesústa mimara:

—Anpat. ¿Nane nua chihkansa?

Jesúsne sinkara:

—Watcha. Nu sun kaizta aizpa kinazi.

26 Kuamtuasmin, Jesúsne pan piz kit Diosta aishtaish kizta. Pan kiztawane, usne kammuruza kwinat kit kaiznara:

—Kwarain. An panne ap ña i.

27 Suasne usne maza vino waz piz kit Diosta aishtaish kizta. Waz annamtuasmin, kaiznara:

—Une an waztain wan kwarain. **28** An vinone ap aimpi i. Na imtu akwa, Diosne ukasa masas contrato kin namtinazi. Ap aimpi puztu akwa, nane akkwan awa kwail kiarittuza wat kulnash. **29** Nane an vino kumanash, ap Taittawa inintukin napnakima. Suane aune mamasa kuiznawas.

Jesúsne Pedrora kaiztu: Nawa pianchish kiznazi

(Mr 14.26-31; Lc 22.31-34; Jn 13.36-38)

30 Kanta kizarawane, uspane Olivos ti kun izara nuara.
31 Suasne Jesúsne kaiznara:

—Ma amtane uruzne nakis paimpa iat kit nawa chihkaamiznazi. Une Dios pinkihta parit aizpa ka kianazi. “Nane piriku pamikasha ininnash. Suasne pirikuruzne paimpa maza mazain ianazi.”^v **32** Na irittas kuhstawane, u Galilea sura iamtuchasmin, nane ukin an ñancha inash.

33 Pedrone ussa sinkara:

—Wan nukis paimpa iamtukas, nane nukis imanash.

34 Suasne Jesúsne ussa kaizta:

—Watcha kaiztus. An amtain aral kayu aztuchasmin, nune kutña pijikima “ussa pianchish” kiznazi.

35 Pedro kaizta:

—Na nukasain imtukas, nane “nua pianchish” kizmanash. Wan kammuruzne sunkanain kizara.

Jesúsne Getsemaní nanmalkin Diosta paikumtu

(Mr 14.32-42; Lc 22.39-46)

36 Suasne Jesúska paiña kammuruzkas Getsemaní nanmalkin pianaara. Usne kaiznara:

—Na an ta Diosta paikwan imtuasmin, une apain uztain.

37 Usne Pedrorakas paas Zebedeo painkultakas ta milnara. Usne kwisha tayalmiz kit ishkwatkana mimizta. **38** Suasne kaiznara:

—Nane ayuktain, ap kajichurain, kwisha tayaltus, inakima. Akkin nukkul kit nakasa izkultain.

39 Suasne Jesúsne an attishta it kit matsih pilita wain kit Diosta paikwat kit kaizta: “Ap Taitta mizha. Na ishimtuchish.

^v**26.31** Zac 13.7



Jesús paiña papihshta paikumtu

Nawa naizninmun. Na naiztukas, na pashimtu aizpa kimun. Nu pashimtu aizpa kiri,” kizta.

40 Suasne paiña kammuruz purakin it. Usne usparuza pittit tu wanmalnat kit Pedrora kaizta:

—¿Une maza urain nakasa izkulasachimakkiwas? 41 Izkulat kit Diosta paikwarain, kwail kiamanpa. Watcha kaiznamtus. Nil kiashimtukas, une tailchaamanazi.

42 Mamasa it kit sunkana Diosta paikwat: “Ap Taitta mizha. Na ishimtuchish. Nawa naizninmun. Na imanpa chihshitne, sun kiri. Sun kisachine, mama nu pashit aizpa kiri. Na pashimtu aizpa kimun. Nuin pashimtu aizpa kiri.”

43 Suasne Jesúsne mamasa kail kit paiña kammuruz pittit pura wanmalnara. Uspane kwisha pittashira. 44 Usne usparuza tuij inat kit mamasa Diosta paikwat kit sun pitmin kaizta. 45 Suasne kammuruz purakin it kit kaiznara:

—Mane pit kit kwaizkultain. Iztain. Awane me aanapain. Uspane Ampu namtitmikara kwail awaruza chihkaanpain. 46 Kuhs kit imirachain. Nawa chihkamtumikane me amtui.

Uspane Jesússta pizamtu

(Mr 14.43-50; Lc 22.47-53; Jn 18.2-11)

47 Jesús paramtuasmin, Judasne, maza kammumikane, pianat. Uskas kwisha akkwan awakas mashti kwizkasakas tikasakas aara. Pariya ininturuzkas Judío awa ilapa ininturuzkas usparuza ininnara. 48 Judasne, sun chihkatmikane, usparuza izpa sat kit kaiznara: “Nane mazara matsihkin putchunnash. Sunne u saimtumika i. Ussa miltain.” Sunkana ñamin kaiznara. 49 Suasne Judasne Jesússta kasha at kit kaizta:

—Anpat. Kakishapu.

Usne Jesússta matsihkin putchunta. **50** Jesúsne sinkara:

—Izmuruz. Nune nakin kakishapu kizna atchi. Nu minta aizpa kiri.

Suasne awaruzne Jesússta kasha aat kit pizaat kit milaara.

51 Ussa milaamtuasmin, mazane Jesússta kammumikane, paiña mashti kwiz ukkat kit katsa pariyawa kiwainmikasha kail yalta. **52** Suasne Jesúsne ussa kaizta:

—Up mashti watsat. Mashtikasa waya kimikane sunkasa mashti kwizkasa inazi. **53** Na ap Taittara paikwatne, usne man nawa doce ángeltuzpa kwaltuza, ininshina, waya kit kit nawa kiwainapa. ¿Sun pianchikish? **54** Ma payu sun paikumanash, Dios pinkihta parit aizpa kinpa.

55 Suasne Jesúsne awaruzne kaiznara:

—¿Chikishma mashti kwizkasakas tikasakas aamtu, nawa pizna? Nane walkumchi ish. Nane pailta payu Dios katsa yalkin uruzka kamtanamiztau. Suane une nawa pizamash. **56** Ma payu une wan kiamtu aizpa izamtu. Dios kainammtuz sunpa ñamin kwinta kiarakas, ma payu Diosne paiña pinkihkin parit aizpa pailtimtu.

Suasne wan kammuruzne Jesússta chihkaat kit iarit.

Jesúsne katsa mikwaruzkin tu

(Mr 14.53-63; Lc 22.54-55, 63-71; Jn 18.12-14, 19-24)

57 Jesússta pizaruzne ussa Caifás tukin milaara. Usne katsa pariya ininmika azi. Moisés kaizta aizpa kamtamtuzkas Judío ilaparuzkas sua wanmakkara. **58** Pedrone attishtas kanpara, katsa pariyawa yalta piannarakima. Piannarawane, usne nanmalta it kit policia awaruzkasa uzta, chiwazha kimtu aizpa izna.

59 Katsa pariya ininturuzkas, ilaparuzkas, wan Judío ininturuzkas pirail kaizmuruzne sayamizta, Jesús kwail kirit kizana. Judío inintuzne Jesússta piantana ininashira. **60** Akkwan awa aat kit pirail kaizarakas, minminkas Jesús kwail kirit nijkularachi. Minparane paas pirail kaizmuruzne ail **61** kit ka kaizpailta:

—An ampune ka kaizta: “Katsa Dios yal azpianawane, nane kutña payura mamaza sashinash.”

62 Suasne katsa pariya ininmikane kuhs kit Jesússta mimara:

—¿Sinkamankish? ¿Usa kaizamtu aizpa nilki?

63 Jesúsne puñain parit. Suasne katsa pariyane ussa kaizta:
—Diosne chiyura uz kit nu kaiztu aizpa mimtu. ¿Nu Cristo muntitmika kish? ¿Nu Dios Painkul kish? Dios iztukin aumiza watcha kaizchain.

64 Jesúsne sinkanara:

—Watcha, na ish. Nane an uruza kaiznamtus. “Une Ampu namtitmikara Diospa numal inintukin izanazi. Chiyuras wamishkasain amtuasmin, une ussa izanazi.”^w

65 Sun mirawane, katsa pariyane aliz kul kit paiña pñ pshat kit awaruza kaiznara:

—An ampune Diospa kwail pit paramtu. Mamaz awara saim-tuchimakpas, us kwail kirit aizpa kizna. Une us Diospa kwail pit paramtu miamtu. **66** ¿Miza minñamtuas? kizara.

Uspane kaizara:

—Kwail kiztu akwa, usne irawa, kizara.

67 Suasne uspane matsihkin ilpi kiat kit chihtikasa aim kiara. Mamaztuzne matsihkin kuzat kit **68** kaizara:

—Nune “nane Dios niritmika ish” kiztu. Katmizna, Dios nua kiwaintu akwa, ¿minma nua kuzamtu? kainazhain, kizara.

Pedrone Jesússta pianchish kiztu

(Mr 14.66-72; Lc 22.56-62; Jn 18.15-18, 25-27)

69 Pedro pianamal uzasmin, maza ashampa kiwainmikane at kit Pedrora kaizta:

—Nukas Jesúska, Galilea sura atmikakasa, chara.

70 Pedrone wan iztakin pirail kiz kit kaizta:

—Nu kaiztu aizpa pianchish.

71 Pedro pijta napmura imtuasmin, mamazne ussa iz kit puraruza kaiznara:

—Jesús, Nazaret pipuluras at mika, apa chamtuasmin, an ampukas Jesúska chara.

72 Mamasa Pedrone pirail kiz kit kain kaizta:

—Dios iztakin nane an ampura pianchish, kizta.

73 An kwizta puraruzne Pedrora kasha aat kit kaizara:

—Watcha. Nukas usparuzkasa chatmika i. Nune usparuzkainain paramtu.

74 Suasne Pedrone akkwan piji kaizmizta:

^w26.64 Dn 7.13

—Na pirail kaizmiztane, Diosne nawa ininshina. An ampura pianchish.

Sun urain aral kayune azta. ⁷⁵Suasne Pedrone Jesús kaizta aizpa nijkulta. Ñamin Jesúsne ussa kaizta: “Aral kayu aztachas-min, nune kutña pijikima, ‘ussa pianchish’ kiznazi.” Pedrone tas puz kit kwisha tinta azta.

Awane Jesústa Pilatora chihkamtu

(Mr 15.1; Lc 23.1-2; Jn 18.28-32)

27 ¹Kinmizkane, wan pariya ininturuzkas Judío ilaparuzkas nijkultat kit Jesústa piantana minñara. ²Uspane Jesússta kuhat kit ussa Pilatora, Roma mikwara, chihkara.

Judasne imtu

³Judío ininturuzne awaruz paikwaara, Jesústa piantanapa. Sun piankamtawane, Judasne, Jesússta chihkatmikane, tayalmizta, awa Jesússta piantashit akwa. Usne pariya ininturuzakas Judío ilaparuzakas it kit treinta pialkasa kail kit ⁴kaiznara:

—Nane kwail kirau, na kwail kitchimikasha innapa chihkat akwa.



Judas 30 pial kiakpintu

Uspane sinkaara:

—Nu ussa chihkat akwa, nune nu kimtu aizpa mintawa. Nuin sun kirit.

5 Suasne Judasne tas puz kit Dios yalkin pial pattara. Suasne it kit usmin kwil tit kuh kit usmin kan kit ira. 6 Pariya ininturuzne sun pial sakkat kit kaizara:

—Judas an pialkasa ampura piantana paininta akwa, aune Diospa pial sapmukin taasachimakpas.

7 Suasne uspane sun pialkasa pil paina pashiara. Uspane pail sammikawa nanmal payara, mamaz suras awaruza kamnana. 8 Katmizna makima “sun pilne aimpi nanmal” muntit, an pialkasa awa mazara piantanapa pait akwa. 9 Jeremíasne, Dios kainammikane, sun kirit aizpa ka pinkihta parit: “Uspane treinta pial sappara. Israel awane sunpawa pial taana nijkulara, awara paina. 10 Uspane sun pialkasa pail sammikawa nanmal payara. Uspane chiwazha Anpat nawa inintit aizpa kiara,” Jeremías kizta.^x

Pilatone Jesússta mimamtu

(Mr 15.2-5; Lc 23.3-5; Jn 18.33-38)

11 Jesús Pilatokin panasmin, usne Jesússta mimara:

—¿Nune Judío awawa mikwa kish?

Jesúsne ussa kaizta:

—Nu kaizta aizpa watcha i.

12 Pariya ininturuzkas Judío ilaparuzkas us kwail kirit kizmituasmin, Jesúsne usparuza sinkanarachi. 13 Pilatone ussa mimara:

—¿Uspa nua kwail kizamtu aizpa mimituchikish?

14 Jesúsne ussa chinkas sinkamiztachi. Katsa ininmikane iztasparit.

Uspane Jesússta inapa kaizamtu

(Mr 15.6-20; Lc 23.13-25; Jn 18.38-19.19)

15 Pascua pishta tuasmin, Romano mikwane maza kajchira wamikara chihntuazi. Usne awa narimikara chihntshina. 16 Suasne maza kwisha kwailmikane kajchira wara. Usne Barrabás muntit. Akkwan awane paiña kwail kirit aizpa piankaamara.

^x27.10 Zac 11.12-13

17 Awa wanmakkamtuasmin, Pilatone mīmanara:

—¿Une chima pashiamtu, na kinpa? ¿Barrabásta chihtawasa? ¿Jesústa, chihtawasa? ¿Dios niritmika muntitmikara chihtawasa?

18 Pilatone sun mīmara, Jesústa chihtshimtu akwa. Awa Jesúska aliz kulamtu akwa, uspane Jesústa chihkaara. Pilatone sun piankamta.

19 Pilato paiña inintukin uzasmin, paiña ashampane paiña pit ussa inin kit kaizta: “An ampukasa kimun. Usne wat awa i. Amtawara kainkizpamtuasmin, nane us akwa kwisha naiztau.”

20 Pariya inintuzkas Judío ilaparuzkas wan awaruza tinta kurunnara, Pilatora paikwan, Barrabás chihtna, Jesústa piantanapa. 21 Katsa mikwane mamasa usparuzkasa paranat kit mīmanara:

—¿Sun paastas minmikama chihtna pashiamtu?

Uspane sinkaara:

—Barrabásta chihti.

22 Pilatone mīmanara:

—¿Jesúskasa chima kinpai? ¿Dios niritmika muntitmikakasa chima kinpai? Cristora munamtu.

Wan awane sinkaara:

—Ussa kurishta pat piantarawa.

23 Suasne Pilatone kaiznara:

—¿Usne chi kwail kirit?

Uspane an tinta kwianamizta:

—Ussa kurishta pat piantari.

24 Pilato kaizta aizpa mīarachi akwa, ussa kwisha pilchapuzara akwa, Pilatone kwazi kanapa inin kit awa iztakin paiña chihti kit kit kainanara:

—Nane an wat ampura piantanapa ininmanash. Umin ussa ininñaanazi.

25 Wan awane sinkaara:

—Nu ussa inapa inintane, aune au paikwat aizpa nijkulnamakpas. Au ussa kwail kiaritne, aukas au pashparuzkas us akwa naizshinamakpas.

26 Suasne Pilatone Barrabásta chihtta. Jesústa ilna inintawane, Pilatowa kiwainturuzne Jesústa Roma suldaruruza chihkana, kurishta pat pian kit piantanapa.



Pilatokas Jesúskas aliztuzkas

27 Suasne ininmikawa suldaruruzne Jesússta Roma ininmikawa yalta milara. Wan suldaruruzne Jesússta mamin pilsaarit. 28 Suasne uspane paiña pñ nakaat kit kwanamkana pñ, mi-kwawa kwakshamkana, kwaninñara. 29 Uspane akkwan pu tit iptit kit mikwawa chuttakana saara. Suasne paiña kizpukin sinaara. Maza mikwawa tikana paiña numal chihtikin piznina. Suasne uspane us iztakin wakpuj wainñat kit ussa ishanat kit kaizara:

—¡Nune Judío awara mikwa i! Wat kintire, kizara.

30 Uspane ussa ilpi kiat kit sun mikwawa tikasa kizpukin pianara. 31 Ussa ishanarawane, uspane kwanamkana pñ nakaat kit paiña pñ kwaninñara. Suasne ussa milaara, ussa kurishta patpian piantanapa.

Ussa kurishta pat pian piantaamtu

(Mr 15.21-32; Lc 23.26-43; Jn 19.17-27)

32 Puzamiztuasmin, Roma suldaruruzne maza Cirene suras ampura wanmalara. Usne Simón mun. Uspane ussa Jesússta us kurish munana ininara.

33 Sunkanain uspane Gólgota iza mungkin pianaara. Sun Gólgota izane “irit kizpukana iz kit ka muntit.” 34 Suane uspane Jesússta tain vino kwanpa kwinñara, ishmanpa. Kwaiztawane, usne chinkas kwashitchi.

35 Ussa kurishta inapa pat piantawane, suldaruruzpain ukka-sa salara, Jesús pa p̄n kana kin. Dios kainammika kaizta aizpa sunkana kirit. Ka kizta: “Uspane salat kit ap watsal kwaksham kana kinazi. Uspane usparuza ap p̄nka naiyanazi,” kizta. 36 Suasne sua uspane uzara, Jesús ta izana. 37 Uspane ti akkalta paat kit Jesús pa kizpu isal pattara. Sun pitne ka kizta:


ANNE JESÚS I. USNE JUDÍO AWAWA MIKWA I.

38 Uspane uskasa paas walkummikarakas tira pat pianara. Mazara paiña numal mamaz kurishta pattara. Mamazta paiña kwiyamal mamaz kurishta pattara. 39 Pinturuzne ussa kwail pit kizara. Uspa kizpu kialtuasmin, uspane 40 ka kaizamizta:

—Nune akkwan pit kaizta. Nune an Dios pa yal kutña payura mamaza sanash kizta. Katmizna nuin kiwainti. Nuin Dios painkul kane, nuin kurishtas kishsti.

41 Pariya inintuzkas Moisés kaizta aizpa kamtamtuzkas, Fariseo awaruzkas Judío ilaparuzkas ussa ishanat kit usparuzpain kaizara:

42—Us mamaztuza watsat milnarakas, usmin watsat mĩsachi. Israel awa mikwa kane, usne kurishtas kihshshina, au us kaizta aizpa nijkulanapa. 43 Diosta nijkultune, usne makis Dios ta ussa watsat milnapa paikwatpa. Dios ussa pashimtune, Dios ne ussa kiwainshina, us “Dios painkul ish” kizta akwa.



Jesús walkumtuzkas kurishkin kaanamtu

44 Jesúska kurishta pat piantitkas, an paas walkumtuzkas Jesúska kwail kaizpailta.

Jesúsne imtu

(Mr 15.33-41; Lc 23.44-49; Jn 19.28-30)

45 Paizka payukis kutña urakima wan sura tilkwil paarit.
46 Sun kutña urain Jesúsne paiña Hebreo pitkasain tinta ka kwianta: “Eli, Eli, ¿lema sabactani?” (Au pitkasain ka kizta: “Ap Dios, Ap Dios. ¿Chishma nawa kwairit?”)^y

47 Minpazha sua puraruzne miat kit kaizara:

—An ampune Elías kainammikara akumtu.

48 Sun urain mazane usparuztas ãin it kit pimpuh kana it. Pimpuha tain vinokasa parantawane, an ampune pimpuh tikin tat kit Jesúska kashara nuninta, tuknapa. 49 Mamaztuzne kaizara:

—Sun kimun. Elías kiwaina amtuka, izanapas.

50 Jesús mamasa tinta kwiantawane, ira. 51 Sun urain nain pñ kantit Diospa yalkin kwashtas pihshara, piltakima. Sun nain pñ akwa, mamaz kanmal siptit. Pilne ulta. Ukkas kizara. 52 Pantiónpa yal azpianara. Akkwan Diosta piantuza irittas kuh-sara. 53 Kuhsarawane, pantión yalkis puzara. Jesús irittas kuh-tawane, an kuhsararuzne Diospa watsal Jerusalén pipulura nap-para. Suane akkwan awane usparuza izara.

54 Suasne suldaru ininmikakas Jesúska izmuruzkas ulmu mazara. Wan kiarit aizpa izara akwa, uspane kwisha ishkuat kit kaizara:

—Watcha. An ampune Dios Painkul ara.

55 Suane akkwan ashampane attishtas izara. Uspane Jesúska kiwainat kit Jesúska Galilea suras kanpaara. 56 Mariakas Magdalena pipuluras ara. Mamaz Mariakas ara. An Mariane Santiagowa akkuhshkas Joséwa akkuhshkas ara. Zebedeowa painkul-tuzpa akkuhshkas ara.

Jesúska kaamtu

(Mt 15.42-47; Lc 23.50-56; Jn 19.38-42)

57 Nashmizkane, maza kwazpa ampune ara. An Arimatea pipuluras awane José muntit. Uskas Jesúska kammumika azi. 58 Suasne usne Pilatora izna it kit Jesús iritta paikwara, ussa

^y27.46 Sal 22.1

kamna. Suasne Pilatone ussa chihkanpa innnara. **59** Joséne irit-mika kurishtas mushat kit muin sinam p̄n ip kit **60** paiñain masas uk kulta kamta. Suasne usne ñamin sun kul kapal sarit, ussa sua kamnapa. Katsa ukkasa sun kulta siptawane, irit. **61** Suane Magdalena suras Mariákas mamaz Mariákas kamkin izawara uzara.

Pariyawa kiwainmuruzne Jesús kamkin izamtu

62 Pascua pishta kapal watsarawane, tilawarane, kwaizkultu payura, Sábado payura, pariya ininturuzkas Fariseo awaruzkas Pilatora izna iat **63** kit kaizara:

—Mikwa, aumiza mizhain. Uzasmin, an pírail kaizmumikane “kutña payura irittas kakulnash” kizta. **64** Katmizna up kiwaintuza kamkin izna innnari kutña payurakima. Suasne paiña kammuruzne amtawara aamanazi, iritta walkwan. Jesús uzasmin, “nane Dios inintamika ish” kizta. Paiña kammuruz “us irittas kakultire” kizarane, an minpa pírail an ñancha pírailkin anza kwail namnazi.

65 Pilatone kaiznara:

—Une an kiwaim suldaruruza miltain, kamkin anza wat izanapa, minminkas nappamanpa.

66 Suasne uspane kamkin iat kit sipmu ukkin watsal sippara, mamaztuz nappamanpa. Suasne suldaru kiwaintuza chihkanarit, izanapa.

Jesúsne irittas kakultu

(Mr 16.1-8; Lc 24.1-12; Jn 20.1-10)

28 ¹ Kwaizkultu payu pinkane, domingo payu kinmizta. An domingo payu kinmizkane, Magdalena pípurulas Mariákas mamaz Mariákas kamkin izna iilta. ² Amtazasmin, masain pilpara tinta ul samizta. Anpatpa ángelne chiyuras kihsh kit piannat kit uk siptit tainkat kit ukkin uzta. ³ An ángelne ippakana naztam aizta. Paiña p̄n putchã iztit. ⁴ Sun izarawane, suldaruruzne ulat kit ishkuara. Ishkuamtu akwa, uspane irittuzkain namarit. ⁵ Suasne ángelne ashamparuza kaiznara:

—Ishkuman. Nane u Jesústa, piantaritmikasha, saimtuas pianish. ⁶ Usne akki tuchi. Ukasa uzasmin, usne uruza kainanat kit us kaizta aizpa kirit. Usne me irittas kuhsta. Minta ussa kam-takin iztain. ⁷ Azain iat kit paiña kammuruza ka kaiznarain:



Ashamparuz uk uktit izamtu

“Irawane, usne me irittas kuhsta. Galilea sura irain. Usne ukin an ñancha imtu. Sua ussa izanazi.” Nane apain atpaish, sun uruza kaiznana.

8 Suasne ashamparuzne azain kamkis iilta. Ishkuamtukas, wat minñara. Añ intazasmin, iil kit paiña kammuruza sun pit kainailta. **9** Imtazasmin, Jesúsne usparuza kasha at kit “kakishapu” kizta. Suasne uspane Jesússta ail kit wakpuj wainpail kit chihtikasa mittikin ippailta. **10** Usne usparuza kaiznara:

—Ishkuman. Ap kammuruza kainarain, Galilea sura ianapa. Tane uspane nawa izanazi, kizta.

Suldaruruzne pirail kaizamiztu

11 Ashampa imtazasmin, minpazha suldaruruzne pipulura iat kit pariya ininturuza sun kirit aizpa kaiznara. **12** An pariya ininturuzne Judío ilaparuzkasa kwinta kin iara, maza pitmin nijkulana. Suasne uspane kwisha akkwan pial suldaruruza mlana **13** kit kaiznara:

—Sunkana kaiztain: “Au amtawara pittamtuasmin, Jesússta kammuruzne aat kit iritta walkuara”. **14** Mikwa sun piankamtane, aune uruza kiwainshinamakpas, uruza ilnamanpa.

15 Suasne Suldaruruzne pial sappara, awa usparuza kaizara aizpa kin. Sunkana Judío awaruzne makima kaizamtu.

Jesúsne paiña once kammuruza kurunnamtu

(Mr 16.14-18; Lc 24.36-49; Jn 21.19-23)

16 Suasne once kammuruzne Galilea sura izarakima iat kit Jesús usparuza inintakin piannara. 17 Jesússta izarawane, uspane ussa wakpuj wainñara. Minpazha ussa nil nijkularachi. 18 Suasne Jesúsne usparuza kasha it kit kaiznara:

—Diosne nawa kiwainta, wan chiyurakas wan au sukinkas tinta ininnapa. 19 Katmizna wan awaruza iat kit kamtanarain, ap kammuruza namninnanapa. Sun nijkulturuza kwazikasa munnarain, Taitta Diostakas Dios Painkultakas Sinam Izpultakas kanpaamtu akwa. 20 Na uruza kamtanara aizpa usparuza kamtanarain, na kainara aizpa kianpa. Sunkas nijkultain. Nane wan payurakima ukasa tuanash, au su pailnakima.

Pailti.